

LUKE

THE GOSPEL  
ACCORDING TO  
SAINT LUKE  
IN  
HAIDA.

LONDON :  
PRINTED FOR THE  
BRITISH AND FOREIGN BIBLE SOCIETY.  
1899.

TRANSLATED BY

THE REV. J. H. KEEN,

MISSIONARY OF THE CHURCH MISSIONARY SOCIETY.

## SYSTEM OF SPELLING HERE ADOPTED.

### VOWELS AND DIPHTHONGS.

a as in <i>fat</i> .	ō as in <i>pole</i> .
ā „ <i>father</i> .	u „ <i>cut</i> .
e „ <i>met</i> .	ū „ <i>truly</i> .
ē „ <i>prey</i> .	au „ <i>ought</i> .
i „ <i>pit</i> .	ou „ <i>loud</i> .
ī „ <i>pique</i> .	eu „ <i>feul</i> .
o „ <i>lot</i> .	ai „ <i>aisle</i> .

### CONSONANTS.

g hard, as in *go*.  
j as in *jest*.  
k as *ch* in *loch*.  
s as in *sit*.  
ch „ *chip*.

w and y are used only as consonants.

*lth* represents a sound made by expelling the breath while the tip of the tongue touches the palate.

Hyphens are occasionally introduced to aid the reader in dividing the syllables.



GIALTIANG LĀ  
S A I N T L U K E  
KĀLANG-AN Ū Ā IJUNG.

---

Chapter 1.

**T**LIKU gin itil shu edan tl kwon kālung-ai  
isdagudung-gun alth-ū,

2. Kwunstie sta ga keng-gang-an isgien,  
*Shanung-itlagadas* kil un ga liplētgāgan ishin,  
itil ga shudaian ging-an,

3. Kwunstie sta gin wautliwon tliku edang-  
an un yenki di ūnshidulgun alth, duman dung  
un kālung-ai da di ishin gudung-gun, Theo-  
philus lādsilthīs ;

4. Gin dung tl shkotadaian yenki edan un  
dung ūnshidai una.

5. Herod Judæa tligai un king-gāgan nūt,  
nung liplētga Zacharias hin kyā ijan, waigien  
Abijah gia haadgai alth il Ithong-gwil-gang-  
an ; waigien Aaron gūjang-alung swon il  
ināgan Elizabeth hin il kyāgan.

6. Waigien il stung-won *Shanung-itlagadas*  
hang-gu lā-āwon, waigien Shalana gia king-go-  
gung-ai wautliwon isgien, tliku gin il et-hul-

gang-an ishin ging-an tlishgūda ādan il etgī-ū-gang-an.

7. Waigien gum il git-kai-ung-āwon, Elizabeth kekulaian altha, waigien il stung-won kē-ēlthāwon.

8. Waigien Shanung - itlagadas hang - gu tliku la tl et halan ging-an nung liplētgas gia lthong-gwīlie il isdagundān,

9. Tliku ga liplētgasgai edang-an ging-an. Shalana gia temple-gai ai il kudas gien, shkwūnūlou il ōgulthdie lāgan.

10. Waigien shkwūnūlou tl ōgulthdaiandlu, tl shkūlas wantliwon kyāgūst singlthgang gushu-gang-an.

11. Waigien Shalana gia angel-gai swon shkwūnūlou altar-gai sōolgūst giāns il kang-an.

12. Waigien Zacharias gudung-ai lthkwīdaian tlistleuon la il kang-andlu-a, waigien il lthwaugalan.

13. Waigien nung angel-gas hin il shudaian, Zacharias, gum lth lthwaugang : singlthgang dung gushus *Shanung-itlagadas* guduns altha, waigien dung jā Elizabeth nung ilthing-a dung odō sta kai-ishang, waigien John hin la dung kyādā-ashang.

14. Waigien dung gudung-ai las gien, tlika dung gwūlā-ashang ; waigien tl kwon la tl kais alth gudung-ai lā-ashang.

15. Shalana hang-gu il eu-on-ses altha, wai-

gien wine isgien gin dutga ishin gum il nılth-ang-ashang; waigien ou-ung dulthi sta-hun anung Hants Las alth il stāūgā-ashang.

16. Waigien Israel gitalung kwon Shalana Shanung-itlagadas gwī ung-a il tla-stılthishang.

17. Waigien Elijah gudung-ai isgien, dugwī-gai alth ishin, la kōnast il kā-ashang, tl aung-alung gudung-ai gitalung gwī il tla-stılths gien, ga geujiasgai ga lasgai kutung-gai ai ishin il al-istalai una; tl haada Shalana un agung elthgidas il tla-elthgigai una, hin la il shudaian.

18. Gushinu adshi un di ūnshidulth-tljū-ashang? di kē-ēlths gien, di jā ishin kē-ēlths altha, waigien hin Zacharias nung angel-gas shudaian.

19. Waigien nung angel-gas hin hang-lthang il shudaian, Gabriel ltha-ū ijung, Shanung-itlagadas hang-gu nung giāans-a; waigien dung ā lth gushue un isgien, a gi-lthang lā is ishin dung ga lth shudie un di tl kil-ijun.

20. Waigien, gwokeng, dung kilgūūdsāa-shang, waigien kilthgulie odō dung eshgāa-shang, ga shantlanai gut a gin is wai ging-an etgai keu-a, time-gai elthgīsdlu tliku lth shūs ging-an etses gum dung yet-dang-gun altha, hin la il shudaian.

21. Waigien tl haadas Zacharias keu edan,



waigien temple-gai ā il gū-hungsgadan un tl kuldung-āgan.

22. Waigien thistleuon il katla-waugandlu, tla ā gushue odō il eshgaian; waigien temple-gai ā gin unkuldung-a il kang-an un tl ūnshidan; waigien tla hung-ā stlang il akaiādaian, waigien hawun il kil-gāwon.

23. Waigien waudlā, thistleuon sing gūt il lthong-gwilang-kashagan tlan ēlandlu, giang nai ā il kaidan.

24. Waigien ashgai shantlanai dlā, il jā Elizabeth dulthgiēlan; waigien kōng kē-tlēth gūt ung il salgādaian,

25. Hin Shalana di isdagun, ga shantlanai ai di il keng-gundlu, tl haada shu di ēdans il gū-īlthdie una, waigien hin il shouon.

26. Waigien kōng kē-tlū-unalandlu, Gabriel nung angel-ga Shanung-itlagadas sta Galilee ilna-gai swon Nazareth hin kyas gu katlagan.

27. Nung dliang nung ilthing-a Joseph hin kias, David gia haadgai swon ijan, inang-kasas un il katlagan; waigien nung dlians Mary hin kiāgan.

28. Waigien la kwulth il kudsaiian gien, Dung ā lth kil-lāgung, yenki dung tl tloulthligulths, Shalana dung alth ijung, hin il shouon.

29. Waigien tliku il shouon alth *Mary* gudung-ai lthkwīd-euon-an gien, tliku adshi gushue etgai odō il kwūlthalan.

30. Waigien nung angel-gas hin il shudaian,

Gum lth lthwaugang, Mary ; Shanung-itlagadas dung alth gudung-ai las altha.

31. Waigien, gwokeng, dung dulthgiëlthshang, waigien nung ilthing-a dung kai-ishang, waigien JESUS hin la dung kyādāashang.

32. Il euon-shang, waigien sha agwī Nung is Git hin il kyā-ashang ; waigien Shalana Shanung-itlagadas David il aung gia aulthgahung-we la ga isdāashang ;

33. Waigien Jacob gia haadgai un il itlagada-swonung-ashang ; waigien lagia kingdomgai gum tlan elth-swonung-ung-ashang, hin nung angel-gas Mary shudaian.

34. Gushinu adshi etishang, gum lth lā-inans altha ? waigien hin Mary nung angel-gas shudaian.

35. Waigien nung angel-gas hin hānglthang il shudaian, Nung Hants Las dung ing-gu isishang, waigien sha āgwī Nung is gia dugwīgai dung ā lthkājēlthashang ; althji alth ū nung dung kai-ises nung las isgien, Shanung-itlagadas Git ishin, hin kyāashang.

36. Waigien, gwokeng, dung tou-i Elizabeth ishin kē-ēlths gien dulthgiēlgung ; waigien kekula hin nung kyāgun da kōng kē-tlū-unulgung.

37. Kil wautliwon Shanung-itlagadas stasis gum dugwīa ādan isang-ases altha, hin nung angel-gas il shudaian.

38. Shalana gītsada di ijung ; tliku dung

shus ging-an lth akwon di un edi, waigien hin Mary shouon. Waigien nung angel-gas la sta kaidan.

39. Waigien ashgai shantlanai gut Mary giāagan gien, tliga gu tldou kwons ā ung il gū-dūlthāgang-an, Judah tligai gu lana ijan ā-a;

40. Waigien Zacharias kwulth il kudsaian gien, Elizabeth ā il kil-lāgan.

41. Waigien tlistleuon Elizabeth Mary la ā kil-las gudang-andlu, il dul ā nung ikutsūs yildang-an; waigien Elizabeth Hants Las alth stahgan;

42. Waigien kwunan il kilthgūlaian, Tl jadas shu dung las gien, nung dung kaiases ishin lāgung.

43. Waigien gushintlou giagun Shalana-gai ou di keng-atlang?

44. Gwokeng, tlistleuon di ā dung kil-las lth gudung-gundlu, nung ikutsūs gudung-ai lā alth di dul ā yildung-gun.

45. Waigien nung yetdagun ū lāgung; Shalana sta gin tl shudaian wai ging-an etses altha, waigien hin Elizabeth Mary shudaian.

46. Waigien Mary hin shouon, Di althandai Shalana ā kil-lāgung,

47. Waigien Shanung-itlagadas Nung alth di koguns alth di gudung-ai tlika-gūlāgun.

48. Il gitsada jadas het gudung-ai ets il kang-an altha; adshi sta gūdistā kang-gai wautliwon, nung las, hin di kyādāashaug.

49. Nung Dugwīa-euons di unyāgudung-ēlthdagun altha, waigien il kyē ū lāgung.

50. Waigien gūdistā kang-gai kwon shū sta la ga ga lthwaugasgai kalthshint il gudung-gung.

51. Hyang alth dugwīa tla il kendaian; ga gudung-ai sha etsgai hawun gin odō kwulth-ilgundān il hagujang-an.

52. Ga prince-gasgai aulthgahung-we sta hēt ga ung-a il isdaian, hēt ga ga gudung-ai etsgai ishin sbī ga il isdaian.

53. Ga k'wōtsgai gin lā alth il skisūdaian; waigien ga gin-lthing-asgai kēstlang-an il kil-istīdan.

54. Israel gitsadang da il tlaadan, Abraham un isgien, il gitalung un ishin.

55. (Tliku itil aung-alung ga il shouon ging-an) k'ung-gudung-ie ā ung-a il gūshgut-swong-ai una, hin Mary shouon.

56. Waigien Mary kōng kē-lthōnulth dlu la alth nāgan gien, gyang nai gwī silthgang il stēlan.

57. Waigien Elizabeth kaigai dlu ga ēlan; waigien nung ilthing-a il kaian.

58. Waigien la kwulthīt ga nāansgai isgien il tou-alung ishin Shalana la kalthshint gudung-euon-an ū gudang-an; waigien la alth tlika tl gwūlāgan.

59. Waigien shin stanshang-āgandlu nung ākutsūs circumcise-die un tl istlagan; waigien,

Zacharias, hin la tl kyāđang-kashagan, tliku il aung kyāgan ging-an-a.

60. Gāanū ; John hin tlou il kyāashang, waigien hin il ou hanglthang shouon.

61. Gum dung tou-i swon-hun hin kyā-ang-gung, waigien hin la tl shudaian.

62. Waigien il aung hung-ā stlang tl akaiadaian gien, tliku il kyāgai da il gudung-ai da la alth tl kiānang-an.

63. Waigien gin kālun-ai gū da il kiānang-an gien, John, hinū il kyang, hin il kāl-ang-an. Waigien un tl kuldung-ā-ōdsou-on.

64. Waigien hawīdan il helthi helthalan gien, il tong-il ishin ai otadan, waigien il gushouon gien, Shanung-itlagadas ā il kil-lāgan.

65. Waigien tla kwulthit ga nāang-an-gai wautliwon lthwaugalan ; waigien Judæa tligai tldāwē kwons wautliwon ai tliku tl shouon wautliwon king-ā-kokūstlū-aian.

66. Waigien ga gudang-an-gai wautliwon wau ā gūdanung-ēdan gien, Gushinu anung ākutsūs ēdung-kasha-alth? hin tl shouon. Shalana stlai la alth ijan altha.

67. Waigien il aung Zacharias Hants Las alth stahgan gien, gin unsta il shouon, waigien hin il shouon,

68. Shalana Israel un nung Itlagadas ū lā-gung ; haadgai un ung-a il katlagan gien, tla il dahgan altha,

69. Waigien David il gitsada gia nai ā kogan nushang-wē itil un il isdaian

70. (Hetligai isīdan sta tliku prophet las helthi alth ung-a il shouou ging-an-a,)

71. Itil telg ga kensgai sta isgien, itil tloulthdā-ung-ie da ga gudunggai wautliwon stlai sta ishin itil il kogundaian ;

72. Itil aung-alung kalthshint il gudungien, gin lā il shudaian ā ishin ung-a il gudaung-ai una ;

73. Abraham itil aung ā gushou tladsga alth gin il shudaian-a,

74. Itil telg ga kensgai stlai sta itil kogundlu lthwauga ādan,

75. Hēnung-a lā alth isgien, hēnung-a yā alth ishin, itil hēnung-askialthk la hang-gu la un talung lthong-gwylie un itil ga il isdie una.

76. Nung ākutsūs, waigien dā-ū sha āgwī Nung ets gia prophetgai hin kyā-ashang ; Shalana gia keu-e elthgīdie un la konast dung kāases altha ;

77. Gyang haadgai il kogundāases isgien, tl dāung-as kalthshint ishin il gudung-ases un tla dung ūnshidulthdie una,

78. Itil ltagīda kung-gudung-as alth-ū, sha āgwī sta shantian otulthgwai is itil un katlāashang,

79. Alga ā isgien, kotal algagai ā ga tlodas ishin ā kokeshguts gien, keu dlaia ai itil alistalai una, hin Zacharias shouon.

80. Waigien nung ākutsūs inastlaian gien, il gudung-ai tladsgēlan, waigien Israel haade la tl kendie keu, tligunltha il ijan.

### Chapter 2.

**W**AIGIEN althsgai shantlanai gut hēt-tligai gu tl haada is wautliwon kyē tl kālung-ai un Cæsar Augustus tukung-gogang-an.

2. Aū tlishinūt tl kyē tlang-a tl kālång-an Quirinius Syria tligai un itladāgandlu-a.

3. Waigien tl wautliwon-hun kyang kālung-die un ilnagai ā ung-a ijan.

4. Waigien Joseph ishin Nazareth ilnagai Galilee tligai gu is sta, David gia ilnagai Bethlehem hin kyas Judæa tligai gu is ā kulthaian, David gia haadgai swon il ijan altha ;

5. Kyang isgien, Mary, nung il inā-ung-kashagan kyē ishin il kālung-die una ; waudlu Mary dultghiāgan.

6. Waigien hawun gu il isūgundān, il kai-ungkasas waudlu ēlan.

7. Waigien il ketlagang-an lang-a ilthing-āgan ; waigien la odō il tilthgalan gien, geudangin ai sta lthdanūs ai la il dlisdlaian, lthdanou nubgai ā gum lūm la un kang-gang-āwon altha.

8. Waigien althji tligai gu lumadō kechitlē-

alung kwulthkotis ā nāang-an gien, algwau lumadōgai ā ung-a tl lthotsaian.

9. Waigien Shalana gia angelgai swon la kwulth giāāwon gien, Shalana un yāgudung-gai la odō kokōshgadāwon; waigien il lthwau-gulth-euon-āwon.

10. Waigien nung angelgas hin il shudāwon, Gum lth lthwaugang-ū; gwokeng, gialthang lā, alth tl gudung-ai lā-euon-ai un, dalung ga lth gialthindang, waigien tl haada wautliwon un isishang:

11. Aiat David gia ilnagai gu Nung alth tl koguns, Christ Shalana isis, dalung un tl kais altha.

12. Waigien adshi ū dalung un kang-ūdsadā-gung; Nung ākutsūs odō gin tilthgalas gien, geudan gin ai sta lthdanūs ā il tidas dalung keāashang, hin anung angelgas il shudāwon.

13. Waigien umlthistan nung angelgas alth sha-tligai haade shkūlilth-euon-an gien, Shanung-itlagadas ā tl kil-lāgan gien, hin tl shouon,

14. Shanung-itlagadas sha āgwī is un lth yāgudung-ū, waigien hēt-tligai gu tl haada alth il gudung-ai las shū lth gudung-ai dlaia isdū, hin tl shouon.

15. Waigien tlistleuon ga angelgasgai shi ga la sta isāwon silid, lumadō kēchitlē-alung hin gu shudaian, Bethlehem ā wēt talung isti-idsun, Shalana tliku gin edan un itil ūnshi-



dulthdas talung kang-gai una, hin gu il shudāwon.

16. Waigien hawīdan il istla-āwon gien, Mary isgien, Joseph ishin, nung ākutsūs geudan gin ai sta lthdanūs ā tīdas ishin il keng-āwon.

17. Waigien tlistleuon il keng-āwondlu, anung ākutsūs edē gin la ga tl shudāwon unsta il shu-āwon.

18. Waigien lumadō kēchitlē-alung gin shudai-an ga gudang-an-gai wautliwon wau un kuldang-an.

19. Waigien Mary a gin tl shudai-an wautliwon duman kang-an gien, odō il kwulthalan.

20. Waigien lumadō kēchitlē-alung silthgang stēlan gien, gin il gudung-āwon isgien, gin il keng-āwon wautliwon ishin sing Shanung-itlagadas un il yagudung-āwon gien, la ā il kil-lā-āwon, tliku la ga tl shu-āwon ging-an-a.

21. Waigien la tl circumcise-die un shin stan-shang-ā-ūlthaiandlu, Jesus hin la tl kyādaian, la tl dulthgīgai konast nung angelgas il kyādaian ging-an-a.

22. Waigien tliku Moses gia king-go-gungai shouon ging-an, tlistleuon ung tl tla-shkwūnagulai shantlanai waudlu ēlandlu, Jerusalem ā la tl dlāalthaian, Shalana ga la tl isdie una,

23. (Tl ilthansida wautliwon tl kedlaguns ū Shalana un nung las hin tl kyādāashang, tliku

Shalana gia king-go-gung-ai kálung-as ging-an-a :)

24. Waigien kaltsada stung isgien pigeon stung ishin ga hun tl hāasie un ū tl ijan, tliku Shalana gia king-go-gung-ai shūs ging-an-a.

25. Waigien nung ilthing-a Jerusalem gu ijan, Simeon hin ū il kyāgan; waigien anung ilthing-as lāgan gien, Shanung-itlagadas un il gudung-ai lāgan, waigien Israel haade gudung-ai wau shagadang-ases da il khatsūgang-an: waigien nung Hants Las la ing-gu ijan.

26. Waigien Shalana gia Christgai il kang-gai konast gum il kotulthang-ases Hants Las un il ūnshidulthdaian.

27. Waigien Hants Las alth temple-gai ai il kudsaiian; waigien tlistleuon Jesus yāalung, tliku lau-gai shūs ging-an la un il wauawē un, ai la il dlistl-dsāwondlu,

28. Itan la il dligīgan gien, Shanung-itlagadas ā il kil-lāgan, waigiēn hin il shouon,

29. Shalana, dung shouon ging-an, wēt gīt-sadang gudung-ai dlaia alth dung kil-kaidung;

30. Hung-ung alth dung gia kogunai lth keng-gun altha,

31. Tl haada wautliwon hang-gu gin dung tla-ēlthdaian-a;

32. Alth tliga kulat haade otgēlths gien, Israel dung gia haadgai is alth un yagudung-gai una, hin il shouon.

33. Waigien la edē gin tl shudaian un il aung isgien il ou ishin kuldung-āgan ;

34. Waigien Simeon gūshou lā la ā shudā-won gien, hin il ou Mary il shudaian, Gwokeng, Israel haade kwon dl-dulduns gien tl kalthou-gadung-ai un ishin anung ākutsūs ijung ; waigien hanltha tl gūshue un kang-ūdsada ishin il ijung ;

35. Waigien shich dung altbandai ai tl kitsāashang ; tliku tl kwon kwulthilths kang-gēle una, hin la il shudaian.

36. Waigien Asher gwaigang-ai swon, Phanuel gūjang-a jada prophetga ijan, Anna hin kyāgan (il kē-ilthdsilthigan, waigien il lā-inēlan sta tuda jikwau tlal-ung kwulth il ijan,

37. Waigien tuda tlālālē stanshang-ā waugu stunshung il dli-ang-an), waigien algasdlu isgien shantlansdlu ishin gum temple-gai sta il kaidang-gang-an, waigien kēsāl alth isgien, gin ginang alth ishin singlth-gang il gūshu-gang-an.

38. Waigien althsgai ashkosbgadai gut il katlalthaian gien, Shanung-itlagadas ā il kil-lāgan, waigien Jerusalem tl kogundie da tl khatsūgang-an wautliwon ā la edē il gūshouon.

39. Waigien tlistleuon tliku Shalana gia king-go-gung-ai shūs ging-an il wau-gī-āwon-dlu, Galilee tligai gwī il stilthāwon gien, gyang ilnagai, Nazareth hin kyāgan, un il istla-āwon.

40. Waigien nung ākutsūs inastlas gien, il

dugwīelan gien, kudang alth il stahgan; waigien Shanung-itlagadas gudung-ai ligai la inggu ijan.

41. Waigien tuda wautliwon gut-hun il yāalung passover lagunung-ai ak Jerusalem ā ijang-an.

42. Waigien la da tuda tlāalth waugu stang-andlu, tl lagunung-kāguns ging-an il istal-lthāwon;

43. Waigien tlistleuon shantlanai tlan-ēlandlu, silthgang il stīlthāwondlu, Jesus nung ilthing-a kutsū isis Jerusalem gu ung tutlistldaian; waigien il yāalung gum un ūnshidang-an;

44. Waigien tla alth-hun il ising il gudung-āwon althū, shin shoshgu il istalāwon; waigien tou-alung shū-wīt isgien, gi un il ūnshitwos shū-wīt ishin, la da il dī-ing-āwon;

45. Waigien tlistleuon la da il dī-inchgāwondlu, Jerusalem gwī silthgang il stīlthāwon gien, la da il dī-ing-āwon.

46. Waigien shin lthōnulth-ēlandlu, templegai ā la il kēi-āwon, gin shkotadālē-alung shū il kou-os gien, tl kil ā il geulans gien, tla alth il kiānung-gang-an;

47. Waigien il kil ga gūdang-an wautliwon gin un il ūnshits isgien, tliku hanglthang il shūs ishin un kuldang-an.

48. Waigien tlistleuon la il keng-āwondlu, la un il kuldung-āwon; Lthken, gushintlou

tliku itil un dung ēdung? gwokeng, dung aung isgi-n lthā ishin gudan stī alth dung da dī-ing-gun, waigien hin il ou il shudaian.

49. Gushirtlou di da dalung dī-ing-ūjang? gum gu Aung-ung gia nai ā lth itsgai las un dalung ūnshidang-ūja? waigien hin la il shudāwon.

50. Waigien gin il shudas gum un lang-a il ūnshidang-āwon.

51. Waigien la alth il kaidalthāwon gien, Nazareth gu il istla-āwon; waigien la kilth ging-an il etūgang-an; waigien il ou a gin il shudagang-an wautliwon gudung-ung alth un ung ūnshitgang-an.

52. Waigien Jesus kudung-ēlan gien, il dla-konēlan, waigien Shanung-itlagadas, isgien tl haada ishin la alth gudung-ai lāgan.

### Chapter 3.

**W**AIGIEN Tiberius Cæsar itlagadēlan sta tuda tlāalth waugu tlēlthaiandlu, Pontius Pilate ishin Judæa un governor-gagandlu, Herod ishin Galilee un tetrarch-gagandlu, waigien Philip il dōn ishin Ituræa isgien Trachonitis un ishin tetrarch-gagandlu, Lysanias ishin Abilene un tetrarch-gagandlu,

2. Annas isgien Caiaphas ishin liplēt un itlagadagandlu, tligunltha John, Zacharias git ijan, ā Shanung-itlagadas kil ijan.

3. Waigien Jordan untlai odō tliga wautliwon is un il katlagan gien, tl dāung-as da kēshgadēlē un gudung-ung stīlthdie baptism-gai alth tla geu gu il gushugang-an ;

4. Tliku Isaiāh nung prophetgas gia koginē ā kil kālūng-as ging-an-a ; Shalana gia keu-e lth ēlthgīdū, waigien lth lang-a tlayāgulthū, hin nung kil swonshung tligunltha gudung-āgung.

5. Tladanai wautliwon tl stabūdāashang, waigien tldou wautliwon isgien, tliga kēāwos wautliwon ishin, hētga tl isdāashang ; keu kitshkājūlung-as ishin yāgulthshang, waigien keu dāung-as ishin ligulthshang ;

6. Waigien ga hēnung-asgai wautliwon Shanung-itlagadas gia kogunai keng-ashang, hin kālūng-āgung.

7. Althji alth tla il baptize-die un tl shkūleuon la ā istīdan hin il shudaian, Sik gitlung dalung isis, gīshdu kalthi-yilthdang isang-kasas sta dalung istiīd-halang ?

8. Althji alth gudung-ung stīlthda un ān las lth īnastldū, waigien, Abraham ū itil aung ijung, gum lth hin gudung-ung-ū ; Shanung-itlagadas ashgai kwau-e sta Abraham un gitlung tla-kalthoulthing-ā-gung, hin dalung lth shudas altha.

9. Waigien wēt-hun ū keutljou-e gin lthkai shkūshang-wē gu tlōdang ; althji alth gin lthkai wautliwon gut gum ān lā īnastlans tl

shkikundals gien, tsanūsi tl sisagung-gung, hin tla il shudaian.

10. Gūsh tlou talung isdie lagung? waigien hin ga shkūlasgai la alth kianang-an.

11. Kodats chi-stung nung dāasdlu, gum nung ga dāans ga il isdie lāgung; waigien tou nung dāas ishin ging-an il ūgai lāgung, waigien hin hanglthang tla il shudaian.

12. Waigien giashouganung-lē-alung ishin tla il baptize-die un istlagan, Nung itlagadas, gūshū talung isdie lāgung? waigien hin la tl shudaian.

13. Tliku king-gogung-ai shūs telg lth gum tl giashoudang-ū, waigien hin tla il shudaian.

14. Waigien soldier haade ishin la alth kiānang-an, Waigien talung ishin, gushin talung etgai ū lāgung? hin tl shouon. Gum lth tl haada dāa-gūdang-ung-ū, gum lth ging-gangan gin isdang-ū, waigien lth giashougai ung-a gwūlāū, waigien hin tla il shudaian.

15. Waigien tl haada nung da khatsāwon gien, tl wautliwon John Christ itsgai odō kwulthilgundān,

16. John hanglthang hin tl wautliwon shudaian, Lthā ū undl alth dalung baptize-dang; di telg nung dugwias tlou katlang, waigien stashgagai ai sta lang-a tlāadai un ū gum di lā-ung-gung; lā ū Hants Las alth isgien das alth ishin dalung baptize-dāashang:

17. Waigien il stlai ā yhitāwē lang-a ijung,

yenkien wheat-nai stling-kou-e ung-a il tla-shkwunagulths gien, wheat-nagai ai ishin wheat-gai gudā ung-a il isdie una ; wheat-gai kul tlou tsanu gum tl kial-lthingans alth il ōgulthdāashang, hin tla il shudaian.

18. Waigien gushou āda kwon alth isgien, gialthang lā alth ishin tl haada geu gu il gushou-on ;

19. Waigien Herod nung tetrarch-gas Herodias kwai-ung jā sta isgien, gin dāung-a wautliwon il isdaian sta ishin *John* il stidaiandlu,

20. Herod housen wautelg gin dāung-a isdaian gien, John kēchitnai ai il isdaian.

21. Waigien tlistleuon tl haada wautliwon baptize-diēlandlu, Jesus ishin baptize-diēlan gien singlthgang il gushouondlu, sha tligai helthalan,

22. Waigien nung Hants Las, kaldsida ging-an ets, la ing-gwī ijan, waigien kil ishin sha sta ijan, Di Git kwōyas ū dung ijung ; dung alth di gudung-ai lāgung, waigien hin kil shouon.

23. Waigien Jesus, tlistleuon gin tla il shkota-dīdandlu, la da tuda tlāale lthonālan, waigien Joseph git il ising tl gudung-gangan ;

24. Waigien Joseph Heli git ijan, Heli ishin Matthat git ijan, Matthat ishin Levi git ijan, Levi ishin Melchi git ijan, Melchi ishin Jannai git ijan, Jannai ishin Joseph git ijan,



25. Joseph ishin Mattathias git ijan, Mattathias ishin Amos git ijan, Amos ishin Nahum git ijan, Nahum ishin Esli git ijan, Esli ishin Naggai git ijan,

26. Naggai ishin Maath git ijan, Maath ishin Mattathias git ijan, Mattathias ishin Semein git ijan, Semein ishin Josech git ijan, Josech ishin Joda git ijan,

27. Joda ishin Joanan git ijan, Joanan ishin Rhesa git ijan, Rhesa ishin Zerubbabel git ijan, Zerubbabel ishin Shealtiel git ijan, Shealtiel ishin Neri git ijan,

28. Neri ishin Melchi git ijan, Melchi ishin Addi git ijan, Adli ishin Cosam git ijan, Cosam ishin Elmadam git ijan, Elmadam ishin Er git ijan,

29. Er ishin Jesus git ijan, Jesus ishin Eliezer git ijan, Eliezer ishin Jorim git ijan, Jorim ishin Matthat git ijan, Matthat ishin Levi git ijan,

30. Levi ishin Symeon git ijan, Symeon ishin Judas git ijan, Judas ishin Joseph git ijan, Joseph ishin Jonam git ijan, Jonam ishin Eliakim git ijan,

31. Eliakim ishin Melea git ijan, Melea ishin Menna git ijan, Menna ishin Mattatha git ijan, Mattatha ishin Nathan git ijan, Nathan ishin David git ijan,

32. David ishin Jesse git ijan, Jesse ishin Obed git ijan, Obed ishin Boaz git ijan, Boaz

ishin Salmon git ijan, Salmon ishin Nahshon git ijan,

33. Nahshon ishin Amminadab git ijan, Amminadab ishin Arni git ijan, Arni ishin Hezron git ijan, Hezron ishin Perez git ijan, Perez ishin Juda git ijan,

34. Juda ishin Jacob git ijan, Jacob ishin Isaac git ijan, Isaac ishin Abraham git ijan, Abraham ishin Terah git ijan, Terah ishin Nahor git ijan,

35. Nahor ishin Serug git ijan, Serug ishin Reu git ijan, Reu ishin Peleg git ijan, Peleg ishin Eber git ijan, Eber ishin Shelah git ijan,

36. Shelah ishin Cainan git ijan, Cainan ishin Arphaxad git ijan, Arphaxad ishin Shem git ijan, Sbem ishin Noah git ijan, Noah ishin Lamech git ijan,

37. Lamech ishin Methuselah git ijan, Methuselah ishin Enoch git ijan, Enoch ishin Jared git ijan, Jared ishin Mahalaleel git ijan, Mahalaleel ishin Cainan git ijan,

38. Cainan ishin Enos git ijan, Enos ishin Seth git ijan, Seth ishin Adam git ijan, Adam ishin Shanung-itlagadas git ijan.

#### Chapter 4.

**W**AIGIEN Jesus Jordan sta silthgang stēlan gien, Hants Las alth il stā-ū-gāgan, waigien shin tlāale stunshung gut tli-gunltha-et nung Hants Las il al-kāgan,

2. Waigien hetg Maulana la edē kil-kang-an. Waigien althsgai sing-ai gut gum il lthdanū-ung-gang-an; waigien tlistleuon tlan ēlandlu, il kwotagalan.

3. Shanung-itlagadas Git dung isdō lth, adshi kwau-ē, Shibli-gēltha, hin shudi, waigien hin hetg Maulana il shudaian.

4. Gum nung haada shibli alth swonan hēnung-ang-ashang, hinū kālūng-āgung, hinū Jesus hanglthang il shudaian.

5. Waigien shi ga la il al-kulthaian gien, moment swonshung gut kingdomgai wautliwon hēt-tligai gu isis la il kendaian.

6. Waigien hetg Maulana hin il shudaian, Adshi dugwīgai wautliwon is isgien, un yāgūdung-gai ishin, dung ga lth isdāashang; di ga tl isdaguni altha: waigien nung ga isdie da di guduns ging-an wau ga lth isdalthing-āgung.

7. Althji alth di hang-gu singlthgang dung gushusdlu, wautliwon dung gia isisang, hin la il shudaian.

8. Shalana Itlagadang ā singlthgang dung gushus gien, la un swonan dung lthong-gwīlie lāgung, hinū kālūng-āgung, hin Jesus hanglthang il shudaian.

9. Waigien Jerusalem ā la il āl-kaidan gien, templegai tla'ls ing-gu la il isdaian, waigien hin la il shudaian, Shanung-itlagadas Git dung isdō lth, sta agung kātāalth;

10. Gyang angels-gai duman dung il keng-althshang ;

11. Waigien stlang alth dung tl dligung-ashang, gum kwau ai dung stai stōwong-ai una, hin kālūng-āsi altha, hin la il shudaian.

12. Shalana Itlagādag edē dung kil-kang-gai gum lā-ung-gung, hin tl shugung, waigien hin Jesus hanglthang il shudaian.

13. Waigien tlistleuon hetgwaulana il edē kilkang - gai wautliwon tlan ēlthdaiaudlu, kwai-umdsiwun la sta il kaidan.

14. Waigien Jesus Hants Las gia dugwigai alth Galilee tligai gwī stēlan ; waigien la alth gialthing-e tligai ashkwau-un gūt king-agan.

15. Waigien tlagia synagogue-nagai ā gin tla il shkotadagang-an gien, tl wautliwon la un yāgudang-an.

16. Waigien Nazareth gu il katlagan, gyagu il inastlaiian-a ; waigien tliku il ēdang-an ging-an sabbath shantlanai ijandlu synagogue-nagai ai il kudsaiian, waigien kōgīn il līdidie un il giāagan.

17. Waigien Isaiah nung prophetgas gia kōgīnē la ga tl isdaian. Waigien kōgīnē il tha-yāgālan gien, gya gu hin kālūng-āsi il kēaiian,

18. Shalana Hants di ing-gu ijung, gialthang lā alth ga kong-nshgitaigasgai geu gu lth gushue un di kuts il tōdagun altha ; ga kechidasgai kil-isāgai un isgien, ga hang-ka-

gasgai gin keng-ashang ga lth shougai un ishin, ga tligiasgai lth istiidai un ishin,

19. Shalana gia tudie alth gudung-ai ligai unsta lth shougai un ishin, di il kil-kaidun, hin kālung-āgan.

20. Waigien kōgīnē gut gwī il isdaian gien, duman nung kens ga silthgang il isdaian gien, il kāwon; waigien synagogue-nagai ā ga isgai wautliwon il khatsgadan.

21. Aiat tliku adshi kālung-e shūs ging-an ets dalung gudung-gung, waigien hin tla ga il shu-īdan.

22. Waigien tl wautliwon tliku il shouon gwūlāgan, waigien gushou lā il helthi sta ijan un tl kuldung-āgan; Gum gu unis Joseph git isang-ūsh? waigien hin tl shouon.

23. Waigien hin tla il shudaian, Tla nung tl-ligal-lēgas, agung lth tl-ligulth; tliku Capernaum gu gin edan talung gudung-gung ging-an lth adlun tlig-ang alth wau, hin gushou et alth di dalung shudāases un di ūnshidung, hin tla il shudaian.

24. Waigien hin ishin il shouon, Yenkien dalung ga lth shugung, Gum nung prophetga tligang gu tl gūsānāwaugung-ung-gung.

25. Waigien yenkien ū hin dalung ga lth shugung, Elijah nūt Israel tligai gu tl dsū-lthin-ga kwonan, tuda lthōnulth isgien, khōng kē-tlū-unilth ishin sha-tligai wau tl shkoshgadan gien, tligai ash-kwau-hun gut tou hilā-wondlu-a;

26. Waigien gum ashgai swon-ā-hun Elijah tl kaidang-an, nung dsulthin-ga Zarepath, Sidon tligai gu is, ā swonan la tl kil-kaidan.

27. Waigien Elisha nung prophetgas nūt tligai gu leprosy alth tl kwon stigan; waigien gum tl swon-hun shkwunagulthang-an, tlan Naaman, nung Syria haadas, swonan shkwunagan, waigien hin tla il shudaian.

28. Waigien tl wautliwon synagogue-nagai ā ijan kalthi-yilthd-euonan, adshi tl gudang-andlu-a:

29. Waigien tl tljūgiāgan gien, ilnagai sta kyā ga la tl dang-an gien, gya ing-gu ilnagai althin-daian stulai kwul ā la tl kāgan, sta la tl kātāalai una.

30. Waigien tla kalthgut-hun il kāgan gien, il kai-dan.

31. Waigien Capernaum ilnagai, Galilee tligai gu ijan, un il katlatalan. Waigien sabbath shantlanai ai gin tla il shkotadagang-an;

32. Waigien gin tla il shkotadaian un tl kuldang-an; dugwīa alth il gushouon altha.

33. Waigien nung ilthing-a synagogue-nagai ā ijan, waigien hants gum shkwūnang la ā ijan; waigien hin kwunan il shouon,

34. Gūsbāku itil un dung katlang, Jesus, Nazareth haadas? itil hīlūdie un gu dung katla-ūsh? nung dung isis un ū di ūnshidung; Shanung-itlagadas gia Nung Las dung ijung, hin kwunan il shouon.

35. Waigien Jesus il stidaian, Tlau lth gushu, waigien la sta lth kâgwulth, waigien hin il shouon. Waigien tlistleuon nung hants dâung-as tla shu il tl-dildulthdaiandlu, la sta il kâgwaulan, waigien gum tligwon la il edang-an.

36. Waigien tl kuldung-â-ôdsou-on gien, gudâ tl gushouon, Gûsh kîl ū ā ijung? dugwia alth hants gum shkwunans tliku il shudas ging-an tla sta kâgwulgung-gung, waigien hin tl shouon.

37. Waigien la alth gialthing-e tliga wau-tliwon wau odō ijan ai king-āgan.

38. Waigien synagogue-nagai sta il kâgwaulan gien, Simon gia nai ai il kudsaiian. Waigien Simon jūnan sti kīna alth sti-euon-an; waigien la sing la ā tl gushouon.

39. Waigien la sha il giāagan gien, sti kīnas il stidaian, waigien lang-a gū-ēlan; waigien hawīdan il kalthāwon gien tla il lthdanū-daiian.

40. Waigien tlistleuon kokēlthagadalandlu ga tou-i sti gut ilā et alth stis la ā tl kelthilang-an; waigien tl wautliwon gu-hun il tltulthdagang-an, waigien tla il tl-ligalan.

41. Waigien tl kwon sta ishin hants dâung-a ijan, waigien kwunan tl gushouon gien, Shanung-itlagadas Git ū dung ijung, hin tl shouon. Waigien tla il stidaian gien, tl gushue ā il kēgadalan, nung Christgas il is un tl ūnshidan altha.

42. Waigien tlistleuon shantlanandlu, il kã-gwulthāgan gien, tligunltha ā il kaidan; waigien tl shkūlas la da kang-an gien, la un tl istlagan, waigien stagang il kaidie da gum tl gudung-ang-an.

43. Waigien hin tla il shudaian, Lana kulat-it ishin Shanung-itlagadas gia kingdomgai alth gialthing-e las alth tla geu gu lth gushue lāgung; un di tl kil-kaidun altha, hin tla il shudaian.

44. Waigien synagogue-nai Galilee tligai gu ijan ā tla geu gu il gushugang-an.

### Chapter 5.

**W**AIGIEN la odō tl shkūlēlan gien, Shanung-itlagadas kil tl gudang-andlu, Gennesaret shu-e jin-gu il giāang-an;

2. Waigien kontlu kē-stung shu-e ā gī-haguns il kang-an; ga āada-lēgasgai tlou wau sta istāalan gien, āade ung-a tl dlan-an.

3. Waigien kontlū-e ke-swon Simon gia ijan gwē il katlīgan, waigien kotgwī tligai sta la il tlū-kusalan. Waigien il kouon gien, kontlū-e gwau sta tl shkūlas gin il shkotadaian.

4. Waigien tlistleuon tlan il gushouondlu, Kotga lthdiing-gai ā lth tlū-kusi, waigien chān ga āade ung-a isdi, dung āadie una, hin Simon il shudaian.

5. Nung itlagadas, al shoshgu talung āada-



gun, waigien gum gin talung kutlidang-gun ; waikianan tliku dung shūs ging-an chān ga āade ung-a lth isdāashang, waigien hin Simon hanglthang shouon.

6. Waigien tlistleuon hin il wau-awondlu, shkolthung kwon-euon il chitlāwon, waigien āade lang-a adsilthidawon ;

7. Waigien kontlū kulat gwau tou-alung isāwon hung-a il tlū-uldung-āwon, la da il tlāadawe una. Waigien il tlū-katla-āwon gien, kontlū-e ke-stung-un il sta-hūdāwon, waigien chahatēidan.

8. Waigien tlistleuon Simon Peter kang-andlu, Jesus kwolū hetgu il tīgūstlū-aian, Shalana, di sta lth kaid, nung ilthing-a dāung-a di isis altha, waigien hin il shouon.

9. La isgien, la alth ga ijan wautliwon ishin, shkolthung kwon-euon tl isdaian un kuldung-āgan altha ;

10. Waigien James isgien John ishin, Zebedee gitalung ijan, Simon alth gudī āadlégagan ishin kuldung-āgan. Gum lth lthwaugang ; adshi sta tl hāada dung isdāashang, waigien hin Jesus Simon shudaian.

11. Waigien tlistleuon kontlue dit-gwī ga ung-a il isdāwondlu, gin wautliwon il tlistlā-awon gien, la dlā il istiidāwon.

12. Waigien hawun ilnagai swon gu il ijun-dān, nung ilthing-a leprosy alth stāūgāgan gu ijan ; waigien tlistleuon Jesus il kang-andlu,

il tīgūstlūaian gien, la ā singlthgang il gushouon, Shalana, dung gwūlasdlu di dung tlashkwunagal-lthing-āgung, waigien hin il shouon.

13. Waigien stlang il jistlaian gien, la inggu il tl-dulthdaian, Di gwūlāgung; shkwunagul-ltha, waigien hin il shouon. Waigien hawīdan leprosy-gai la sta gūēlan.

14. Waigien gum nung ga il shudalthangan, Kaid-ltha, waigien lth nung liplētgas agung kendi, waigien tliku Moses tukung-go-gang-ang-ging-an lth dung shkwunagulths alth gin isda, dung ligulths un tl ūnshidai una, waigien hin il shouon.

15. Waigien wautelg āgwī la alth gialthing-eking-ā-kokūstlu-aian; waigien tl shkūl-euon il kil gudung-ai un isgien, tla il tl-ligulai un ishin, gudā ijan.

16. Waigien tla sta tligunltha ā il kaidan gien, singlthgang il gushouon.

17. Waigien althsgai shantlanai swon gut gin tla il shkotadaian; waigien Pharisee haade isgien, king-goguns shkotadālē-alung ishin gu tlō-daian, waigien Galilee gu isgien, Judæa gu ishin, Jerusalem gu ishin, lana ijan wautliwon sta u tl ijan; waigien tla il tl-ligulai un Shalana gia dugwīgai la alth ijan.

18. Waigien tl ilthansida sti dliida alth nung stis ūnchāang-ū ing-gu isīs la ā tl isdaian; waigien anā ga la tl isdas gien, la hetgu il āūgai da tl gudang-an.

19. Waigien tl shkūlas alth gum tliku anā ga la tl isdalthing-e kang-gang-andlu, nas ing-gwī ga tl isdlalthaian gien, Jesus tla yākosia ijan hetgu nas ing-gu sta ūnchāangwē dung-alth la tl yhitadsaian.

20. Waigien tl yetdas il kang-andlu, Nung ilthing-as, dung dāung-as gagakung-gung, hin il shouōn.

21. Waigien tukālung-lēalung isgien, Phari-see haade ishin, edē ā kāūgiidan, Gīshd ā is ū gushou dāung-a shudang? Gīshdū tl dāung-as gakang-lthing-āgung, tlan Shanung-itlagadas swonan-a? waigien hin tl shouon.

22. Waigien gin ā tl kāūgas un Jesus unshidalandlu, hin hanglthang tla il shudaian, Gūsh odō dalung kwūlthilgung?

23. Dung dāung-as ga gakung-gung, hin shougai isgien, Kālhūltha waigien lth kā, hin shougai ishin, gīshgai-ū yang-alang?

24. Waigien nung haada Git hēt-tligai gu tl dāung-as gakang-gai un dugwias un dalung unshidai un *lth shugung*, hin tla il shudai-an; Kālhūltha, waigien lth ūnchāang-we ung-a isdi, waigien lth nai ā ung-a kaid, hin dung lth shudang, (waigien hin nung sti dliidas il shudaian).

25. Waigien hawīdan tla hang-gu il kālhā-won gien, gin ing-gu il tīdaian ung-a il isdaian gien, nai ā ung-a il kaidan, waigien Shanung-itlagadas un il yāgūdang-an.

26. Waigien tl wautliwon kuldung-āgan, waigien Shanung-itlagadas un tl yāgūdang-an ; waigien tl lthwaugulth-euon-an, Aiat gin akaia talung keng-gun, waigien hin tl shouon.

27. Waigien adshi dlā il kagwaulan, waigien gya gu tl giashous gu nung giashouganung-lēga kou-os il kang-an, Levi hinū il kyāgan ; Di dlā lth kā, waigien hin la il shudaian.

28. Waigien gin il tustl-ōdsou-on gien, il giāagan, waigien la dlā il kaidan.

29. Waigien Levi gyang nai ā lagunung-euon la un tloulthaiian ; waigien ga giashouga-nung-lēga shkūl-euon isgien, tl kulat ishin, lthdanūe un tla alth tlō-daian.

30. Waigien Pharisee haade isgien, tlagia tukālunung-lēalunung ishin lagia disciplesgai un gudung-ai stigan, Gushintlou giashouganung-lē-alunung isgien, ga dāung-asgai ishin alth dalunung lthdanūgung? waigien hin tl shouon.

31. Waigien Jesus hin hanglthang tl shudaian, Ga althinsgai ū gum tla nung tl-ligal-lēgas ga stalthagung-ung-gung ; ga stisgai tlou ga stalthagung-gung.

32. Gum ga lasgai un ai-ing-ai un lth katla-ang-gung ; ga dāung-asgai gudung-ung stilthdie un ū lth katlang, hin tla il shudaian.

33. Waigien hin la tl shudaian, John gia disciplesgai kesalgīgung-gung, waigien singlthgang tl gushugīgung-gung ; Pharisee haade gia disciplesgai ishin ging-an ēdung-gung ;

dung gia disciplesgai tlou lthdanūgung-gung, hin la tl shudaian.

34. Waigien hin Jesus tl shudaian, Hawun nung jatanēlths tou-alung wau kwulth iskia-lthk gu tla dalung kēsāl-dalthing-ā-ūsh?

35. Waigien nung jatanēlths tla sta tl isdā-ases shantlanai isisang, gai sing-ai gut tl kēsāl-ashang, hin Jesus tl shudaian.

36. Waigien kēgang alth tla ā il gushouon; Gum nung swonshung-hun kōdats outla sta gin dung-gītlas gien, kodats kēga ā il gūsbgīd-ung-ung-gung; ging-an il wausdlu, nung outlas il dung-īlth-gwai-ishang, waigien nung outlas sta ga isgai ishin gum nung kēgas un lā-ung-ashang.

37. Waigien gum nung swonshung-hun wine outla gin kul kēga ai isdagung-ung-gung; ging-an il wausdlu, wine outlas gin kul is tla-kwong-ashang, waigien ū ging-gūashang; waigien gin kul is ishin gūashang.

38. Waigien wine outla gin kul outla ai tl isdie ū lāgung.

39. Waigien gum nung swonshung-hun wine kēga nilthsdlu, ga outla ga stalthagung-ung-gung; ga kēgas lang il shūs altha, hin il shouon.

## Chapter 6.

**W**AIGIEN sabbath shantlanai ai corn kwu-lthkotajai kalthgut il kāgan; waigien lagia disciplesgai corn-gai dung-giidan gien, gutgwī il tla-hanang-wos gien, il tā-āwon.

2. Gushintlou tukung-go-gung-ai shus ilā sabbath shantlanai ai dalung waugung? wai-gien Pharisee haade ilthi hin shouon.

3. Waigien Jesus hin hanglthang tl shudaian, Tlistleuon David kwōtagālandlu, tliku il waugan gien, tliku la alth ga ijan-gai ishin waugan, gum gu dalung lididang-ūja?

4. Shanung-itlagadas gia nai ai il kudsaiian, waigien shibli las il isdas gien, il tāgan, wai-gien la alth ga ijan-gai ga ishin il isdaian; althji tlan ga liplētgas swonan tugai lang tukung-go-gung-ai shouon, hin Jesus shouon.

5. Nung haada Git ū sabbath shantlanai un itlagadāgung, hin ishin tla il shudaian.

6. Waigien housen sabbath-gagandlu, synagogue-nagai ai il kudsaiian gien, gin tla il shkotadaian; waigien nung ilthing-a sōolgüst stlai yhilgala ā ijan.

7. Waigien tukālung-lēalung isgien, Pharisee haade ishin, la ā lthotsaiian, sabbath shantlanai ai la il tl-ligulai tl kang-gai una; tliku la hanltha gushoulthing-e tl kēie una.

8. Waigien tliku tl guduns un il ūnshidan;

Giāaltha, waigien lth tla yakosia giāa, waigien hin nung stlai yhilgalas il shudaian.

9. Waigien il giāagan gien, tla yakosia il giāagan. Waigien hin Jesus tl shudaian, Sabbath shantlanai ai gin lā isdie gu lā? gin dāung-a isdie gu lā? nung hēnung-gai kogundie gu lā? nung tiie gu lā? dalung alth lth kiānung-gung, hin tla il shudaian.

10. Waigien tl wautliwon gut il kendagwongan gien, Stlang lth jistla, hin la il shudaian. Waigien ging-an il waugan, waigien il stlai langa ligalan.

11. Waigien la un tl kalthi-yilthd-euonan, waigien tliku Jesus tl edalthing-ai ā gūtgā tl kāūgaian.

12. Waigien althsgai shantlanai gut singlthgang gushue un tldāwe ā il kaidan; waigien al shoshgu Shanung-itlagadas a singlthgang il gushouon.

13. Waigien shantlandlu, gyang disciplesgai un il lthai-aian; waigien tla sta tl tlāalth waugu stung il kenstaian, waigien apostles hin la il kyādāwon;

14. Simon Peter hin ishin la il kyadaian isgien, Andrew il don ishin, James ishin, John ishin, Philip ishin, Bartholomew ishin,

15. Matthew ishin, James Alphæus git ijan ishin, Simon Zealot hin kyāgan ishin,

16. Judas James git ijan ishin, Judas Iscariot la alth nung giadahgan ishin;

17. Waigien la alth il kãalthāwon gien, tliga yā gu il giāang-an, waigien lagia disciplesgai shkūl-euon-an, waigien Judæa tligai ashkwauhun sta isgien, Jerusalem sta ishin, Tyre isgien Sidon ishin ai-awe gust ijan sta ishin, tl shkūl-euon il kil gudung-ai un isgien, tl stis tlang-a il tla-ngīstlie un ishin istlagan ;

18. Waigien hants gum shkwunans alth ga gudung-ai lthkwīdas ishin ligalan.

19. Waigien tl shkūlas wautliwon il tl-tlie da gudung-an ; dugwīa la sta ijan gien, tl tlangīstla-ōdsou-on altha.

20. Waigien gyang disciplesgai il khatsgī-lthdaian gien, hin il shouon, Dalung kong-ushgitaigas ū lāgung ; Shanung-itlagadas gia kingdomgai dalung gia isis altha.

21. Wēt dalung kwots ū lāgung, dalung skisūases altha. Wēt dalung saigas ū lāgung, dalung kah-ases altha.

22. Nung haada Git agunan tl haada dalung telg kens gien, stagang dalung tl dans gien, ishin dalung tl kil-ēdans gien, gin dāung-a tl dang-guns ging-an dalung kyē ishin tl dansdlu, dalung ū lāgung.

23. Gai sing-ai gut lth tlika gwūlā-ū ang-a kai-ang-ū ; sha-tligai gu dalung gia giashougai euonsi altha, wai ging-ān tl aung-alung ishin ga prophetgasgai etdagang-an altha.

24. Dalung itlagadas un tlou gin ga lthwau-gīgāashang ! dalung gudung-ai wau shatusgīs altha.



25. Wēt dalung skisawos un gin ga lthwau-gīgāashang ! dalung kwotagulthses altha. Wēt dalung khas un gin ga lthwau-gīgā-ashang ! dalung kogun-inas gien ishin dalung saigāases altha.

26. Dalung alth tl haada wautlwon gialthin-die lasdlu, dalung un gin ga lthwau-gīgā-ashang ! ging-an tl aung-alung ga prophetga kilthgadung-as un etdang-an altha.

27. Waikian di kil dalung guduns hin lth shudang, Dalung ga hānāgādasgai lth kwoyā-dū, dalung telg ga kensgai un lth lā-ū,

28. Dalung ga lānūs-gai ā lth gusbou lā shū-dū, dalung ga dāagudans sing lth gushū.

29. Dung kunsut nung shkwudasdlu, inawē ishin lth la gwī ēlthda ; waigien kōdats chi-kōnas dung sta nung isdasdlu, akwon lth kōda-dsai ishin ung-a il isdada.

30. Dung alth gin ga tl kiānuns wautliwon ga lth gin isda ; waigien gin dung dāas dung sta nung isdasdlu lth, gum silthgang ginung-ung.

31. Waigien tliku dalung un tl etgai da dalung guduns ging-an lth tla un etū.

32. Dalung ga kwōyādasgai swonan dalung kwoyādasdlu, ging-gang-an ū ēdung, ga dā-ung-asgai ishin tl kwoyādasdlu, gai ishin tl kwoyādagung-us altha.

33. Dalung un ga lasgai swonan un dalung lasdlu, ging-gang-an ū ēdung, ga dāung-as-gai ishin ging-ān ēlung-us altha.

34. Waigien dalung ga ga giashou-ashang dalung guduns swonan dalung gia-shildadasdlu, ging-gang-an ū ēdung; ga dāung-asgai ishin ga dāung-asgai gia-shildadagung-gung, housen silthgang tl da-ēlē una.

35. Dalung ga hānāgādasgai lth kwoyādu ang-a tla un lā-ū, ishin lth tl gia-shildadū, gum lth kai-inslang-ū; waigien dalung gia gia-shougai euon-shang, waigien sha āgwī Nung ets gitalung ū dalung isisang; gum ga kil-lansgai isgien, ga dāung-asgai ishin un il kung-gudung-as altha.

36. Tla kalthshint lth gudung-ū, dalung Aung tla kalthshint gudung-guns ging-ān-a.

37. Waigien lth gum tu-ging-kilisalung-ung-ū, waigien dalung ishin gum tl ging-kilisalung-ung-ashang; gum lth tl tlū-unshkotalthang-ū, waigien gum dalung ishin tl tlū-unshkotalthang-ashang; tla kalthshint lth gudung-u, waigien dalung kalthshint ishin tl gudung-ashang;

38. Tla ga lth gin isdu, waigien dalung ga ishin gin tl isdāashang; gin kwīdie las isgien, iug-gu tl-duldung-as ishin, gīdias ishin, wau sta kou-ūdas ishin, dalung shkeu ai tl isdāashang. Tliku tla un gin dalung kwīdas ging-an dalung un ishin tl kwīdāases altha, hin Jesus shouon.

39. Waigien kēgang alth ishin tla ā il gu-shouon, Ga hang-kagasgai gu ga hang-kaga

al-istal-lthing-a? gum gu tl stung-hun gin hēla ai hāwīdsang-ashā-ūsh?

40. Nung disciple-ga gum itlagīdang telg ēdung-ung-gung; nung un gin shkot-ilthdaslu tlou, itlagīdang ging-an etishang.

41. Gushintlou dung kwai hung-i ā shkelgī-ishguns dung khatsgīdung, waigien dung hung-i ā tlimīt isis tlou gum un dung ūnshidang-gung?

42. Di kwai is, dung hung-i ā shkel-gī-ishguns wan sta dang-a di isdada, gushintlou hin kwai-ung dung shudalthing-āgung, waigien dung hung-i ā tlimīt isis gum dung keng-ung-gung? Dung gudung-ai stung-gung! hung-ung sta lth tlimadai dang-tlagang, waigien itan dung kwai hung-i ā shkelgī-ishguns tlāalgwī dang-gai un dung hung-ā kang-ūlā-gulthshang.

43. Gum gin lthkai lā gut ān dāung-a inastlagung-ungsi altha; gin lthkai dāung-a gut ishin gum ān lā inastlagung-ung-gung.

44. Gin lthkai wantliwon ānē alth un tl ūnshidung-us altha. Gum gin lthkai ki sta tl hāada fig isdagung-ung-gung, gum gin lthkai ki sta ishin grape tl isdagung-ung-gung.

45. Nung hāada lā il gudung-ai ā gin kwōyā lā isis sta gin lā isdagung-gung; nung hāada dāung-a ishin gin kwōyā dāung-a sta gin dāung-a isdagung-gung; gin alth il gudung-ai stā-ū-gas sta gin unsta il shugung-us altha.

46. Shalana, Shalana, gushintlou hin di dalung kyādas gien waigien gum tliku lth shūs ging-an dalung waugung-ung-gung ?

47. Nung-hun di un katlas gien, di kil il guduns gien, ishin ging-an il wausdlu, tliku il ets dalung lth kendāashang ;

48. Nung ilthing-a nuh tloulthas gien, chānga il lthaidas gien, tish ing-gu kwau-wong-ai il kwūnlthin-gadaian ging-ān-ū il ēdung ; waigien tlistleuon untlai kāgan gien, nai ai kwah-odāwon-dlu, gum ū ging-yilthdalthing-ang-an ; tloulthic lāgani altha.

49. Waigien di kil nung guduns gien, gum ging-an il wau-unsdlu, nung ilthing-a kwau-wong-ai ādan tligai ing-gu nuh tloulthaiian ging-an ū il ēdung ; waigien ai kwau-odāwon dlu, hawīdan hūndsaiian, waigien nai yenkien gāwon, hin Jesus shouon.

## Chapter 7.

**T**L haada geu gu il gushu-elthdaiian dlu, Capernaum ai il kudsaiian.

2. Waigien nung centurion-ga gītsadang kwōyādaian stigan gien kotulthdalan.

3. Waigien tlistleuon Jesus alth gialthing-e il gudang-andlu, Jews haada k'ēas la ā il kilistīidan, waigien il gītsada il kogundie da la alth il kiānang-an.

4. Waigien tlistleuon Jesus un il istla-āwon-

dlu, kwunan la alth il kiānung āwon, Adshi la un dung isdie un il lāgung ;

5. Itil gia gwai-gang-ai il kwōyādas gien, la kodan ishin itil gia synagogue-nagai tlou-lthagun altha, waigien hin il shu-āwon.

6. Waigien Jesus la alth kaidāwon. Waigien tlistleuon nai un il dōng-ēlandlu, nung centurion-gas tou-alung la ā kilistiīdan, waigien hin la il shudāwon, Shalana, gum lth gudung-ung lthkwīdadang ; di kwulth dung kudsie un gum di lāans altha ;

7. Althji althū ltha kodan dung ā kogai un gum di lā-ung-ung lth gudung-gun ; hing-an lth gushu, waigien di gītsada ngīstlāashang.

8. Di un ishin tl itlagadas altha, waigien di ishin soldier haade un itlagadāgung ; waigien, Kaidltha, hin nung swon lth shudasdlu, il kaidung-gung ; Halūt, hin ishin nung swon lth shudasdlu, il katlagung-gung ; Adshi lth isdi, hin ishin gītsadang lth shudasdlu, il isdagung-gung, hin il shu-āwon.

9. Waigien tlistleuon Jesus adshi gudang-andlu, la un il kuldung-āgan, waigien ga shkūla la dla istals gwi ung-a il ddisdlaian, Israel haade shu-hun gum hin nung yetdatljū lth keng-ung-gun dalung ga lth shudang, waigien hin tla il shudaian.

10. Waigien ga il kilistiīdan-gai nai gwi silthgang stēlan, waigien nung gītsadas ligulths il keng-āwon.

11. Waigien gum jīng-ang-gundān Nain hin lana kyā ā il kaidan ; waigien lagia disciplesgai isgien tl shkūl-euon ishin la alth ijan.

12. Waigien ilnagai keu-e un il dōng-ēlandlu, nung kotalā tl ādlāwaugan, waigien tlan la swonan il ou kaian gien, il ou dliangan ; waigien ilnagai haade kwon la alth ijan.

13. Waigien Shalana il kang-andlu, la kalthshint il gudang-an, Gum lth sailthang, waigien hin la il shudaian.

14. Waigien āanan il katlagan gien, gin alth la tl abgundals ing-gu il tl-dulthdaian, waigien ga abgundalan-gai tljūgiāagan. Nung itan-inās, kalthultha, hin dung lth shudang, waigien hin il shouon.

15. Waigien nung kotulāgan yā kou-on gien il gushu-īdan. Waigien il ou ga la il isdaian.

16. Waigien tl wautliwon lthwaugalan ; waigien Shanung-itlagadas un tl yāgudang-an, Nung prophetga euon ū itil shu isilgung, hin tl shouon gien, Shanung-itlagadas gyang haadgai keng-atlang, hin ishin tl shouon.

17. Waigien adshi alth gialthing-e Judaea tligai ashkwau-hun gut isgien, odō tliga ijan wautliwon ēt ishin lang-a king-ā-kokūstlūaian.

18. Waigien John gia disciplesgai a gin is wautliwon la ga shudaian.

19. Waigien John gyang disciples-gai stung un aiang-an gien, Shalana ā la il kilistiidāwon,

Nung katla-ung-kasas gu dung is? nung kulat ga gu talung khatsū-ash? waigien hin il shu-āwon.

20. Waigien tlistleuon tl ilthansidas la un istlagandlu, hin il shū-āwon, John Baptist dung ā itil kilistiidun, Nung katla-ung-kasas gu dung is? nung kulat ga gu talung khatsūash? hin il shugung, hin il shūāwon.

21. Althsgai ashkoshgut gūt tl sti kwon i-gien, tl stigaga ishin, hants dāung-a gi ā isisgai ishin, il tl-ligalan; waigien ga hang-kaga kwon ishin hung-i il tla-helthilthgaian.

22. Waigien hin hang-lthang la il shudāwon, Istiidultha, waigien gin dalung kens isgien, gin dalung guduns ishin John ga lth shūdū; ga hang-kagasgai ū hung-i helthilthgang, ga kwolū kōdas istalgung-gung, leprosy alth ga stisgai shkwūnagulgung, ga geudanasgai gin gudung-gung, ga kotulthgiasgai kālthougadung-gung, waigien ga kong-ushgitai-gasgai geu gu gialthang lā alth tl gushugung.

23. Waigien gum di nung gū-dāung-uns ū lā-gung, hin hanglthang la il shudāwon.

24. Waigien tlistleuon John la ā ga kilistiidan-gai istiidandlu, ga shkūlasgai ga John alth il gialthindīidan, Gūsh dalung kang-gai un ū tligunltha ā dalung istīidang? kunchich tudsou alth hu-yhilduns gwau?

25. Gūsh kang-gai un tlou dalung ijang? nung ilthing-a gin lthtuna giandas gwau?

Gwokeng, gin lā ga giandasgai isgien, tou lā ga tasgai ishin, ga king-gas gia nai ā ijung.

26. Gūsh kang-gai un tlou dalung ijang? nung prophetga gwau? Ang, nung prophetga telg āgwī nung et dalung keng-āgan dalung ga lth shudang.

27. Althunis edē ū hin kalung-āgung, Gwokeng, dung konast gitsadang lth kilkaidung, waigien dung gia keu-e dung konast il ēlth-gīdā-ashang, hin kālung-āgung.

28. Tl jāada ga kaiwosgai shū gum John telg nung edang-gung; waikian Shanung-itlagadas gia kingdomgai gu nung ikutsū isis hawun la telg edung dalung ga lth shūgung, hin Jesus shouon.

29. Waigien tl haada wautliwon isgien, gia-shouganung-lēalung ishin, tlistleuon tl gudang-andlu, Shanung-itlagadas tl yetdaian, Johu gia baptism-gai alth tl baptize-diāgan altha.

30. Waigien Pharisee haade isgien, tukung-go-gang-lēalung ishin, Shanung-itlagadas kil ga gwou-aian, waigien gum tla il baptize-dang-an.

31. *Waigien Jesus hin tl shudaian*, Gūsh ging-an ū wēt hāade lth etdāashang, waigien gūsh ging-an ū tl ēdung?

32. Gyā gu tl wahdas gu tl ākutila tlō-wons gien, gūt ga kiāgang-guns ging-an tl ēdung; Dalung un talung hūking-ang-gun, waigien gum dalung hyalthang-gun; talung kilthdsū-



gun, waigien gum dalung saigang-gun, hin tl shugung-gung; āū tliku wēt haade ishin ēdung.

33. John Baptist katlagundlu, gum la ga tā-ung-gīni, wine ishin gum il nīlthang-gīni; waigien hants dāung-a la ā ising dalung shugun.

34. Nung haada Git katlas gien, il lthdanū-gung-gung; waigien nung ilthing-a kwotaga isgien, wine-nēlēga ishin, giashouganung-lē-alung isgien ga daung-asgai tou-i ishin il ising dalung shugung!

35. Waigien nung kutung-as gitalung wau-tliwon il kutung-as kendagung-gung, hin Jesus shouon.

36. Waigien Pharisee haade swon la alth il lthdanūe da il gudang-an. Waigien nung Pharisee haadas kwulth il kudsaiian gien, lthdanūe un il kou-on.

37. Waigien ilnagai gu nung jada ijan dāung-aiian; waigien nung Pharisee haadas gia nai ā il lthdanūs un il ūnshidalandlu, tō alabaster kulg ā ijan il shkugang-an,

38. Waigien il stai sha il giāagan gien il sailthai-an, waigien il stai hung-ung hou alth il tilthdīidan gien, kuts-ung alth lang-a il gīshouon, waigien il stai il shkwuntlaiian gien, tō alth lang-a il tōdaian.

39. Waigien nung Pharisee haada la un aiang-an kang-andlu, hin il gudang-an, Anung

ilthing-as prophetgasdlu, tliku nung jada et la ing-gu tl-dulthdas un il ūnshit-lthing-ā-gan, il daung-as altha, hin il gudang-an.

40. Simon, dung ga gin shudie da di gudung-gung, waigien hin Jesus hanglthang il shudaian. Di ga lth shudi, nung itlagadas, waigien hin il shouon.

41. Waigien Jesus hin il shudaian, Nung giashildadalēga tl stung giashildadaian; nung swon pence hundredgai tlēlth shildaian, nung swon gia ishin tlāale-tlēlthaian.

42. Tlistleuon gin alth la ga giashoulthinge gum kang-gang-andlu, il stung-won ga il dang-āwon. Gīnasū il kwōyādā-dsilthiishang? hin la il shudaian.

43. Nung gia kwon wau ga il dang-an il kwōyādādsilthiishang lth gudung-gung, hin Simon hanglthang shouon. Dung gū-yetdang, waigien hin la il shudaian.

44. Waigien nung jadas gwī il kīaian gien, hin Simon il shudaian, Dung kwulth lth kudsagundlu, gum di stai un untl di ga dung isdang-gun; la tlou hung-ung hou alth di stai tīlthildagun gien, kuts-ung alth il gīshūgun.

45. Gum di dung shkwuntlang-gun; la tlou lth kudsagun sta gum hawun tlan di stai shkwūnakung-gung.

46. Gum di kuts dung tōdang-gun; la tlou di stai tō alth tōdagun.

47. Althji alth il dāung-ie kwons-kianan

lang-a ga gakung-ung dung ga lth shugung ;  
 di il kwōyād-euon-guu altha ; lthing-an nung  
 dāung-as gagakunsdlu tlou, althunis lthing an  
 tl kwōyādagung-gung, hin Simon il shudaian.

48. Dung dāung-as gagakung-gung, waigien  
 hin nung jadas il shudaian.

49. Gīshdu tl dāung-as gakung-gung? wai-  
 gien hin ga lthdanāwon-gai gudang-an.

50. Dung yetdie ū dung kogundang ; gu-  
 dung-ai dlaia alth lth kaid, waigien hin nung  
 jadas il shudaian.

### Chapter 8.

**W**AIGIEN hawīdan wau dlā lana isgien  
 lana kūtīla ai ishin il kāwong-an, wai-  
 gien tla geu gu il gushus gien, Shanung-  
 itlagadas gia kingdomgai alth gialthing-e las  
 alth tla ga il gialthindaian, waigien ga tlāalth  
 wau gu stuns-gai la alth ijan.

2. Tl jāada ilthi hants dāung-a sta isgien  
 sti sta ishin koganan, Mary Magdalele hin  
 kyāgan nung sta hants dāung-a jikwau ijan  
 isgien,

3. Joanna Herod gia nai duman kang-lē  
 Chusa hin kyāgan jā ishin, Susanna ishin, tl  
 kulat kwon ishin, la alth isāwon, waigien gin  
 il dāawos alth la da il tlāadūgang-an.

4. Waigien tlistleuon tl shkūl-euon gudā  
 ijan gien, lana wautliwon sta ishin la un istla-  
 gandlu, tla ga il kēgang-an ;

5. Nung tutl-dsālēga tutldsā un kāgwaulan ; waigien il tldsagundān, tich keu-e in kūgaian ; waigien tl tutldang-an gien, siet hetit is ū tagan.

6. Waigien tich ishin tījai ing-gut kūgaian ; waigien īnastlaiandlu, hyilgālan, gum tilthanganī altha.

7. Tich ishin gin lthkai ki shū-wit kugaian ; waigien gin lthkai kis wau alth īnastlaiān gien, ū kou-hyistlaiān.

8. Tich ishin kōi lā ai kūgaian gien, īnastlaiān, waigien wau gut hundred-gagang-an, hin il shouon. Waigien hawun ashgai il shudagundān, Gin gudung-ai un nung geu-wos lth akwon il gudunda, hin kwūnan il shouon.

9. Waigien lagia disciplesgai tliku adshi kēgang-ai etgai da la alth kiānang-an.

10. Waigien hin il shouon, Shanung-itlagadas gia kingdomgai salgagai un ūnshidai dalūng ga isdiāgung ; tl kulat tlou kēgang alth swonan un ūnshidung ; gin tl kens-kianan gum tl keng-uns gien, gin tl gudunsdlu ishin gum un tl ūnshidang-ai una.

11. Hinū kēgang-ai ēdung ; Malthē ū Shanung-itlagadas kil ijung.

12. Keu-e in ga isgai ū *Shanung-itlagadas kil* gudung-gung ; itan hetgwaulana katlas gien, tl gudung-ai sta kil il isdagung-gung, gum tl yetdans gien ishin gum tl kogun-ang-ai una.

13. Waigien tījai ing-gu ga isgai ū tlistleuon kil tl gudunsdlu, gudung-ai lā alth tl isdagung-gung; althsgai ū gum shkūshang-wau-ung-gung, waigien kwai-umdsiwon tl yetdagung-gung, waigien tlistleuon tl edē tl kil-kensdlu tl dl-dul-dung-gung.

14. Waigien gin lthkai kis shūwī ga kū-gasgai ū guduns gien, hawun tl istiitudān gudan lthkwīda isgien, ginlthing-a ishin, adshi henung-gai gudung-ai ligai ishin ū kou-hyis-tlagung-gung, waigien gum wau gut ānē ālins-tlagung-ung-gung. .

15. Waigien kōi lā ā ga isgai ū gudung-ai yā alth isgien, gudung-ai lā alth ishin, kil guduns gien, duman ū keng-euon-gung, waigien gudung-ai tladsga alth ān tl īnastldagung-gung.

16. Waigien nung haada kasodou ōgulthdasdlu, gum kēlthga hetgwī il isdagung-ung-gung, ishin gum tidan hetgu il isdagung-ung-gung; kasodou keusi ing-gu tlou il isdagung-gung, ai ga isdsasgai wantliwon otgagai kang-gai una.

17. Gin saldas wautliwon kang-gēlthses altha; waigien gin salgas wautliwon un tl ūnshits gien, ishin otgagai ā isisang.

18. Althji alth lth tliku gin dalung guduns duman keng-ū; gin nung dāas ga gin isdiāases altha; waigien gum gin nung dāansdlu, gin il dāung il guduns-hun la sta isdiāashang, waigien hin il shouon.

19. Waigien il ou isgien il dōnalung ishin la un istlagan, waigien tl shkūlas alth gum tliku la ā il et-waulthing-e kang-gang-an.

20. Dung ou isgien, dung dōnalung ishin kyā tljūgiang-gung, waigien dung kang-gai da il gudung-wong, waigien hin la ga tl shouon.

21. Shanung-itlagadas kil ga guduns gien, ging-an tl ets ū di ou isgien, di dōnalung ishin ijung, waigien hin hanglthang tla il shudaian.

22. Waigien althsgai sing-ai swon gut lā isgien, lagia disciplesgai ishin, kontlū gwē istligan; Shū-ē telg talung tlū-kātusdsun, waigien hin la il shudāwon; waigien il tlū-kaidāwon.

23. Waigien il hū-istalūgun-dan il kotīgan; waigien shū-e ā tudsou otōtalan; waigien otan wau kwon-ilths gien, il hastl-dalāwon.

24. Waigien la un il istla-āwon gien, lā il tla-shkināwon, Nung Itlagadas, nung Itlagadas, itil gudalgung, waigien hin il shuāwon. Waigien il shkinaian gien, tudsue isgien aiawe ishin il stidaian; waigien gū-ēlan gien, dlaiadan.

25. Gitlanu dalung yetdie ijung? waigien hin la il shudāwon. Waigien il lthwaugāwon gien il kuldung-āwon, Gishdu ā ijung, tudsue isgien aiawe ishin il shudas la kilth ging-an ēdung? waigien hin gu il shudāwon.

26. Waigien Gerasene haade gia tligai, Galilee hanltha ijan, gu il tlū-katla-āwon.

27. Waigien tlistleuon il k̄aalandleu, nung ilthing-a ā hants d̄aung-a ijan ilnagai sta la un katlagan; waigien j̄ing-a gum gin giandalthing-a il giandang-an, ishin gum nuh ā il n̄aang-an, shalthung-nai ā tlou il n̄aang-an.

28. Waigien tlistleuon Jesus il kang-andlu, il sailthaiian gien, la hetgu il t̄igūstlū-aiian, Gūshāku di un dung katlang, Jesus, Shanung-itlagadas sha āgwī isis Git ū dung ijung? Gum di dung whaugung-dang-ai da dung alth lth kianung-gung, waigien hin kwūnan il shouon.

29. Hants gum shkwunans nung ilthing-as sta il kil-k̄āgwulthāgan altha. *Nung hants d̄aung-as* il gits-gilthdagigang-an altha; waigien la ā tl lthotsagang-an, waigien stakwungulthda isgien yads alth ishin la tl k̄ēchgū-waudagang-an; waigien gin alth il k̄ēchgūwos ai il hyitidang-an, waigien hants d̄aung-as tligunltha ā il ging-k̄āgang-an.

30. Gushinū dung kyang? waigien hin Jesus la alth kianang-an. Legion, waigien hin il shouon; hants d̄aung-a kwon la ai ijan altha.

31. Waigien gum hetgwaugai ai tla il kil-istiidang-ai da la alth tl kianang-an.

32. Waigien gaigu gwoshou kwon tldāwē ing-gut lthdanū-whūndalgang-an; waigien gwoshougai k̄althi ai tla il kil-itsgai da la alth tl kianang-an. Waigien il lādaian.

33. Waigien hants dāung-as anung ilthing-as sta is gien, gwoshou-gai kālthi ai ijan ; waigien gwoshou-gai stulai hunsta kūstalan gien, shu-e ai kūjang-gaian, waigien okētūgaian.

34. Waigien tlistleuon gwoshou-gai ga lthdanū-dagang-an-gai tliku gin ets kang-andlu, tl kūstaiian, waigien ilnagai gu isgien, ilnagai kiāgust ishin unsta tl shouon.

35. Waigien tliku gin edan tl keng-tlāwau-gan ; waigien Jesus un tl istlagan, waigien nung ilthing-a hants dāung-a sta ijan gin giandēlan gien, kudung-ēlan gien, Jesus hetgu kou-os tl kang-an ; waigien tl lthwaugalan.

36. Waigien tliku hants dāung-a nung ā ijan ligalan ga kang-an-gai tla ga shudaian.

37. Waigien Gerasene hāade gia tligai gu ga ijan wautliwon tla sta il itsgai da la alth tl kianang-an ; tl lthwaug-euon-an altha ; waigien kontlū gwē il katlīgan gien, il stēlan.

38. Hants dāung-a nung sta ijan tlou la alth itsgai da la alth il kianang-an ; waikian la il killkaidan,

39. Gyang nai gwī lth stīlth, waigien tliku Shanung-itlagadas gin euon dung un isdagun unsta lth shū, waigien hin il shouon. Waigien il kaidan gien, ilnagai ashkwau-hun gut tliku gin euon Jesus la un isdaian alth il gialthindaian.

40. Waigien Jesus silthgang stēlan gien, ga shkūlasgai la alth gudung-ai lāgan ; la keu tl et-ōdson-on altha.



41. Waigien nung ilthing-a Jairus hin kyāgan katlagan, synagogue-nagai un il itlagadāgan; waigien Jesus hetgu il tīgūstlū-aian gien, lagia nai ai il kudsie da la alth il kianang-an;

42. Il gūjang-a swonshang-an da tuda tlāalth wau gu stang-an kotulthdalan altha. Waigien ā *Jesus* kāgandlu, la odō gu tl hyitsgut-euon-an.

43. Waigien nung jada tuda tlāalth waugu stung lthū ī sta aian, waigien gin il dāgan wautliwon tla-hyildālē ga il isdaian gien, gum tliku la tl tl-ligal-lthing-e kang-gang-an,

44. La dsigā katlagan, waigien gin il gianaian kiai il gitsgīlthdaian; waigien hawīdan il lthu ī sta aian tlan-ēlan.

45. Gīshdū di tl-tlang? waigien hin Jesus shou-on. Waigien tl wautliwon ga kudaiandlu, Nung Itlagadas, tl shkūlas dung odō gu hyitsgīdung, hin Peter isgien la alth ga ijan ishin shouon.

46. Di nung tl-tlagun, dugwīa di sta ijun un di ūnshidun altha, waigien hin Jesus shouon.

47. Waigien tlistleuon nung jadas gum salgans kang-andlu, il katlagan gien, il dlūdaian gien, la hetgu il tīgūstlū-aian, waigien tl haada wautliwon hang-gu gin agunan la il tl-tlaian gien, tliku hawīdan il ligalan ishin unsta il shouon.

48. Di gūjang-a isis, dung yetdas ū dung

tl-ligulgung; gudung-ai dlaia alth lth kaid, waigien hin la il shudaian.

49. Hawun il gushugundān, synagogue-nagai un nung itlagadas gia nai sta nung katlagan, Dung gūjang-a kotulgung; gum lth nung Itlagadas gudung-ai lthkwidadang, waigien hin il shouon.

50. Waigien Jesus gudang-andlu, Gum lth lthwaugang; hing-an lth yetdi, waigien il ligulthshang, hin hanglthang il shudaian.

51. Waigien tlistleuon nai un il katlagandlu, gum nung haada kotdung ai il kudsadang-an, tlan Peter isgien, John ishin, James ishin, waigien nung ā-jadas hāt ishin, waigien il ou hunisun kotdung ai il isdsadaian.

52. Waigien tl wautliwon saigaian gien, tl kilthdsāwon; Gum lth saigang-ū, gum il kotulthans altha, lā ū kotdang, waigien hin il shouon.

53. Waigien la un tl kah-euon-an, il kotalan un tl ūnshidan altha.

54. Waigien il stlai lang-a il gitsgilthdaian gien, la ga il kiāgang-an, Nung ā-jadas, kālthūltha, waigien hin il shouon.

55. Waigien il althandai la gwī stēlan gien, hawīdan il kālthā-won; waigien gin tālthing-e la ga il kil-isdaiian.

56. Waigien il yāalung kuldung-āgan; waigien tliku gin edan gum nung swonshung-gahun la il shudalthang-āwon.

## Chapter 9.

**W**AIGIEN ga tlāalth wau gu stuns-gai un il ai-ang-an, waigien hants dāung-a wautliwon un isgien, sti tla-ngīstlie un ishin dugwīa la ga il isdāwon.

2. Waigien Shanung-itlagadas gia kingdom-gai alth tla geu gu il gushū-awe un isgien, tl stis il tla-ngīstlāwe un ishin, la il kil-istīidāwon.

3. Waigien hin la il shudāwon, Dalung istīidsdlu lth gum gin isdang-wong, tushka isgien, gwau-alth ishin, shibli ishin, dāla ishin lth gum isdang-wong; kōdats chi-stung ishin lth gum isdang-wong.

4. Waigien nuh ai dalung isdsasdlu lth, sta dalung istīidai keu ā nā-ung-wong.

5. Waigien gum dalung tl isdsadansdlu, tlistleuon ilnagai sta tlang-a dalung istīidsdlu lth, stang sta kōi-e giidwong, tla hanltha witness-gagai una, waigien hin la il shudāwon.

6. Waigien il istīidāwon, waigien lana ai il istalgung-āwon gien, gialthang las alth tla geu gu il gushu-āwon, waigien tliidan tla il tligulthūgang-an.

7. Waigien Herod nung tetrarch-gas tliku gin edan wautliwon gudang-an; waigien il gudung-ai lthkwīd-euon-an, John kotal sta kālthū-ung tl ilthi shouon altha;

8. Elijah tl kang-ung tl ilthi ishin shouon;

tlidlu ga prophetgagan swon kālthū-ung tl kulat ishin shouon.

9. John kuts wau sta lth shkiketlaguu : gīshd edē tlou hin gin et lth gudung-gung ? waigien hin Herod shouon. Waigien il kang-gai da la il gudang-an.

10. Waigien ga apostlesgasgai tlistleuon silthgang stēlandlu, tliku gin il edāwon la ga il shudāwon. Waigien la il isdāwon gien, lana Bethsaida hin kyāgan ā la alth il kaidāwon.

11. Waigien ga shkūlasgai un ūnshidalandlu, la dla tl istiīdan ; waigien tla alth il gudung-ai lagan gien, Shanung-itlagadas gia kingdomgai alth tla ā il gushouon, waigien ligulai da ga gudunggai il tl-ligalan.

12. Waigien sing-i-aian ; waigien ga tlaalth waugu stunggai istlagan gien, Ga shkūlasgai lth kil-istiīd, waigien lana isgien, tliga odō is ishin, ā tl istiīds gien, gu nuh ā tl isis gien, tou tl isdie una ; adlun tligunltha talung isis altha, waigien hin la il shudāwon.

13. Dalung lth tl lthdanūdū, waigien hin la il shudāwon. Shibli kū-tlēlth swonan talung dāung, shkolthung stung ishin ; tla un tou talung dahwodlu tlou, tla dlū ēt-lthing-āgung, waigien hin il shu-āwon.

14. Tl ilthansida thousandgai tlēlth dlu edan altha. Tlāale tlēlth ā lth gut alth kil-tlā-ū-dalū, waigien hin gyang disciplesgai il shu-daian.

15. Waigien ging-an il wau-āwon gien, tl wautliwon il tlā-ū-dāwon.

16. Waigien shibligai kū tlēlth isgien, shko-lthung-ai stung ishin il isdaian, waigien shi ga il kēilthaian gien sing il kil-lāgan, waigien ai il ginanang-an ; waigien gyang disciplesgai ga il isdaian, ga shkūlasgai hetgu il isdāawe una.

17. Waigien tl lthdanāwon gien, tl skisū-ōdsou-on ; waigien kwōkung-awe wau siliā ijan gudā tl isdaian gien, basket a-tlāalth wau gu a-stung sta-hāwon.

18. Waigien la swonan singlthgang gu-shouondlu, lagia disciplesgai la alth ijan ; Gīshdū di ising ga shkūlasgai shugung ? waigien hin la alth il kianung-āwon.

19. John nung Baptistgas-a ; tl ilthi ishin Elijah dung ising shugung ; waigien tl ilthi ishin tlidlu ga prophetgagan-gai swon kālthūs dung ising shugung, waigien hin hanglthang il shūāwon.

20. Gīshd tlou di ising dalung shugung, waigien hin la il shudāwon. Shanung-itlagadas gia Christgai ū dung ijung, waigien hin Peter hanglthang shouon.

21. Waigien la il stidāwon gien, gum nung haada ga adshi la il shūdalthang-āwon ;

22. Waigien hin il shouon, Nung haada Git gin shing-idsa kwon āndung-ashang, waigien ga kēasgai isgien, liplēt un ga itlagadasgai

ishin, tukālung-lē-alung ishin la ga gwou-wau-ashang, waigien la tl tīāashang, waigien shin lthonulthsdlu il kālthū-ashang, hin il shouon.

23. Waigien hin ishin tl wautliwon il shudaian, Di dlā kagai da nung gudunsdlu, agung il chāa-gudang-das gien, shantlan wautliwon shkau-a-magai ung-a il shkeulthgaguns gien, di dlā il kagai ū lagung.

24. Hēnung-gang kogundie da nung gudunsdlu, il gūdāases altha; di agunan hēnung-gang nung gudasdlu tlou, ung-a il kogundā-ashang.

25. Gūshū nung haada gwī kāalung, hētligai ashkwau-hun la gwī kāalths gien, agung il gudasdlu-a?

26. Di alth isgien, di kil alth ishin, nung ēdasdlu, la alth ishin nung haada Git ēdā-ashang, tlistleuon gyang unyāgudung-gai isgien, nung Aung-as unyāgudung-gai ishin, angels las unyāgudung-gai dung-alth ishin, il katlasdlu-a.

27. Waigien yenkien dalung ga lth shugung, Adlun ga tljūgians ilthi, Shanung-itlagadas gia kingdomgai kang-gai keu, gum kotulthga-swonung-ung-ashang, hin tl wautliwon il shudaian.

28. Waigien adshi il shudaian sta shin stan-shang-a ēlandlu, Peter isgien, John ishin, James ishin il isdaian, waigien singlthgang il gushue un tldāwe gwī il kulthaian.

29. Waigien hawun singlthgang il gushugundān, il hung-i āda ēlan, waigien gin il giandaiān otgālan gien, ā dsū-i-hung-i-āgan.

30. Waigien tl ilthansida stung la ā gushouon, Moses isgien Elijah ishin ū ijan;

31. La unyāgudung-āwos kang-gas gien, Jerusalem gu il kotalang-kasas edē il kāūgāwon.

32. Waigien Peter isgien, la alth tl ijan ishin, kung-ā-euonan; waigien tlistleuon il shkin-jēlthā-wondlu, la un yagudung-as isgien, tl ilthansida stung la kwulth tljūgians ishin il keng-awon.

33. Waigien la sta il istīdūgundān, hin Peter Jesus shudaian, Nung Itlagadas, adluu talung itsgai ū lāgung; giang-ū-nai tī-ltho-nulth talung tloulthadsun; tī-swon dung un isgien, tī-swon Moses un ishin, tī-swon ishin Elijah un isisang, hin il shouon; waigien gum tliku il shūs un il ūnshidang-an.

34. Waigien hawun adshi il shudagundān, yanung-ēlan gien, la ga saldāwon; waigien yanung-ai ai il isāwondlu, il lthwaugāwon.

35. Waigien yanai sta kil ijan, Di Git ū ā ijung, nung lth gwūlas-a; il kil lth gudung-ū, waigien hin kil shouon.

36. Waigien tlistleuon kil ijandlu, Jesus swonan gu ijan. Waigien il kwūlgundāwon gien, gin il keng-āwon wautliwon gai nūt gum nung hāada ga il shudang-āwon.

37. Waigien waudālēkw tldāwe sta il istal-lthāwondlu, tl shkūl-euon la un istlagan.

38. Waigien nung ilthing-a shkūlie shu sta kiā-gang-an gien hin il shouon, Nung Itlagadas, di git dung kang-gai da dung alth lth kianung-gung ; tlan di git swonshuns il isis altha ;

39. Waigien hants ū il isdas gien, umlthīstan il kung-adagung-gung ; waigien la il ging-kē-ū-nuns gien, il helthi ai sta sōlū ijung-gung ; waigien la sta kāstie-jīng-as gien, ishin ung il kedligadang-euon-gung-gung.

40. Waigien wausta tl dang-gai da dung-gia disciplesgai alth lth kianung-gun ; waigien ā il dsigī-ū-gun, hin il shouon.

41. Gūdistā kang-gai gum yetdang isgien, geujia ishin dalung isis, gīsdlu dalung kwulth lth isis gien, dalung keu lth etishang ? althgwī lth gitang isdi, waigien hin Jesus hanglthang shouon.

42. Waigien hawun il kāgundān, hants dāung-as il tl-dl-dulthdaian gien, il kē-ū-nung-euonan. Waigien Jesus hants gum shkūwunans stidaian gien, nung ilthing-a kutsūs il tl-ligalan, waigien aung-ung ga silthgang la il isdaian.

43. Waigien Shanung-itlagadas unyāgudung-gai un tl kuldung-ā-ōdsou-on. Waigien gin wautliwon il isdaian hawun tl wautliwon unkuldung-āgundān, hin gyang disciplesgai il shudaian,



44. Adshi gushue ai duman dalung geuying-ai lāgung; nung haada Git tl haada stlai ai tl isdāases altha, hin la il shudāwon.

45. Waigien adshi gūshūe un gum il ūnshidang-āwon, waigien gum un il ūnshidang-awe un la sta salgāawon; waigien adshi gushue tliku etgai da la alth kianung-ai ga il lthwau-gāwon.

46. Waigien la shu nung itlagadawau-ases edē il kāūgīdāwon.

47. Waigien gin edē il kwulthilthāwon Jesus kang-andlu, nung ā-kutsū il isdaian gien, kwulthgang la il isdaian, waigien hin la il shudāwon,

48. Nung-hun anung ā-kutsūs di kyē agunan isdasdlu, di ū il isdagung-gung; waigien nung-hun di isdasdlu, di nung kil-kaidun ū il isdagung-gung; dalung wautliwon hang-ast nung ets itlagadas altha, hin la il shudāwon.

49. Nung Itlagadas, dung kyē alth hants dāung-a tla sta nung dans talung keng-gun, waigien la talung stidagun, gum itil alth il stung-uns altha, waigien hin John hanglthang shouon.

50. Gum lth il stidang-ū; gum dalung hanltha nung edansdlu, dalung gūst il ets altha, waigien hin Jesus il shudaian.

51. Waigien tlistleuon shi ga la tl isda-ungkasas shantlanai waudlu ēlthdalandlu, Jerusalemlē il kogai un il gudung-ai elthgigan,

52. Waigien kōnastgang gītsadalung il kil-istiidan; waigien il istidāwon gien, Samaria haade gia ilnagai swon ai il isdsāwon, la keu gin il ēlthgīdawe una.

53. Waigien la ga tl gwou-aian, Jerusalem ā kagai un il gudung-ai elthgīgan altha.

54. Waigien tlistleuon James isgien John ishin lagia disciplesgai ijan adshi kang-andlu, Shalana, sha-tligai sta das talung kil-is gien, tl ōgulai da gu dung gudung? hin il shu-āwon.

55. Waigien la gwī il kēi-āwon gien, la il stidāwon.

56. Waigien lana kulat ā il istidāwon.

57. Waigien hawun keu-e gūt il istalūgundān, Tlījan ga-hun dung kas ging-an dung dlā lth kāashang, hin nung ilthing-a swonshung il shudaian.

58. Nukudsi ū nēē dāung, siet hetit is ishin lthtelg dāung, nung haada Git tlou gum tlījan il kuts kē-ū-dalthing-e dā-ung-gung, waigien hin Jesus il shudaian.

59. Di dlā lth kā, waigien hin *Jesus* nung kulat shudaian. Shalana, kwai lth aung-ung di lthēa-wau-tlagang-di, waigien hin il shouon.

60. Ga kotulthgiasgai lth akwon ga kotulthgiasgai ung-a lthēōda, da tlou Shanung-itlagadas gia kingdomgai tla ga shudāagai lāgung, waigien hin la il shudaian.

61. Dung dlā lth kāashang, Shalana; kwai

lth giagun nai ā ga isgai ā di kil-lā-tlagang-di, waigien hin nung kulat ishin shouon.

62. Nung hāada tliga-uldsalawe gitsgilthdas gien, silthgang il kensdlu, gum Shanung-itlagadas gia kingdomgai un il lā-ung-gung, waigien Jesus hin il shudaian.

### Chapter 10.

**W**AIGIEN adshi dlā Shalana ga kulat tlāale jikwau kenstaian, waigien lana wautliwon isgien, tliga wautliwon ai ishin il kāwong-ung-kasas ā stung-ā kōnastgang il kilistiidāng-an.

2. Waigien hin tla il shudaian, Tukwūlā-euon-gung, ga lthong-gwilasgai tlou gū-kutsū-gung; althji alth lth tukwūlā un nung Itlagadas alth kianung-ū, tukwūlas ā ung-a tla il kilistiidai una.

3. Istiidūltha; ōch shū-wī lumado tl istiida-guns ging-an ū dalung lth isdang.

4. Dala gwau-ale isgien, āltliga ishin, stush-gaga ishin lth gum isdang-wong; waigien dalung istalsdlu lth gum nung haada ā kil-lā-ung-wong.

5. Waigien tliku nuh et ai-hun dalung isdsadlu, Akwon lth gudung-ai dlaia adshi nai ā isdi, hin lth shu-tlagang-wong.

6. Waigien nung gudung-ai dlaia git gu isisdlu, dalung gudung-ai dlai-e la ing-gu isi-

sang; gum gu il isansdlu tlou, dalung gwī silthgang stilthishang.

7. Waigien gai nai ā swonan lth iswong, waigien dalung ga gin tl isdas ging-an lth ta-wong; nung lthong-gwilasdlu, giashougai unga il isdie las altha. Gum lth gut giāgūst nuh ai istalung-wong.

8. Waigien tliku lana et ai-hun dalung isdsas gien, dalung tl isdsadasdlu, dalung hetgu gin tl isdas ging-an lth tā-wong;

9. Tl sti gu isisdlu lth, tl-ligulthwong, Shanung-itlagadas gia kingdomgai dalung un āanēl-gung, waigien lth hin tl shudawong.

10. Waigien tliku lana et ai-hun dalung isdsas gien, dalung ga tl gwou-osdlu lth, keue ā isāwong,

11. Waigien lth hin shū-wong, Dalung-gia ilnagai kōiē hun itil stai ga dsilthguts dalung hanltha etgai un wausta talung gīshūgung; waigien Shanung-itlagadas gia kingdomgai āanēlths un tl lth ung ūnshitwong, hin lth shū-wong.

12. Gai shantlanai ai Sodom ilnagai un shing-idsas telg, gai ilnagai un shing-idsā-ashang dalung ga lth shugung.

13. Chorazin, dung un gin ga lthwaugīgā-ashang! Bethsaida, dung un gin ga lthwau-gīgāashang! dalung shu lthong-gwila euonda ijun ging-an Tyre isgien Sidon gu ishin ijasdlu, tlidleu-un tl gudung-ai stilths gien, whausda

tl giandilths gien, aiid ā tl kouons-gaia-hung-gung.

14. Waigien tla tl ging-kilisalunsdlu, Tyre isgien Sidon un ishin shing-idsas telg dalung un shing-idsāashang.

15. Waigien dā ishin, Capernaum, shatligai ā gu dung edaltl āash? hēt ga Hades ā dung tl isdāashang.

16. Dalung kil nung gudunsdlu, di kil ū il gudung-gung; waigien dalung ga nung gwou-osdlu, di ga ū il gwou-gung; waigien di ga nung gwou-osdlu, di nung kilkaidun ga ū il gwou-gung, waigien hin tla il shudaian.

17. Waigien ga tlāale jikwausgai gudan lā alth silthgang stēlan, Shalana, hants dāung-as hun dung kyē agunan itil kilth ging-an ēdung, waigien hin il shu-āwon.

18. Waigien hin la il shudāwon, Sē-ā-ūlthda ging-an sha-tligai sta Satan dlū-is lth keng-gun.

19. Sik isgien, scorpion ishin ing-gu tudul dungai uu isgien, dalung telg nung kens gia dugwigai wautliwon telg ishin dalung lth tl-dugwiāgun; waigien gum gin hun dalung un dāung-ung-ashang.

20. Hants dalung kilth ging-an ets alth lth gum gudung-ung lādang-ū; sha-tligai gu dalung kyē kālun-as alth tl lth gudung-ung lādū, waigien hin la il shudāwon.

21. Gai ashkoshgadai gut Hants Las alth il

gudung-ai lāgan, waigien hin il shouon, Aung-a, sha-tligai isgien hēt-tligai ishin un nung Itlagadas, ga kutung-asgai isgien, gin un ga ūnshitsgai ishin sta adshi dung salgun gien, tl ākutila dung kendagun sing dung ā lth kil-lāgung; āng, Aung-a; ā ū tliku etgai dung gwūlagun altha.

22. Gin wautliwon di Aung di ga isdagun; waigien gum nung-hun nung Git-as un ūnshidang-gung, tlan il Aung swon-an-a; waigien gum nung-hun nung Aung-as un ūnshidang-gung, tlan il Git swonan la un ūnshidung, waigien nung-hun nung Git-as il kendas ū la un ūnshidung, hin il shouon.

23. Waigien gyang disciplesgai gwī il kēaian gien, hin il shū-kwolthdaian, Gin dalung kens ga kensgai ū lāgung;

24. Ga prophetga kwon isgien, ga king-ga kwon ishin, gin dalung kens kang-gai da gudang-an, waigien gum tl keng-ang-an; waigien gin dalung guduns gudung-ai da tl gudang-an, waigien gum tl gudung-ang-an, hin il shouon.

25. Waigien nung king-gogung-lēga giāagan gien, il edē il kilkang-an, Nung Itlagadas, di hēnung-a-swonung-ai un gūshū lth isdāashang? waigien hin il shouon.

26. Gushinu king-go-gung-ai ēdung? Gushinu dung lidida-tljū-ūjung? waigien hin la il shudaian.

27. Waigien hin hanglthang il shouon, Gundung-ung shashkwau-hun alth isgien, althandang dliskwau-hun alth ishin, dugwigang wautliwon alth ishin, kwulthilang wautliwon alth ishin, Shalana Shanung-itlagadas dung kwō-yādie lāgung; waigien lthū-ung dung kwōyādas ging-an dung kwulth-īt tl nāans dung kwōyādie lagung, hin hanglthang il shouon.

28. Dung kil-lthyetdang; ging-an lth et. waigien dung hēnung-āashang, waigien hin la il shudaian.

29. Il las tlou il kendie da il gudang-andlu, Gīshdū di kwulth nung nas ijung? hin Jesus il shudaian.

30. Waigien Jesus hin hanglthang shouon, Nung ilthing-a Jerusalem sta Jericho ā kāalan; waigien kwolthdālē-alung un il katlagan, waigien gin il giandas la sta tl isdas gien, la tl shkidang-an, waigien il kotulthdalsdlu la sta tl istiidan.

31. Waudlu nung liplētga gai keu-e gut kāalan; waigien tlistleuon la il kang-andlu, la hanlthīt il kā-swonang-an.

32. Waigien nung Levite-ga ishin ging-an ijan, tlistleuon un il katlagan gien, la il kang-andlu, la hanlthīt il kā-swonang-an.

33. Waigien nung Samaria hāada hawun kāgundān, giāgu il is un il katlagan; waigien tlistleuon la il kang-andlu, la kalthshint il gwaulan.

34. Waigien la un il katlagan, waigien il kosilas gwī tō isgien wineishin il giadāwon gien, lang-a il kiāwon ; waigien gyang gin tiigagai gwau la il koudaian, waigien lthdanou-nai ai la il isdaian gien, duman la il kang-an.

35. Waigien waudālēkw penny kēstung il isdaian gien, nung nuh-lēgas ga il isdaian gien, hin il shouon, Duman lth il keng-ung ; ashgai telg lē gin dung hīlūdasdlu, tlistleuon silth-gang lth katlasdlu, dung ga lth shou-ashang, hin il shouon.

36. Kwolthdālē-alung un nung katlagan un ga lthonulth istlagan-gai gīnasū la un kung-gudung-aiang dung gudung-gung ? waigien hin Jesus il shudaian.

37. La kalthshint nung gudang-an-a, waigien hin il shouon. Kaidltha, waigien lth ging-an wau, waigien hin Jesus il shudaian.

38. Waigien hawun il istalūgundān, lana a il isdsāwon ; waigien nung jada Martha hin kyāgan kwulthgang il isdaian.

39. Waigien dōn il dāgan, Mary hin il kyāgan ; althunis Shalana hetgu kou-aian gien il kil lang-a il gudang-an.

40. Martha tlou lthong-gwil-euon-an gien, il gudung-ai lthkwīdaian ; waigien la un il katlagan gien, Shalana, di dōn di swonan lthong-gwildas gu gum alth dung ai-ū-ang-ūsh ? di da lth il tlādalth, hin il shouon.

41. Waigien Shalana hin hanglthang il shu-



daian, Martha, Martha, gin kwon alth dung gudung-ai lthkwīdang.

42. Gin swonshung swonan gu stalthingā-gung; Mary gin las isdagun altha, waigien gum la sta isdiang-ashang, hin la il shudaian.

### Chapter 11.

**W**AIGIEN tliga swonshung gu singlthgang il gushouon; waigien tlistleuon tlan il shouondlu, Shalana, singlthgang gushou lth itil shkotadi, John gyang disciplesgai gin shkotadagun ging-an-a, hin lagia disciplesgai swon il shudaian.

2. Waigien hin la il shudāwon, Singlthgang dalung gushusdlu lth hin shūū, Aung-a, akwon lth kyang kwōyādi. Akwon lth kingdom-gai althgwī ga ung-a isdi.

3. Shantlan wautliwon gut lth sing gut tou itil ga isdi.

4. Waigien lth itil dāung-as kalthshint gudung; itil un ga dāung-asgai kalthshint talung gudung-gung-us altha. Waigien lth gum edē kil-kang ā itil istaldang, hin la il shudāwon.

5. Waigien hin ishin la il shudāwon, Gīshdū dalung shu tō dāung? waigien aliako la ā il kaidis gien, hin la il shudalthing-āgung, Di tō-i, shibli kū-lthōnulth lth di shilda-di:

6. Di tō-alung swon tliga jīng-a sta di un

katlas altha, waigien gum gin la lth tādā-  
lthing-e kang-gang-gung, hin la il sbuda-  
lthing-āgung;

7. Gum lth di gudung-ai kil-lthkwīdang;  
keu-e wau shkotajāgung, waigien gitalung  
dung-alth lth tīdang; gum tliku dung ga isdie  
un lth kālthoulthing-e kang-gang-gung, wai-  
gien anā nung is hin hanglthang shoulthing-  
āgung.

8. Il tō-i il isis alth ū, il kālthūe isgien, la  
ga isdie ishin ga il gwou-os-kianan, la alth il  
kianung-hunguts alth ū il kālthūs gien,  
tlistleu ga il stalthasi ging-an la ga il isdā-  
ashang dalung ga lth shugung.

9. Waigien hin ishin dalung ga lth shugung,  
Kianung-ūltha, waigien dalung ga isdiāashang;  
da lth keng-ū, waigien dalung kēi-āashang;  
shkusdagā-ūltha, waigien dalung un wau sta  
ostlāashang.

10. Tl wautliwon hun gin da kiānuns ū  
isdagung-gung; waigien gin da nung kens ū  
ū kēi-gung-gung; waigien nung shkusdagasi  
un wausta ostlāashang.

11. Dalung swon aung-asdlu, waigien il git  
shibli kūga da la alth kiānunsdlu, kwau gu  
la ga il isdāash? shkolthung da ishin il kiā-  
nunsdlu, shkolthung shoutga gu sik la ga il  
isdāash?

12. Khou da ishin il kiānunsdlu, scorpion  
gu la ga il isdāash?

13. Dalung dāung-askianan, gin lā gitalung ga isdie un dalung ūnshitsdlu, gīsdlu wau telg dalung Aung sha isis la alth ga kiānunsgai ga Hants Las isdāashang? hin tla il shudaian.

14. Waigien hants dāung-a nung ā ijan kilgāwon wau sta il dang-an. Waigien tlistleuon hants dāung-as la sta ijandlu, nung kil-gāwon gushouon; waigien ga shkūlasgai kuldung-āgan.

15. Beelzebub, hants dāung-as un nung itlagadas, alth hants dāung-as tla sta il dang-gung-gung, waigien hin tl ilthi shouon.

16. Tl ilthi ishin il edē kil-kang-an gien, sha sta gin kang-ūdsada da la alth tl kiānang-an.

17. Waigien tliku tl kwūlthilths un il ūnshidan gien, hin tla il shudaian, Tliga wautliwon gu hun gut hanltha tl etsdlu, tl hīlūgung-gung; waigien nuh tī-swonshung ā ga isgai gut hanltha ēlthsdlu, tl hīlūgung-gung.

18. Waigien Satan ishin hanlthalthgang ēlthsdlu, gushinu lagia kingdomgai dugwīatljū-ashang? Beelzebub alth hants dāung-as tla sta lth dang-ung dalung shūs altha.

19. Waigien Beelzebub alth hants dāung-as tla sta lth dansdlu, gīshd-alth-ū dalung gitalung ishin tla sta dang-gung-gung? althji alth ū dalung gitalung dalung un ging-kil-isalang-lēgāashang.

20. Ltha tlou Shanung-itlagadas stlukung-i

alth hants dāung-as tla sta dansdlu, Shanung-itlagadas gia kingdomgai dalung ing-gu isil-gung.

21. Tlistleuon nung ilthing-a dugwias tlā-wau-ānī ung-a gits-guts gien, nai duman ung-a il kensdlu, gin il dāas ū duman lang-a ēdung;

22. Waigien tlistleuon la telg nung dugwīa la un katlas gien, la il dukw-āadasdlu, tlāwau-ānī wautliwon alth il kwauguts la sta il isdas gien, ginagai lang-a il tlāadigung-gung.

23. Gum di alth nung isans ū di hanltha ēdung; waigien gum di alth gudā gin nung isdāans ū ū hagūjang-gung.

24. Nung hants gum shkwūnans nung ilthing-a sta isisdlu, tliga gu untl gū kalhgūt il kas gien, unshandsuda-danai da il keng-gung-gung; waigien gum il kēi-ans gien, Gyang nai gwī lth stīlthshang, gyā sta lth ijun ā-a, hin il shugung-gung.

25. Waigien tlistleuon il katlasdlu, lthkioudalas gien, duman gin tlīshkutung-as ishin il keng-gung-gung.

26. Itan il kaidas gien, hants la telg dāung-a jikwau il isdagung-gung; waigien ai tl isdsas gien ā tl nāung-gung-gung; waigien nung ilthing-as kwūnā il dāung-aian telg il dāung-ēdung-gung, hin tla il shudaian.

27. Waigien hawun adshi il shudagundān, nung jada shkūlie shu sta kilthgulaian, Dung nung dulthgang-an isgien, nung tlinū-e

dung tlanan ishin yenkien lāgung! waigien hin la il shudaian.

28. Āng, Shanung-itlagadas kil ga gudungien, duman ū kens tlou wautelg lāgung, waigien hin il shouon.

29. Waigien tlistleuon tl shkūlas la ā gudā ijandlu, hin il shū-īdan, Adshi gūdistā kang-gai gūdistā kang-gai dāung-a ijung; gin kang-ūdsada da tl keng-gung-gung; waigien gum gin kang-ūdsada tla ga isdiang-ashang, tlan Jonah gia kang-ūdsadagai swonan-a.

30. Nineveh haade un Jonah kang-ūdsēlan ging-an, nung haada Git ishin adshi gūdistā kang-gai un etishang.

31. Ging - kilisalang shantlanai ai ousik haade un nung queen-gas adshi gūdistā kang-gai alth giāang-ashang, waigien tla ga ēdā il idāashang; tliga jīng-ā sta Solomon kutung-as kil gudung-ai un il katlagan altha; waigien Solomon telg nung ets adlun ijung.

32. Nineveh haade ishin ging-kilisalang shantlanai ai adshi gūdistā kang-gai alth tljū-giāng-ashang, waigien ēdā tla ga isdāashang; Jonah tla geu gu gushouondlu, gudung-ung tl stīlthdaian altha; waigien Jonah telg nung ets ū adlun ijung.

33. Nung haada tlistleuon kāsōdou ōgulthdasdlu, lthē-ang kol ai isgien, kwīdou hetgwī ishin gum isdagung-ung-gung; keusi ing-gu tlou il isdagung-gung, ga isdsasgai otgagai ū kang-gai una.

34. Dung lthū un ū dung hung-i kāsōdou-waugung; dung hungi lasdlu, dung lthū dlishkwau-hun ishin otga alth stāūgāashang; dung hung-i dā-ung-asdlu tlou, dung lthū ishin alga alth stāūgāgung.

35. Althji alth otga dung ā is algagai lth keng.

36. Althji alth dung lthū dlishkwau-hun otga alth stāūgas gien, gum lthing-an algāansdlu-yenkien otga alth stāūgāashang, kāsōdou ōgai otdasdlu dung ga otgāguns ging-an-a, hin il shouon.

37. Waigien hawun il gushugundān, nung Pharisee haada kotdung il lthdanū-halan; waigien il kudsaian gien, lthdanūe un il kouon.

38. Waigien il lthdanue konast gum il stlan-dlinang-an nung Pharisee haadas kang-andlu, il kuldung-āgan.

39. Waigien Shalana hin il shudaian, Dalung Pharisee haadas sbkutlang-we kul isgien kēilth-gagai kyagūtsi ishin tla-shkwūnagung-gung; dalung kalthi tlou kwolthda alth isgien, gin dāung-a alth ishin stāūgāgung.

40. Dalung kōnuns, gum gu kyagūtsi nung tloulthaiian nāgūtsi ishin tloulthang-ūja?

41. Nāgūst gin is tl lth Shanung-itlagadas ga isdū; waigien gin wautliwon dalung un shkwūnagulgung.

42. Dalung Pharisee haadas un gin ga lth-

wau-gīgāashang! mint isgien, rue ishin, gin inastlas wautliwon ishin tich Shanung-itlagadas ga dalung isdagung-gung; ging-kilisalang isgien, Shanung-itlagadas kwōyādie ishin tlou da dalung kēshgīdung-gung; a gin isis dalung isdie lāgung, waigien ga kulat da dalung kēs'-gadai tlou gum lā-ung-gung.

43. Dalung Pharisee haadas un gin ga lthwaugīgāashang! synagogue-nagai ā aulthgahung-u tudgwau is dalung kwōyādas gien, gyāgu tl wahdasgai gu ishin dalung hung ā tl kwahgulthdie ishin dalung kwōyādagung-us altha.

44. Dalung un gin ga lthwaugīgāashang! tl lthēāwau gum kang-gans gien, tl haada ing-gut istalguns gien, gum wau un ūnshidung-uns ging-an dalung ets altha, hin la il shudaian.

45. Nung Itlagadas, hin dung shūsdlu, itil ishin dung kil-ēdāng-gung, waigien hin kinggogung-lēalung swon hanglthang il shudaian.

46. Waigien hin il shouon, Dalung kinggogung-lēgas un ishin gin ga lthwaugīgāashang! gin ken-euon tl haada dalung ging-wūnīdung-us altha, dalung tlou gum stlukuung-ung skaswonshung alth-hun tla da tlā-ēdung-ung-gung.

47. Dalung un gin ga lthwaugīgāashang! gyagu ga prophetgas lthēāwos dalung tloulthas altha, waigien dalung aung-alung ū tl tldaian.

48. Althji alth tliku dalung aung-alung

waugan un dalung witness-gas gien, dalung gwūlāgung; tla tl tldas gien, dalung ishin tl lthēāwos tloulthas altha.

49. Althji alth ū hin Shanung-itlagadas gia kutung-gai shugung, Ga prophetga isgien, ga apostlesga ishin tla ā lth kil-isisang; waigien tl ilthi tl tldas gien, ishin gin shing-idsa tl āndung-dāashang;

50. Het-tligai elthgigan sta ga prophet-gasgai wautliwon ai wausta kwah-yandaian tāa adshi gūdistā kang-gai tl tlū-unshkotdie una.

51. Abel ai wausta kwah-yandaian gien, Zachariah altargai isgien nuh kwōyas ishin yā-kosīa tl tīaiaian ai wausta kwah-yandaian ishin, tl kulat wautliwon ai wausta tl kwah-yandaian ishin tāa, adshi gudista kang-gai tl tlū-unshkotdāashang dalung lth shudang.

52. Dalung king-gogung-lēgas, dalung un gin ga lthwaugīgāashang! gin un tl ūnshit-lthing-as kikostlāwe tla sta dalung isdagun altha; dalung ū gum ai isdsa-ang-gun, waigien ai ga isdsa-ungkasagai ishin ā dalung kēigīdun, waigien hin il shouon.

53. Waigien tlistleuon sta il kāgwaulandlu tukālunġ-lēalunġ isgien, Pharisee haade ishin la hanltha ēlth-euon-īdan gien, gin kwon edē la tl ging-gūshouon;

54. Waigien gin dāung-a il shudie keu tl edang-an.



## Chapter 12.

**W**AUDLU tl shkūl-euon gudā ijan gien, gūt ing-gūt-hun tl isīdandlu, hin gyang disciplesgai il shuda-tlagang-īdan, Pharisee haade gia tlakulthdāwe sta lth ga gūtgung-ū, gudung-ai stung is altha.

2. Waigien gin salgas wautliwon kang-gelthshang; gin kwulgun-gas wautliwon ishin un ūnshidēlthshang.

3. Althji alth tliku hun algwau dalung shūs otgasdlu tl gudung-ashang; waigien nahgwau āgwī gin tl geu-i dalung shūd-kwōlth-das nas ing-gu unsta tl shu-ashang.

4. Waigien hin dalung lth shudang, di tō-alung isis, Tl lthū tl tldas gien, waudlā gum tliku tl waulthing-e kang-gans ga lth gum lthwaugang-ū.

5. Nung ga dalung lthwaugalthing-as tlou dalung ga lth shudāashang; tla nung tldas dlā hetgwaugai ai tl dang-gai un nung dugwias ga lth lthwaugū; āng, althunis ga dalung lthwaugie lang lth shugung.

6. Gum gu kwūtsagū tlēlth farthing gūstung-āgung-ung-ūsh? waigien gum swonshungga-hun Shanung-itlagadas kēshgīdung-ung-gung.

7. Waigien dalung kuts ou wautliwon kwai-indiāgung. Gum lth lthwaugang-u; kwūtsagū kwon telg dalung kwōyāgung.

8. Waigien hin dalung ga lth shugung, tl haada hang-gu di unsta nung shusdlu, Shanung-itlagadas gia angels-gai hang-gu la unsta ishin nung haada Git shu-ashang ;

9. Tl haada hang-gu di da nung kudasdlu tlou, Shanung-itlagadas gia angels-gai hang-gu la da ishin lth kudāashang.

10. Waigien nung haada Git hanltha nung gushusdlu, la kalthshint tl gudung-ashang ; Hants Las hanltha gushou dāung-a nung shudasdlu tlou, gum la kalthshint tl gudung-ung-ashang.

11. Waigien tlistleuon synagogue-nagai un ga itlagadasgai isgien, ga itlagadasgai ishin, ga dugwīgasgai bang-gu ishin, dalung tl isdasdlu, tliku hang-gang dalung shūases ai gum gudung-ung tl lthkwidadang-ūga ;

12. Tliku dalung shougai las nung Hants Las waudlu ēlthsdlu dalung shkotadāases altha, hin Jesus shouon.

13. Nung Ītlagadas, gin talung dā-ung-kashagun tīch lth di kwai di ga isdadi, waigien hin ga shkūlasgai swon il shudaian.

14. Nung ilthing-as, gīshdū dalung un di ging-kilisalang-lēgadas gien, gut āada ishin gin di tladīgālēgadaiang ? waigien hin la il shudaian.

15. Gulth-gūt-gung-ū, waigien gin ga staltha wautliwon sta lth duman agung keng-ū ; nung haada hēnung-gai gin kwon il dāas alth

gum dugwians altha, waigien hin tla il shudaian.

16. Waigien tla ga il kēgang-an; Nung ginlthing-a gia tligai gu gin kwon inastlaian;

17. Waigien odō il kwūlthalan gien, hin il shouon, Gushinū lth edāsīnī, gum tlijan gin inastlas ung-a lth isdalthing-e kang-gans altha?

18. Hin ū lth wau-ashang; corn-nagai ai ung-a lth tlinanung-ashang, waigien wau telg ga euonda lth tloulthāashang; waigien gai ā corn-gai wautliwon isgien ginagai wautliwon ishin ung-a lth isdāashang.

19. Waigien hin althandang lth shudāashang, Althandai, tuda kwon dlu gin dung un kwon-gung; gudung-ung lth wau shatusdi, lthdanū ang-a lth tlika gwūlā, hin il shouon.

20. Dung kōnuns, algwau un dung althandai dung sta isdiāashang; waigien gīshdū gudā gin dung isdagun dāashang? waigien Shanung-itlagadas hin il shudaian.

21. Ā-ū tliku nung haada ēdung, gin kwōyā kenung un gūdā il isdas gien, gum Shanung-itlagadas uu il ginlthing-ansdlu-a, hin Jesus shouon.

22. Waigien hin gyang disciplesgai il shudaian, Althji alth hin dalung ga lth shugung, Gum lth hēnung-gang ai gudung-ung lthkwīdadang-u, gin dalung tāases-a; gum lth lthūung ai ishin gudung-ung lthkwīdadang-ū, gin dalung giandāases-a.

23. Tl hēnung-gai tou telg ets gien, tl lthū ishin gin giandalthing-e telg ets altha.

24. Yelth odō lth kwülthilthū; gum gin tldsans gien, ishin gum gin tliidung-ung-gung; gum tou-nai dāans gien, ishin gum corn-nai dāang-gung; waigien Shanung-itlagadas ū lthdanūdagung-gung; hetit telg āgwī ū dalung kwōyāgung!

25. Waigien gīshdū cubit swonshung dsū-ung dsing-īlthdalthing-āgung, gudung-ung il lthkwīdadas-kianan-a?

26. Gum gin dsūdsū-hun dalung isdalthing-ansdlu, gushintlou gin āda ai gudung-ung dalung lthkwīdadagung-gung?

27. Stlukēstā odō lth kwulthilthū, tliku inastlagung-us-ī-a; gum lthong-gwilans gien, ishin gum gin lthgilgung-ung-gung; waigien hin dalung ga lth shugung, Solomon un yāgūdung-āgandlu, gum ashgai swon ging-an gin il gianda-tljū-ang-gang-an.

28. Kwulthkotajai ā kun is ū aiat kougung, waigien adalth tsanusi tl isdāashang; waikian Shanung-itlagadas gin giandadasdlu, gum gu wau telg giu dalung il giandadang-ashā-ash, lthing-an dalung yetdas-a?

29. Waigien gin dalung tāases isgien, gin dalung nīlthises ishin lth gum da dī-ing-ung-ū, ishin lth gum gudung-ung kwondang-ū.

30. A gin isis wautliwon da gwaigang hētligai gu isis da dī-ing-gung-sī altha; waigien

a gin isis ga dalung stalhas un ū dalung Aung ūnshidung.

31. Waigien lth kingdomgai da lang-a dī-ing-ū, waigien a gin isis dalung gia isilthishang.

32. Lumado gū-kutsū dalung isis, gum lth lthwaugang-ū; kingdomgai dalung ga isdie un dalung Aung gudung-ai las altha.

33. Gin dalung dāas alth giadahū-ū, waigien alth tla da tlāadū, dāla gwau-alē gum kēgēlthang-ases lth kenung un tloulthū, gin kwōyā gum tlan ēlthang-ases lth shi ga isdū, gaigu gum kwolthdale katlans gien, ishin gum stlukum gin tl-dāung-ēdung-ung-gung.

34. Gyāgu gin kwōyā dalang-a isis gu dalung gudung-ai ishin isises altha.

35. Ung dalung dl-juts gien, kāsōdou-e ishin dalang-a ōgai lāgung;

36. Waigien tl itlagīda gū-inēl lagunung-ai sta silthgang stēlgai da tl haada khatsū-gung-us ging-an lth etdu; tlistleuon il katlas gien, keu-e il shkustagasdlu, hawīdan la keu sta wau sta tl da-ostlie una.

37. Tlistleuon nung itlagadas katlas gien, il gītsādalung khatsūs il kensdlu, yenki tla un lā-gung-gung: yenkien dalung ga lth sbugung, ung il dlj-gūsdlā-ashang, waigien tl lthdanūe un tla il kil-tlā-ū-ashang, waigien il katlas gien tla alth il dai-ing-ashang.

38. Waigien shkiana-stang ai il katlas gien, shkiana-lthōnulth ai ishin il katlas gien, hi

tl ets il kensdlu, a ga gītsadasgai un yenki lāashang.

39. Waigien lth adshi un ūnshidū, ashkoshgut gūt nung kwolthdalēga katla-ung-kasas un nung nuh-lēgas ūnshidasdlu, il shkianas-gaia-hung-gung, waigien gum nai lang-a tl tla-helthilē keu il tutidlishga-ung-ahung-gung.

40. Dalung ishin lth ung elthgīdū; giadlu gum il katla-ung-ashang dalung gudunsdlu, nung haada Git katlā-ases altha, hin Jesus shouon.

41. Shalana, itil un swonan gu adshi kēgang-ai dung shudi, tl wautliwon-hun un gwau? waigien hin Peter shouon.

42. Waigien hin Shalana shouon, Gīshdū nuh duman kang-lē lā isgien ishin kutung-a ijung, il itlagīda gyang nai duman il kendas gien, time-gai waudlu ēlthsdlu tla ga il gīdie una?

43. Il itlagīda katlas gien, hin il ets lang-a il kensdlu, yenki wunung gītsadas un lāashang.

44. Yenki dalung ga lth shugung, gin il dāas wautliwon duman la il keng-iltldāashang.

45. Di itlagīda katlagai jīng-ā-gung, hin wunung gītsadas gudunsdlu flou, waigien ga gītsada ilthansidasgai isgien, ga gītsada jāadasgai ishin il shkiding-īdsdlu, waigien il lthdanū-ids gien ishin il lum-gasdlu,

46. Wunung gītsadas gum khatsū-uns gien, ishin gum time-gai un il ūnshidang-gundān, il itlagīda katlāashang, waigien la il shkīdsulth-

euon-shang, waigien gum ga lāansgai shu-wī la il isdāashang.

47. Waigien wunung gītsadas itlagidang gudung-ai un ūnshits gien, waigien gum ung il ēlthgī-dans gien, ishin gum il gudung-ai ging-an il edansdlu, la tl shkidung-euonshang ;

48. Waigien gum un il ūnshidans gien, gin agunan la tl shkidung-ai las il isdasdlu, lthing-an la tl shkidung-ashang. Waigien nung-ga-hun gin kwon isdiasdlu, la sta gin kwon ga tl stalthāashang ; waigien nung-ga-hun gin tl isda-kwonsdlu, wau telg la alth gin tl ginung-ashang.

49. Hēt-tligai ing-gu das lth kätie un lth katlang ; waigien wēt hun ōgulthsīdlu di gudung-ai lādādung-gung !

50. Baptism alth di tl baptize-die lagung ; waigien ēlthgīgai keu di gudung-ai lthkwid-euon-gung !

51. Hēt-tligai gu gudang dlaia lth isdie un lth katlang gu dalung gudung-ūsh ? Gāanū, gut hanltha tla lth tla-elgai un lth katlang dalung ga lth shugung ;

52. Adshi sta nuh tī-swonshung ā tl tlēlth naansdlu, gūt āada agung tl tlādses altha, tl lthōnulth tl stung hanltha ets gien, tl stung ishin tl lthōnulth hanltha etishang.

53. Gūt āada agung tl tlādshang, nung aung-as git-ang hanltha ets gien, nung git-as ishin aung-ung hanltha etishang ; nung ou-as

gū-jang-ung hanltha ets gien, nung gūjas ishin ou-ung hanltha etishang; nung jūnas git-ang jā hanltha ets gien, il git jā ishin jūn-ung hanltha etishang, hin Jesus shouon.

54. Waigien tl shkū'as hunisun hin il shudaiian, Tlistleuon jā-gwau yan shi ga is dalung kensdlu, Haskādalgung, hawīdan hin dalung shugung-gung; waigien wai ging-an ijung-gung.

55. Waigien tlistleuon ousik tudsūs dalung kensdlu, Tukbousda-ung-kashang dalung shugung-gung; waigien wai ging-an ijung-gung.

56. Dalung gudung-ai stuns, hēt-tligai hung isgien, sha-tligai hung ishin tliku ets un dalung ūnshidung-gung; gushintlou gum adshi timegai tliku ets un dalung ūnshidang-gung?

57. Gushintlou dalung kodan gum gin lā un ūnshidung-ung-gung?

58. Dung hanltha nung ets alth nung ging-kilisalang-lēgas ā dung kasdlu, hawun dalung istalgundān gin agunan dung hanltha il ets tlan ēlthdie dung isdagudung-euou-ai lāgung; gum ging-an dung edans gien, nung ging-kilisalang-lēgas ā dung il isdāashang, waigien nung ging-kilisalang-lēgas nung kēchitlēgas ga dung isdāashang, waigien nung kēchitlēgas kēchitnai ai dung isdāashang.

59. Gin wantliwon dung shougai keu gum tliku sta dung kāgwaulthing-e kang-gang-ung dung ga lth shugung, hin Jesus tl shudaiian.



## Chapter 13.

**G**ALILEE haade hawun gin tiiga dlāasa-gundān, gin tiigagai ai alth Pilate tl ai gu shu-wīt tla-ēlan waudlu gu tl ijan la ga alth gialthandai-an.

2. Waigien hin hanglthang tla il shudaian, Galilee haade a gin isis andang-an alth gu Galilee haade wautliwon telg dāung-aiang dalung gudung-ūsh ?

3. Gāanū; gum gudung-ung dalung stīlth-dansdlu, wai ging-an dalung wautliwon gū-ashang dalung ga lth shugung.

4. Siloam gu nuh jing ga tlāalth waugu stanshang-a gwī whōndsaiian gien kōtulthgaian gu Jerusalem gu tl nāans wautliwon telg tl dāung-ai-ang dalung gudung-ūsh ?

5. Gāanū; gum gudung-ung dalung stīlth-dans-dlu, wai ging-an dalung wautliwon gūa-shang dalung ga lth shugung, hin tla il shudaian.

6. Waigien adshi kēgang-ai alth il kēgang-an; Nung ilthing-a gia vine-lthkai kwulthkotajai ā fig lthkai lthkajāwon; waigien ān gut kougai il keng-atlagan gien, da il dī-inch-gaian.

7. Gwokeng, tuda lthōnulth gut adshi fig lthkaigai gut ān kougai da lth keng-tlagung-gung, waigien da lth dī-inch-gagung-gung; la lth shkika; gushintlou adshi kōie ishin

ging-gang-an gougā-gung? waigien hin vice lthkai duman kang-lē il shudaian.

8. Waigien hin hanglthang la il shudaian, Nung itlagadas, kwai lth housen kenēt swonshung wau gu isda, waigien la odōsi lth lthais gien, lth chinhādāashang;

9. Waigien waudla ān la gut inastlas gien, lāashang; gum la gut inastlansdlu tlou, la dung shkikāashang, hin hanglthang il shouon.

10. Waigien sabbath shantlanai ai synagogue-nagai tī-swon ā gin tla il shkotadaian.

11. Waigien nung jada tuda tlāalth waugu stan-shang-a hants alth stigan gu ijan; waigien il iskup-jāwon gien, gum tliku agung il yādalthing-e kang-gang-an.

12. Waigien tlistleuon Jesus il kang-andlu, la un il ai-ang-an, Nung jadas, stigai sta ung-a dung kogun-gung, waigien hin la il shudaian.

13. Waigien la ing-gu stlang il isdaian, waigien hawīdan il yāgalan, waigien Shanung-itlagadas ā il kil-lāgan.

14. Waigien Jesus sabbath shantlanai ai nung tl-ligalan alth synagogue-nagai un nung itlagadas kalthi-yilthdaian, waigien hin ga shkūlasgai il shudaian, Tl haada gut lthonggwilie un shin tlū-unilth ijung; althji alth althsgai shantlanai gut dalung ligulai un adlun dalung istlagai lagung, sabbath shantlanai tlou gum un lāung-gung, hin tla il shudaian.

15. Waigien Shalana hin hanglthang il shudaian, Dalung gudung-ai stuns, gum gu dalung wautliwon hun sabbath shantlanai ai mishmūsh isgien, gīūdan ishin gyagu keu-giāang-as sta ai ung-a dalung tlā-ads gien, gyagu hūtlāases ā dalung al-istalgung-ung-ūsh?

16. Waigien gum gu anung jadas, Abraham gūjang-a isis, Satan tuda tlāalth waugu stan-shang-a kēchguwadaian, sabbath shantlanai ai ai otadai lāung-ush? hin il shouon.

17. Waigien hin il shūgundān, la hanltha ga edan-gai wautliwon ēdastlaian; waigien gin unyāgudung-a wautliwon il isdaian alth ga shkūlasgai wautliwon tlika gwūlāgan.

18. Waigien hin il shouon, Gūsh ging-an ū Shanung-itlagadas gia kingdomgai ēdung? waigien gūshgū lth kha-āashang?

19. Mustard malthe skā-swonshung nung haada isdaian, tōkanai ā ung-a il tldsaiian ging-an ū ēdung; waigien inastlaian gien, gin lthkai isēlan; waigien siet hetit isis tlats ing-gut naang-gang-an, hin il shouon.

20. Waigien hin housen il shouon, Gūshgū Shanung-itlagadas gia kingdomgai lth kha-āashang?

21. Nung jada tlukulthdou isdaian gien, shibli kwīda lthōnulth ā il salau gien, ū tlu-kulth-ōdsūe keu wau ā ijan ging-an ū ēdung, hin il shouon.

22. Waigien lana isgien, lana kutila ishin

kalthgut il kāgan gien, gin tla il shkotadagang-an, waigien Jerusalem gwī ga il kāgang-an.

23. Shalana, ga kogunsgai gu gū-kutsū? waigien hin la nung shudaian. Waigien hin tla il shudaian,

24. Keu tumdala ai isdsie lth isdagudung-euon-ū; tl kwon ū ai isdsie da guduns gien, wau odō eshgāashang dalung ga lth shus altha.

25. Tlistleuon nung nuh-lēgas giāas gien, keu-e wau ung-a il da-ashgutgīsdlu, kyāgūst dalung tljūgiang-īds gien, keu-e dalung shkwū-dagas gien, Shalana, itil keu sta lth wau sta da-astli, hin dalung shū-ash-ang; Gum dalung un di ūnshidans gien, tligīst dalung is hunisuu gum un di ūnshidang gung, waigien hin hang-lthang dalung il shudāashang;

26. Dung hang-gu talung lthdanūgun, waigien keu kitadias ā ishin gin itil dung shkotadagīni, hin itan dalung shū-īdshang;

27. Gum dalung un di unshi-lang-gung, tljī sta dalung isis ishin gum un di ūnshidang-ung dalung ga lth shugung; di sta lth issū, gin dāung-a isdalēalung dalung isis wautliwon-a, waigien hin il shuashang.

28. Gaigu tl saigas gien ishin tsing-ung tl kōkou-nanung-ashang, thistleuon Abraham isgien, Isaac ishin, Jacob ishin, ga prophetgasgai wautliwon ishin, Shanung-itlagadas gia kingdomgai gu isis gien, dalung tl kyā ga dang-gas dalung kensdlu-a.

29. Waigien hēōgūst isgien, jāgūst ishin, kāūsta ishin, ousik yā sta ishin, tl istlas gien, Shanung-itlagadas gia kingdomgai gu tl tlō-wong-ashang.

30. Waigien ōtgwau āgwī ga isisgai ilthi kwūniāashang, waigien ga kwūniasgai ilthi ishin ōtgwau āgwī isisang, waigien hin tla il shudaian.

31. Waudlu Pharisee haade ilthi istlagan, Kāgwalth ang-a lth kaid, Herod dung tīie da guduns altha, waigien hin la tl shudaian.

32. Waigien hin tla il shudaian, Istiidū ang-a lth hin nukudsīgai shudu, Aiat isgien adalth ishin hants dāung-as kyā ga lth dang-wos gien, ishin tla lth tla-ngīstlā-ashang, waigien shin lthonulthsdlu di elthgīshang.

33. Waikian aiat isgien, adalth ishin, adalth dāalist ishin keu-e gut ung-a lth kogai lāgung; gum tliku Jerusalem kyāgust nung prophetga goulthing-e kang-gans altha.

34. Jerusalem, Jerusalem, ga prophetgasgai dung tldas gien, dung ā ga kil-itgas-gai ishin kwau alth dung kunlthūgung-gung! gīshīdlu shkou jada gitalung hyang hetgwī gudā isdaguns ging-an dalung gitalung gudā lth isdalthing-āgun, waigien ga dalung gwou-gun!

35. Dalung gia nai hīlūgung; Shalana kyē ā nung katlas ū lāgung, hin dalung shougai keu, gum di dalung keng-ung-ashang dalung ga lth shugung, waigien hin tla il shudaian.

## Chapter 14.

**W**AIGIEN tlistleuon sabbath shantlanai ai Pharisee haade un ga itlagadasgai swongia nai ai lthdanou un il kudsaianclu, la ā tl lthotsagang-an.

2. Waigien sti dunlthia alth nung stigan la hang-gu ijan.

3. Waigien tukung-gogung-lēalung isgien Pharisee haade ā ishin Jesus gushouon, Sabbath shantlanai ai nung tl tla-ngīstlie gu lā? waigien hin il shouon.

4. Waigien gum tl kilang-an. Waigien la il isdaian gien la il tla-ngīstlaian, waigien la il kaidaian.

5. Dalung swon gia geudanai isgien, mish-mūsh-gai ishin, untl hēla ai dlūidsasclu, gum gu hawīdan sabbath shantlanai ai sta la il dung-dlistang-ash? waigien hin tla il shudaian.

6. Waigien gum tliku ashgai hang-ga tl shoulthing-e kang-gang-an.

7. Waigien kēgung alth gia un tl ai-ang-an ga il kegang-an, tlistleuon tudsgwaugai aulthgahung-we tl isdas il kang-andlu-a; waigien hin tla il shudaian,

8. Tlistleuon gū inēl lagunung-ai un dung un nung ai-insclu, gum tudsgwaugai aulthgahung-we ing-gu tl kou-ang-ga; ging-an dung

etsdlu, dung telg nung unyāgudung-a un il ai-ins gien,

9. Waigien dalung un nung ai-ang-an katlas gien, Unis lth adlun kouda, hin dung il shudalthing-ā-gung; waigien ēdā dung-alth lth kyāgwau āgwī dung kou-ashang.

10. Waigien tlistleuon dung un tl ai-insdlu lthkyāgwau āgwī tl konga; tlistleuon dung un nung ai-ins katlasdlu, Di tō-wī, tudsgwau lth kou-i, hin dung il shudie una; wandlu dung alth ga lthdanūsgai wautliwon hang-gu dung unyāgudung-āashang.

11. Sha ung nung edasdlu, hēt ga il ēlthses altha; waigien hēt ung nung edasdlu, shī ga il ēlthshang, hin tla il shudaian.

12. Waigien la un nung ai-ang-an ishin hin il shudaian, Tlistleuon lthdanou un tla un dung ai-insdlu, tō-alung isgien, kwai-alung ishin, tō-alung yikī ishin, dung odō ga itlagada nāans ishin gum un tl ai-ing-ung-ga; ging-an dung etsdlu, gai ishin dung un ai-ing-ashang, waigien dung ga giashougēlthshang.

13. Waigien tlistleuon tla un dung ai-insdlu, ga kong-ushgitaigasgai isgien, ga tlikiasgai ishin, ga kwolū kōdasgai ishin, ga hangkagasgai ishin un tl tl ai-ing-ga.

14. Waigien dung un lāashang; gum dung ga gin alth giashoulthing-e kang-gans altha; ga lasgai kotal sta kalthougadunsdlu, dung ga giashou-gāases altha, waigien hin la il shudaian.

15. Waigien tlistleuon la alth ga lthdanou-on-gai swon adshi gudang-andlu, Shanung-itlagadas gia kingdomgai gu nung lthdanūsdlu, yenkien la un lāashang, hiu la il shudaian.

16. Waigien hin la il shudaian, Awulth nung haada tou kwon tling-alang-an gien, tl kwon un il ai-ang-an ;

17. Waigien lthdanue waudlu ēlandlu, gītsadang il kil-kaidan, Ūtlāū, gin wautliwon ēlthgīs altha, hiu giā un il ai-ang-an il shudie una.

18. Waigien tl wautliwon gut ging-an ga gwaugalan. Kwulthkotis lth dahgun, waigieu lth keng-āgai lāgung ; gum ā kogai gwī di edang-gung, hin nung swon il shudaian.

19. Mishmūsh lthong-gwila-aia tlāalth lth dahūgun, waigien la lth isdagudung-a-ung-kashawong ; gum ā kogai gwī di edang-gung, waigien hin ishin nung swon shouon.

20. Lth jadanēlgun, althji alth gum ā lth kalthing-ang-gung, waigien hin ishin nung swon shouon.

21. Waigien nung gītsadāgan katlagan gien ; adshi itlagīdang ga il shudaian. Waudlu nung nuh-lēgas kalhi-yilthdaian, Ilnagai keu-e kitadias ā lth hawun kāgwulth, waigien lth ga kong-ushgi-taigasgai isgien, ga tligiasgai ishin, ga hangkagasgai ishin, ga kwolū kōdasgai ishin althgwī isdi, waigien hin gītsādang il shudaian.



22. Nung itlagadas, tliku di dung shudagun ging-an lth waugun, waigien hawun tālāgung, waigien hin nung gītsadas shouon.

23. Waigien nung itlagadas hin gītsadang shudaian, Keu ālthas isgien, kwulthkotajai ā ishin lth kagwulth, waigien anā ga tl isdie lth isdagudung-euon-ung, nai dīna stahgai una.

24. Gia un lth lthaignun-gai swon-hun gum lthing-an giagun tou-e tā-ung-ashang dalung ga lth shūs altha, hin il shouon.

25. Waigien tl shkūl-euon la alth ijan ; waigien tla gwī il hung-āwon gien, hin tla il shudaian,

26. Dī un nung katlas gien, gum aung-ung isgien ou-ung ishin, jā-ung ishin, gitalung ishin, kwai-alung ishin, jas-alung ishin telg il keng-uns gien, gum hēnung-gang telg ishin il keng-unsdlu, gum tliku giagun disciplegai il islthing-e kang-gang-gung.

27. Gum gyang shkau-amagai nung isdans gien, gum di dlā ishin il kā-unsdlu, gum tliku giagun disciplegai il islthing-e kang-gang-gung.

28. Dalung swon nuh jing tloulthie da gudunsdlu, gum gu il kou-tlagans gien, tlistleu ai gin hīlūases il kwai-indagung-ung-ūsh, wau-  
dlu dālē lang-a etgai un il ūnshidai una ?

29. Gum ging-an il wau-unsdlu, keusi il tloulthas gien, elthgidie ā il dsigiasdlu, ga kensgai wautliwon la alth kilth-nang-īds gien,

30. Anung ilthing-as nuh tloulthiēdun, wai-

gien elthgīdie ā il dsigiigun, hin tl shugung-gung.

31. Waigien nung king-ga nung king-ga kulat un ailthda-ungkasasdlu, gum gu il kous gien, soldier haade thousand tlāalth alth ga thousand tlāalē stung dung-alth la un nung katlas un ailthdie un il dugwigai odō il kwülthilth-tlagang-gung-ung-ūsh?

32. Waigien gum un il dugwiansdlu, hawun la un nung ailthda-ung-kasas jīng-āgundān, la ā gushou il hundsūdas gien, gum la un il ailthda-ung-ai sing tlistleu gin ga il stalthe da la alth il kiānung-gung-gung.

33. Althji alth dalung swon gin il dāas wautliwon ga gum gwaugulthansdlu, gum tliku giagun disciplegai il islthing-e kang-gang-gung.

34. Tung ū gin lā ijung; tung-ai tung-hōgie gūilthsdlu tlou, gūsh alth ū gin tl tung-adāa-shang?

35. Tligai un isgien, chin-hā un ishin gum lāung-gung; hing-an tl dang-gung-gung. Gin gudung-ai un nung geu-wos lth akwon gin il gudunda, hin tla il shudaian.

### Chapter 15.

**W**AIGIEN giashouganung-lēalung isgien ga dāung-asgai wautliwon ishin il kil gudung-ai un aānan la un istlagan.

2. Waigien Pharisee haade isgien, tukālun-  
lēalung ishin gudung-ai stigan, Anung ilthing-  
as ga dāung-asgai isdas gien, tla alth il lth-  
danūgung-gung, waigien hin tl shouon.

3. Waigien adshi kēgang-ai alth tla ga il  
kēgang-an,

4. Dalung swon lumadō hundredgai dāas  
gien, swon il gūdasdlu, gum gu tlāale tlāalth-  
swonshung-gū waugu tlāalth-swonshung-gū  
tligunltha il inas gien, nung gāwon il kēie keu  
da il dī-ing-gung-ung-ūsh ?

5. Waigien tlistleuon la il kēas gien, shkeu-  
ung gwī la il isdas-dlu, tlika il gwūlāgung-  
gung.

6. Waigien tlistleuon il katlasdlu, tō-alung  
isgien, la kwulth-it ga nāansgai un ishin il  
ai-ins gien, Di alth lth tlika gwūlāū, lumadō  
dīna gūgun lth kēigun altha, hin tla il shuda-  
gung-gung.

7. Tl haada lā tlāale tlāalth-swonshung-gū  
waugu tlāalth-swonshung-gū gum gudung-ung  
stīlthdie ga stalhands telg, nung dāung-a swon-  
shung gudung-ung stīlthdasdlu, sha-tligai gu  
tlika tl gwūlang dalung ga lth shugung.

8. Waigien nung jada dāla kē-tlāalth daas  
gien, kē-swon ung-a il gūdasdlu, gum gu kā-  
sōdou il ōgulthdas gien, nai kālthi il lthkyou-  
dals gien, ung-a il kēie keu, da il dī-ing-euon-  
gung-ung-ūsh ?

9. Waigien tlistleuon il kē-asdlu, tō-alung

isgien, la kwulth-it ga nāansgai ishin un il ains gien, Di alth lth tlika gwūlāū, dāla lth gudagun ung-a lth kēigun altha, waigien hin il shugung-gung.

10. Wai ging-an nung dāung-a swonshung gudung-ung stilthdasdlu, Shanung-itlagadas gia angel-gai hang-gu tlika gwūlā ising dalung ga lth shugung, hin Jesus shouon.

11. Waigien hin ishin il shouon, Nung ilthing-a gitalung stang-an ;

12. Aung-a, gin dung dāas tich lth dāung-kashagun lth wēt di ga isdi, waigien hin nung dōnas aung-ung shudaian. Waigien gin il dāgan gut āada la ga il tlādāwon.

13. Waigien gāwun ēt-lang-gun-dān nung dōnas gin wautliwon gudā isdaian, waigien tliga jīng-a ā il kaidan ; waigien gaigu gin dāung-a il isdas ai gin il dāgan ung-a il tlahilāwon.

14. Waigien tlistleuon ung-a il tlahilūōdsou-ondlu, gai tligai gu yenki tou hīlāwon ; waigien il kong-ushgitaigēlan.

15. Waigien il kaidan gien, althsgai tligai haade swon ga il dlishgadan ; waigien gwoshou il lthdanūdie un kwulth-kotajai ā ung-a la il kil-kaidan.

16. Waigien gwoshou gin kul tas tugai da il gu-dang-an ; waigien gum nung swonshung-hun gin la ga isdang-gang-an.

17. Waigien tlistleuon aigang agung il gū-

kēidandlu, hin il shouon, Di aung gītsadalung kwon tou tas gien, wausta ishin kāwīdung-gung, waigien adlun kwit alth di gūgung!

18. Lth kālthūs gien, aung-ung ā lth kaidshang, waigien hin la lth shudāashang, Aung-a sha-si un di dāung-gun, waigien dung hang-gu ishin ;

19. Gum housen, Di git, hin di dung kyādie un di lā-ung-gung; gītsadalung swon ging-an lth di elthdi, hin la lth shudāashang, hin il shouon.

20. Waigien il giāagan gien, aung-ung un il katlagan. Waigien hawun il jīng-āgundan il aung il kang-an, waigien la kalthshint il gwaulan, waigien il odan gien, il hel ga agung il shkwōdlshgadan gien, la il shkwūntlaian.

21. Waigien hin il git il shudaian, Aung-a, shasi un di dāung-gun, waigien dung hang-gu ishin; waigien gum housen, Di git, hin di dung kyādie un di lāung-gung, hin il git il shudaian.

22. Waigien il aung hin gītsadalung shudaian, Hawīdan lth althgwī kodats lādsilthis isdū, waigien lth ai il tla-kudsū; waigien lth stlīlthū il stlai ai isdū, waigien lth stushgaga ai ishin il tl-tulthū;

23. Waigien lth mishmūsh gīti tla-ai-istlias althgwī isdū ang-a tīi-ū; waigien talung tas gien, tlika talung gwūladsun;

24. Di git isis kotulgun housen hēnanstlas

altha; il gūgun, waigien la talung kēiang, hin il shouon. Waigien tlika tl gwūlā-ēdan.

25. Waigien il git kwai-asi kwulth-kotajai ā ijan; waigien il kāgundān nai un il dōng-ēlandlu, gin tl tla-king-uns gien tl hyalths il gudang-an.

26. Waigien ga gītsadasgai swon un il ai-ang-an gien, tliku adshi etgai da la alth il kianang-an.

27. Dung dōn ū katlang, waigien dung aung mish-mūsh gīti tla-ai-istlias tiigun, silthgang duman la un il koguntlas altha, waigien hin la il shudaian.

28. Waigien il kalthe-yilthdaian gien, kudsie ga il gwou-aian; waigien il aung katla-waugan gien, la un il lthai-idsaian.

29. Waigien hin hanglthang aung-ung il shudaian, Gwokeng, tuda kwon gut dung un lth lthong-gwilgun, waigien gum dung gia king-gogung-ai ilā lth edang-gun; waigien tō-alung alth tlika lth gwūlagai un gum kim-dai gīti swonshung-hun di ga dung isdang-gun;

30. Waigien tlistleuon a dung git is, gin dung dāas jā-ung-lēalung ai tla-hilāwon, katlagandlu, mishmūsh gīti tla-ai-istlias la un dung tii-aian, hin il shouon.

31. Lthken, di kwulth dung isgīgung, waigien gin lth dāas wautliwon dung gia ijung.

32. Tlika talung gwūlas gien, ishin itil gu-

dung-ai ligai ū lāgung; a dung dōn is kotul-gun gien, housen il hēnanstlas altha; waigien il gūgun, waigien la talung kēiang, waigien hin la il shudaian.

### Chapter 16.

**W**AIGIEN ga disciplegasgai ishin hin il shudaian, Nung itlagada duman gin kang-lēga dāagan; althunis ū gin il daas ging-gang-an lang-a tla-hīlūgung-ung tl haada la ga shou-on.

2. Waigien la un il ai-ang-an, Gūsh dung isdaian ū tl shudas lth gudung-gung? lthong-gwylie tliku etsi wautliwon lth ung-a di ga shudi; gin duman dung kens tlan dung elthdie las altha, waigien hin la il shudaian.

3. Waigien duman gin nung kang-lēgas hin gudang-an, Gushinu lth etishang, tlan di itlagīda di lthong-gwildas altha? gin lthaigai un gum di dugwiāng-gung; gin ginung-ai ā ishin di ēdang.

4. Tlistleuon tlan di il lthong-gwildasdlu, gyang nai ā di tl isdie un tliku lth etses un di ūnshidung, hin il gudang-an.

5. Waigien il itlagīda alth ga gia-shildiāgan swōnā-hun il ai-ang-an gien, Gīshīdlu di itlagīda alth dung gia-shildiāgung? Hin nung swon il shudaian.

6. Kwīdou hundredgai swonshung ā tō lth

shildiāgun, waigien hin il shouon. Kōgīnē lth ung-a isda, waigien lth kou ang-a tlāale tlēlth kālunġ, waigien hin la il shudaian.

7. Gīshīdlu da ishin ġia-shildiāgun? waigien hin nung kulat ishin il shudaian. Kwīdou hundredġai swonshung ā wheat lth shildiāgun, waigien hin il shou-on. Kōgīnē lth ung-a isda ang-a tlāale stanshang-a kālunġ, hin la il shudaian.

8. Waigien duman ġin nung kang-lēġas kutunġ-ā-ġan il ītlagīda ġwūlāġan; otġagai ġitalunġ telġ adshi hēt-tlġgai ġitalunġ duman ung kang-ġai un kutunġ-as altha

9. Waigien hin dalunġ ġa lth shunġunġ, ġinlthing-a dāunġ-a alth tō-alunġ kenunġ un lth tloulthū; tlistleuon hīlūsdlu, ġiang-u-nai et swonuns ai dalunġ tl isdie una.

10. ġin dsūsū duman nung kang-ġai lasdlu, ġin kwon ishin duman il kang-ġai lāġunġ, waigien ġin dsūsū ġum duman nung kang-ġai lāunsdlu, ġin kwon ishin ġum duman il kang-ġai lā-unġ-ġunġ.

11. Althġi alth ġinlthing-a dāunġ-as ġum duman dalunġ kang-ġai lāunsdlu, ġīshdū ġinlthing-a yikī isis duman dalunġ kendāashang?

12. Waigien ġum tl kulat ġia duman dalunġ kang-ġai lāunsdlu, ġīshdū dalunġ ġa ġiu dalunġ-a isdāashang?

13. Nung ġītsada ġum tliku tl ītlagada stunġ un lthunġ-ġwilalthing-e kang-ġunġ-



gung; nung swon telg il kens gien, nung swon il kwōyā-dāases altha; gum ging-an il edansdlu, nung swon il gwūlas gien nung swon ga ishin il gwou-wau-ashang. Shanung-itlagadas un isgien, ginlthing-a un ishin gum tliku dalung lthong-gwilalthing-e kang-gang-gung, hin Jesus shouon.

14. Waigien Pharisee haade dāla kwōyādagang-an adshi wautliwon gudang-an; waigien la alth tl kilthnang-an.

15. Waigien hin tla il shudaian, Dalung ū tl haada hang-gu agung lādagung-gung; Shanung-itlagadas tlou dalung gudung-ai un ūnshidung; tl haada shu gin lā-euon isis Shanung-itlagadas un dā-ung-euons altha.

16. John katlagai keu king-gogung-ai isgien, ga prophetgasgai ishin ijan; althsgai sta Shanung-itlagadas gia kingdomgai gialthing-e alth tla geu gu tl gūshūs gien, tl haada wautliwon ai lthkwīd-hū-jandsagung-gung.

17. King-gogung-ai ā gin ltholth kutsū kuswonshung isis ging-gang-an elgai telg, shatligai isgien hēt-tligai ishin hīlūē yang-alang.

18. Jā-ung nung dans gien, nung kulat il inēlthsdlu, hing-an la alth il tīgādang; waigien jā-ung nung dans gien, nung kulat il jā inēlthsdlu, hing-an la alth il tīgādang, hin Jesus gyang disciples-gai shudaian.

19. *Waigien hin ishin Jesus shouon, Nung*

ilthing-a itlagadāgan, waigien gin ōlthulth isgien, giang-ū lā ishin il giandagang-an, waigien tou lā shan-tlan wautliwon il tāgang-an ;

20. Waigien nung kong-ushgitaiga, Lazarus hin kyāgan, keu-e ā lang-a dlūdagang-an, waigien lē gin koutljāwon,

21. Waigien nung itlagadas gia table-gai sta kwō-kung-ou kūgas tugai da il gudung-gang-an ; waigien ha istlas gien, lē gin kous tang-gang-an.

22. Waigien gum et-lang-gundān nung kong-ushgi-taigas kotalan, waigien ga angel-gasgai Abraham kun ā il isdaian ; nung itlagadas ishin kotalan waigien la tl lthēowaian.

23. Waigien Hades ā il waugang-andlu shi ga il kēilthaian, waigien wochgwau āgwī Abraham isgien, Lazarus il kun ā isis ishin, il kang-an.

24. Waigien il sailth-kiāgang-an, Aung-a, Abraham, di kalthshint lth gudung, waigien lth Lazarus di ā kil-is, undl ai stlukung-ung kwūn il isdas gien, di tong-il il tl-tutulthdie una ; adshi ōsi ā di waguns altha, waigien hin il shouon.

25. Waigien Abraham hin shouon, Lthken, dung hēnung-āgan nūt dung chāagai-lāgan, waigien Lazarus chāagūdang-gang-an ai lth kēid ; waigien wēt adlun il chāagai-lāgung, dung tlou waugung-gung.

26. Waigien adshi wautliwon ilā, itil isgien dalung ishin āadsi tligai lthdiing-ā-euon-gung, adshi sta dalung ā itsgai da ga guduns gum wai ging-an isans gien, houshgai sta ishin gum itil ā tl isang-ai una, hin il shouon.

27. Althji alth di aung gia nai ā la dung kil-kaidai da dung alth lth kianung-gung;

28. Di dōnalung tlēlthas altha; la ā il gushu-wos gien, la ishin adshi tligai gu tl wau-guns un gum istla-ung-awē una, hin il shouon.

29. Moses gia kōgīnē isgien, ga prophet-gasgai gia kōgīnē ishin il dāawong; akwon lth tl kil il gudung-dū, waigien hin Abraham shouon.

30. Gāanū, aung-a Abraham, kotal sta la ā nung kaidwodlu tlou, gudung-ung il stilthdau-wau-ashang, waigien hin il shouon.

31. Moses kil isgien, ga prophetgasgai kil ishin gum il gudung-ung-wodlu, kotal sta nung kalthūs-kianan gum il kil il yetdawau-lthing-ang-gung, waigien hin la il shudaian, *hin Jesus shouon.*

### Chapter 17.

**W**AIGIEN hin gyang disciplesgai il shudaian, Gin tl ging-dldulthdalthing-e gum tliku gū-ēl-lthing-e kang-gang-gung; nung agunan isi un tlou gin ga lthwaugīgāashang!

2. A ga ikutilasgai swon'nung ging-dldul-lthdie telg, mūl ā kwau-e il heli sta tl keukēous gien, chān ga la tl kātage ū la un lagung.

3. Duman lth agung keng-gung-u; dung dōn gin dāung-a isdasdlu, la tl stidaga; waigien gudung-ung il stlthdasdlu, la kalthshint tl gudung-ga.

4. Waigien shantlan swonshung gut dung il tloulthdāung-a-dsikwausdlu, waigien dung gwī housen il stēl-dsikwaus gien, Alth di gudung-ai stigung, hin il shusdlu, la kalthshint dung gudung-ai lāgung, waigien hin gyang disciples-gai il shudaian.

5. Talung yetdie lth wauga agung kashgada, waigien hin ga apostlesgasgai Shalana shudai-an.

6. Waigien hin Shalana shouon, Mustard malthē ska-swonshung dlu dalung yetdasdlu, Agung lth dunlth-kostad ang-a chān agung tldsada, hin a sycamine lthkai isis dalung shuda-lthing-āgung, waigien dalung kilth ging-an et-lthing-āgung.

7. Dalung swon gītsada tliga uldsulths gien, ishin lumadō duman il kensdlu, tlistleuon kwulthkotajai sta il katlasdlu, Hawīdan lth kou ang-a lthdanū, hin gu la il shudalthing-a?

8. Tou lth di un tling-ālun ang-a un dlj-gūs-tla, waigien lth lth lthdanū-ēlthgīgai keu duman di keng; waigien waudla dā ishin lthdanū-ashang, gum gu hin la il shudang-ash?

9. Nung gītsadas la kilth ging-an etsdlu gu, la ā il kil-lāgung?

10. Wai ging-an dalung ishin, tlistleuon gin alth tukung-gogung-as wautliwon dalung elth-gīdasdlu, Gītsada dāung-a ū itil ijung; gin talung isdie las swonan talung isdagun, hin tl shu-ūga, waigien hin Shalana shouon.

11. Waigien hawun Jerusalem ā il istalū-gundān, Samaria tligai isgien, Galilee tligai kalthgūt ishin il kāgan.

12. Waigien lana ai il kudsang-kashagandlu, tl ilthansida tlāalth leprosy alth stigan la un istlagan, waigien wochgwau-hun la sta il tl-jūgi-ang-āwon;

13. Jesus, nung Itlagadas, itil kalthshint lth gudung, waigien hin kwunan il shu-āwon.

14. Waigien tlistleuon la il keng-āwondlu, Istiidū ang-a lth ga liplētgasgai agung kendū, hin la il shudāwon. Waigien hawun il istalū-gundān il shkwunagulthāwon.

15. Waigien tl swon, tlistleuon il ngīstlas il kang-andlu, silthgang il stēlan gien, kwūnan Shanung-itlagadas ā il kil-lāgan;

16. Waigien il stai hetgu il tīgūstlū-aian gien, la ā il kil-lāgan; waigien lā-ū Samaria haadāgan.

17. Gum gu tl tlāalth shkwūnagulthang-ūja? gitlan tlou tl tlāalth-swonshung-gū ijung?

18. A gu tlan anung tliga kulat haadas swonan Shanung-itlagadas ā kil-lagai un

stilthūja? waigien hin Jesus hanglthang shouon.

19. Giā ang-a lth kaid; dung yetdas alth ū dung ligulgung, waigien hin la il shudaian.

20. Waigien tlistleuon Shanung-itlagadas gia kingdomgai katlagai da Pharisee haade la alth kianang-andlu, hin hang-lthang tla il shudaian, Shanung-itlagadas gia kindomgai katlasdlu, gum kang-gang-ashang;

21. Gwokeng, adlun ijung! Waudlun ijung! gum hin tl shu-ung-ashang; Shanung-itlagadas gia kingdom-gai dalung kalthi ā isis altha, hin il shouon.

22. Waigien hin ga disciplesgasgai il shudaian, Shantlanai waudlu ēlthsdlu, nung haada Git gia shantlanai swon kang-gai da dalung gudung-ashang, waigien gum dalung keng-ung-ashang.

23. Gwokeng, waudlun ijung! hin dalung tl shudas gien, Gwokeng, adlun ijung! hin ishin dalung tl shudāashang; gum tl istiidang-ūga, waigien gum tla dla tl istalang-ūga;

24. Yanai kāan ai sta sē-au-ūlthdas gien, wau hanltha ga otgēlthdalguns ging-an, nung haada Git gyang shantlanai gut etishang.

25. Waigien wau konast gin shing-idsa kwon il ānduns gien, adshi gūdista kang-gai ishin la ga gwau-gulthshang.

26. Waigien Noah nūt tliku gin edan ging-an nung haada Git nūt ishin edishang.

27. Noah arkgai ai kudsaiian shantlanai keu tl lthdanūs gien, ishin gin tl nilgang-an, ishin tl jada-nēlths gien, ishin tl lā-inēlgang-an, waigien gilthīdan, waigien tl tla-hilū-ōdsou-on.

28. Lot nūt ishin wai ging-an edan ; tl lthdanūs gien, ishin gin tl nilgang-an, gin tl dahwos gien, ishin gin alth tl giadahū-gang-an, gin tl tldsas gien, ishin nuh tl tloulthagang-an ;

29. Waigien Lot Sodom ilnagai sta kāgwau-lan shantlanai ai das isgien brim-kwau-e ishin sha-tligai sta gū-aiian, waigien tl tla-hilū-ōdsou-on ;

30. Nung haada Git kang-gēlungkasas shantlanai ai wai ging-an etishang.

31. Gai shantlanai ai nas ing-gu nung isis gien, nai ā gin lang-a isisdlu, akwon lth gin ung-a il isdie un gum il kāalthanda ; waigien kwulthkotis ā nung isisdlu, akwon lth la ishin gum silthgang stilthanda.

32. Lot jā ai lth kēidū.

33. Hēnung-gang gwīgang kāalthdie da nung guduns ū ū gudāashang ; hēnung-gang nung gudasdlu tlou, il kogundāashang.

34. Gai sing-yē ā-hun tl ilthansida stung tidan ing-gu gut alth tians gien, nung swon isdias gien, nung swon tl gūhun isisang dalung ga lth shugung.

35. Tl jāada stung gin hekogūduns gien, nung swon isdias gien, nung swon tl gūhun isisang.

36. Tl ilthansida stung kwulth-kotajai ā isisang; nung swon isdias gien, nung swon tl gūhun isisang, hin Jesus shouon.

37. Gitlānu, Shalāna? waigien hin hanglthang la tl shudaian. Giāgu tl kōt isis, gai gu ōt ishin gudung-alth gudā isisang, waigien hin tla il shudaian.

### Chapter 18.

**W**AIGIEN kēgang alth tla ga il kēgang-an, singlthgang tl gushugīs gien, gum tl ahgulthang-ai una;

2. Lana a-swonshung gu nung ging-kilis-alang-lēga ijan, waigien gum Shanung-itlagadas ga il lthwaugans gien, tl haada alth ishin gum il ai-ū-ang-an;

3. Waigien gai ilnagai gu nung dsūlthin-ga ijan; waigien la un il katla-hunsgadan gien, Di nung tloulth-dāung-gun alth di da tlāad, hin il shugang-an.

4. Waigien kwai-umdsiwun gum ging-an ūgai da il gudung-ang-an; waigien waudlā hin il gudang-an, Shanung-itlagadas ga gum di lthwaugans gien, tl haada alth ishin gum di ai-ū-uns kianan,

5. Anung dsūlthin-gas di gudung-ai lthkwidadas alth la da lth tlāadshang, waigien di un il katlagīs ai gum di ahgulthang-ai una, hin il gudang-an.



6. Tliku nung ging-kilisalang-lēga dāung-as shouon lth gudung-ū.

7. Waigien gum gu Shanung-itlagadas ga kenstaian da ung-a tlāadang-ash, shantlan wautliwon isgien al wautliwon ishin la ga tl sailth-kiāgans gien, tla un il kung-gudung-as altha?

8. Hawidan tla da il tlāadshang dalung ga lth shugung. Nung haada Git katlasdlu tl gu, il kil tl yetdas il kēi-āash? waigien hin Shalana shouon.

9. Itil ū lāgung, tl kulat wautliwon tlou dāung-ung, hin ga gudang-an-gai ga adshi kēgang-ai alth il kēgang-an;

10. Tl haada stung singlthgang gushue un temple-gai ā istal-lthaiian; nung swon Pharisee haadāgan gien, nung swon ishin giashouganung-lēgāgan.

11. Nung Pharisee haadas giāang-an gien, hin gudung-ung alth singlthgang il gushou-on, Shanung-itlagadas, gum tl haada kulat ging-an di edans sing dung ā lth kil-lāgung; tla ga ging-kōnung-gung-usgai isgien, kwolth-dālē-alung ishin, gū-inēl king-gogung-ai ga tla-lhōstagung-usgai ishin, anung giashouganung-lēgas ging-an ishin gum di edang-gung.

12. Sundiga shoshgu gut lth kēsāl-stung-gung-gung; gin lth dāēlths wautliwon tīch *templegai ga* lth isdagung-gung, hin il shouon.

13. Nung giāshouganung-lēgas tlou lthkiā-

gwau āgwī giāang-an, waigien gum shi ga kēilthie da il gudung-ang-an; hing-an kun-ung il shkwūdaian gien, Shanung-itlagadas di kalthshint lth gudung, di dāung-as altha, hin il shouon.

14. Nung swon telg *Shanung-itlagadas* unis kalthshint gudang-an dalung ga lth shugung, waigien nai ā ung-a il kāalan; shā ung nung edas ū hēt ēlthses altha; het ung nung edasdlu tlou, sha ēlthishang, hin Jesus shouon.

15. Waigien gitalung kutilas ishin la ā tl isdaian, tla ing-gu il tldulthdie una; waigien tlistleuon ga disciplegasgai kang-andlu, tla il stidāwon.

16. Waigien Jesus tla un ai-ang-an gien, hin il shouon, Akwon lth tl ākutilas di ā istaldū, waigien lth gum tla ā stugadang-ū, Shanung-itlagadas gia kingdomgai hin ga etsgai gia isis altha.

17. Yenkien dalung ga lth shugung, Gum nung ākutsū ging-an Shanung-itlagadas gia kingdomgai nung isdāansdlu, gum ai il kud-sang-ashang, hin il shouon.

18. Nung Itlagada las, di hēnung-a-swonung-ai un gūshū lth isdāashang? waigien hin nung itlagada la alth kianang-an.

19. Gushintlou, Nung Lā, hin di dung kyā dang, gum nung swonshung-hun lā-ung-gung, tlan Shanung-itlagadas swonan-a.

20. King-goguns un dung ūnshīdung, Gum

tl gin kulda-ung-ga, Gum tl haada tl tiang-ga, Gum tl kwolthda-ung-ga, Gum nung alth tl kilthgadung-ung-ga, Aung-ung ga tl gūtgida, ou-ung ishin, waigien hin Jesus il shudai-an.

21. Di dlailāgun sta-hun adshi wautliwon duman lth keng-gīni, waigien hin il shouon.

22. Waigien tlistleuon Jesus gudang-andlu, Gin swonshung gum hawun dung isdang-gung; gin dung daas wautliwon alth gia-dah-ū, waigien lth ka kong-ushgitaigasgai da tlāad, waigien sha-tligai gu gin kwoyā dung da-ēlthishang; ūtla, di dla lth kā, hin la il shudaian.

23. Waigien tlistleuon adshi il gudang-andlu, il gudung-ai sti-euonan, il gin-lthing-ā-euonan altha.

24. Waigien tlistleuon Jesus il kang-andlu, hin il shouon, Ga ginlthing-asgai Shanung-itlagadas gia kingdomgai ai isdsie yenkien shing-idsāashang!

25. Nung ginlthing-a Shanung-itlagadas gia kingdomgai ai kudsie telg, camel stlinkōsi ai kashginai yang-alang, hin il shouon.

26. Gīshd tlou kogunāsīni? waigien ga gudang-an-gai hin shouon.

27. Tl haada gum gin isdalthing-ans ū Shanung-itlagadas isdalthing-āgung, waigien hin il shouon.

28. Gwokeng, gin wautliwon talung tustlagun, waigien dung dlā talung istalgun, waigien hin Peter shouon.

29. Waigien hin tla il shudaian, Yenkien dalung ga lth shugung, Nai isgien, jā-ung ishin, kwai-alung ishin, yāalung ishin, gitalong ishin, Shanung-itlagadas gia kingdomgai agunan nung tustlasdlu,

30. La ū wēt kwunan wau telg da-ēlthishang, waigien tliga isankasas gu il hēnung-aswonung-ashang, waigien hin tla il shudaian.

31. Waigien ga tlāalth waugu stungai un il ai-ang-an gien, hin la il shudāwon, Gwokeng, Jerusalem ā talung istal-lthangkashang, waigien ga prophetgasgai gin kālang-an wautliwon ging-an nung haada Git un etishang.

32. Tliga kulat haade ga la tl isdāases altha, waigien la alth tl kilthnans gien, ishin la tl tloulth-dāung-as gien, ishin la gwī tl lthtā-gwong-ashang;

33. Waigien la tl shkiduns gien, ishin la tl tiiā-ashang; waigien shin lthonulthilthsdlu housen il kalthū-ashang, waigien hin la il shudāwon.

34. Waigien adshi wautliwon gum un il ūnshi-dang-āwon; waigien adshi gushue la sta salgaāwon, waigien gin il shudaian da il kētus-āwon.

35. Waigien Jericho un il dōng-ēlandlu, nung hang-kaga gin ginung-ai un keu-e in kou-aian;

36. Waigien tl shkūl-euon la gūt istals il gudang-andlu tliku gin etgai da il kianang-an.

37. Waigien Jesus Nazareth haadas kāang la ga tl shouon.

38. Jesus, David Git dung is, di kalthshint lth gudung, waigien hin kwunan il shouon.

39. Waigien tla kōnast ga istalan-gai il stidaian, kilthwol il itsgai una; David Git dung is, di kalthshint lth gudung, waigien hin kwunan wau telg il shouon.

40. Waigien Jesus giāagan gien, āgang la tla il isdā-alan; waigien tlistleuon il āanē-landlu,

41. Gūsh dung un lth isdie da ū dung gudung-gung? hin la alth il kianang-an. Shalana, di hung-i helthilthgie da ū di gudung-gung; waigien hin il shouon.

42. Akwon lth dung hung-i helthilthgada; dung yetdie ū dung kogundang, waigien hin Jesus il shudaian.

43. Waigien hawīdan gin il keng-īdan, waigien la dlā il kāgan gien, Shanung-itlagadas ā il kil-lāgan; waigien tlistleuon tl haada wautliwon kang-andlu, Shanung-itlagadas ā tl kil-lāgan.

### Chapter 19.

**W**AIGIEN Jericho ilnagai ai il kudsaian gien, kalthgut il kagan.

2. Waigien nung ilthing-a Zacchæus hin kya gu ijan; waigien giashouganung-lēalung un il itlagadagan gien, il ginlthing-āgan.

3. Waigien Jesus nung isis kang-gai da il gudang-an, waigien tl shkūlas alth odō il esh-gaian, il dsūi-kwau-anan altha.

4. Waigien tla kōnast il odan gien, la il kang-gai un sycamore lthkai gwī il kulthaian ; gai gut il ka-ungkashagan altha.

5. Waigien tlistleuon Jesus gu katlagandlu, shi ga il kēilthaian gien, Zacchæus, hawīdau lth kāalth, aiat dung gia nai ā lth isangkakas altha, hin la il shudaian.

6. Waigien il kutalan gien, gudung-ai lā dung-alth kwulthgang la il isdaian.

7. Waigien tlistleuon tl kang-andlu, tl gū-dāung - ōdsou - on, Nung ilthing-a dāung-a kwulth il itsgai un ai il kudsang, waigien hin tl shouon.

8. Waigien Zacchæus giāagan gien, Gwo-keng, Shalana, ga kong-ushgitaigasgai ga gin lth dāas gūdlū shāawā lth isda-ung-kashang ; waigien ging-gang-an nung haada lth gia-shoudaiasdlu, wau telg etgai stunshung dlū la ga silthgang lth isdāashang, waigien hin Shalana il shudaian.

9. Waigien hin Jesus il shudaian, Aiat adshi nai ā nung is kogun-gung, la ishin Abraham gitalung swon isis altha.

10. Nung haada Git ga gougasgai da kens gien, ishin il kogundie un katlas altha, hin la il shudaian.

11. Waigien hawun adshi tl gudung-gun-

dān, kēgang alth ishin il kēgang-an, Jerusalem un il āanas gien, ishin Shanung-itlagadas gia kingdomgai hawīdan kang-gēlthshang tl gūdang-an altha.

12. Waigien hin il shouon, Nung itlagada ken-ung un kingdom isdas gien, silthgang il stelgai un tliga jīng-a ā ijan.

13. Waigien gītsadalung shu sta tl tlāalth un il ai-ang-an gien, pound tlāalth la ga il isdāwon, Lth katlagai keu lth adshi gudista tla-kāwong, waigien hin la il shudāwon.

14. La kwulth-it ga nāansgai tlou la telg kang-an gien, la dla gushou tl hundsūdaian, Gum anung ilthing-a isis itil un itladagai ga itil stalthing-gung, waigien hin tl shouon.

15. Waigien tlistleuon kingdomgai il isdaian gien, silthgang il stēlandlu, a ga gītsada ga dālē il isdaian un il lthai-i-balan, gudista gin il tla-kāawondlu tlistleu la gwī kāalthawē un il ūnshidai una.

16. Waigien nung swon la un katlagan gien, Nung itlagadas, dung gia poundgai gwī pound tlāalth kāalgun, hin il shouon.

17. Hou-a; gītsada lā dung ijung; gin gūdsū-dsū duman dung kang-gai lagun alth, lana a-tlāalth un dung lth itlagadēlth-dang, waigien hin la il shudaian.

18. Waigien nung swon ishin la un katlagan gien, Nung itlagadas, dung gia poundgai gwī pound tlēlth kāalgun, hin il shouon.

19. Akwon lth dā ishin lana a-tlēlth un ung itlagadādi, waigien hin la ishin il shudaian.

20. Waigien nung kulat ishin katlagan gien hin il shouon, Nung itlagadas, ā ū dung gia poundgai ijung, giang-ū ung-a ū alth duman lth keng-gun ;

21. Dung ga di lthwaugagun, nung ilthing-a skulthja dung isis altha ; gum hēt gin dung isdans hun dung isdas gien, gum gin dung tldsans hun ishin dung tlīdung-gung, hin il shouon.

22. Waigien hin la il shudaian, Tliku dung shus alth tliku dung ets dung lth kendāashang, nung gītsada dāung-a isis. Nung ilthing-a skulthja di isis gien, gum hēt gin lth isdans hun lth isdas gien, gum gin lth tldsans hun ishin lth tlīdung-us un dung ūnshidun ;

23. Gushintlou gum dāla-nai ai dālē dīna dung isdang-ūjang, waigien lth katlasdlu, dālē isgien, wau gwī kāalthsi ishin lth isdashgaiahung-gung ? hin la il shudaian.

24. La sta lth poundgai isdū, waigien lth pound tlāalth nung dāas ga isdū, hin la kwulth ga tljūgiaang-an-gai il shudaian.

25. Nung itlagadas, pound tlāalth il dāgi-gung, waigien hin la tl shudaian.

26. Gin nung dāasdlu, la ga gin isdiāashang ; gum gin nung dāansdlu tlou, gin il dāas hun la sta isdiāashang dalung ga lth shugung.

27. Waigien di telg ga kang-an-gai un lth



itlagadagai ga gwou-aian lth althgwi isdū ang-a lth di hang-gu tl-dū, *hin il shouon, hin Jesus shouon.*

28. Waigien tlistleuon adshi il shudagigandlu, tla kōnast il kaidan gien, Jerusalem a il kulthai-an.

29. Waigien tlistleuon Bethphage isgien Bethany ishin tldou Olives tldāwe hin kyagan gu ijan un il dōng-elandlu, gyang disciplesgai stung il kilistiidan gien hin il shouon,

30. Dalung hanltha lana isis ā lth istiūdū; waigien ai dalung isdsasdlu, geudan giti gum hawun gwau tl kāwung-ung keutl-dajā dalung keng-ashang; la aista lth tlāadū ang-a althgwi il isdū-wong.

31. Gushintlou la aista dalung tlā-ēdung? waigien hin dalung nung shudasdlu, Shalana ū la ga stalthag, hin tl shū-wong, waigien hin la il shudāwon.

32. Waigien la ga kil-istiidan istiidan gien, tliku gin la ga il shudāwon ging-an gin il keng-āwon.

33. Waigien hawun geudan-gai giti aista il tlāadiigundān, Gushintlou geudan-gai giti aista dalung tlāēdung? hin la ga dāagan-gai il shudāwon.

34. Shalana ū la ga stalthag, waigien hin il shū-āwon.

35. Waigien Jesus ā la il isdāwon; waigien gin tl giandas geudan-gai giti ing-gwi tl

danthaiian gien, Jesus la ing-gu tl kou-  
daian.

36. Waigien hawun il kågundān, gin tl  
giandas keu-e ai tl duntang-an.

37. Waigien il dōng-elandlu, Olives tldāwe  
kwul gu il ijandlu, ga disciplegas shkūlas  
wautliwon lthong-gwila dugwīa tl kang-an  
wautliwon alth tlika tl gwūlā-ēdan, waigien  
Shanung-itlagadas ā kwūnan tl kil-lā-ēdan ;

38. Nung King-ga Shalana kye ā katlas ū  
yenki lāgung ; akwon lth shatligai gu gudung-  
ai dlaiā isdū ang-a sha āgwīgai un yāgudung-  
ādū, waigien hin tl shouon.

39. Nung Itlagadas, gyang disciplesgai lth  
stidi, waigien hin ga shkūlas shu sta Pharisee  
haade ilthi il shudaian.

40. Ashgai tlan gushusdlu, kwau-e ū gū-  
shūashang dalung ga lth shugung, waigien hin  
hanglthang il shouon.

41. Waigien tlistleuon il dōng-elandlu, ilna-  
gai il kang-an gien, kalthshint il sailthaiian,

42. Waigien hin il shouon, Gin alth tl  
gudung-ai dlaias un wēt dung ūnshidasdlu,  
*yenkien dung un lashgaiia-hung-gung!* wēt tlou  
dung sta salgāgung.

43. Dung telg ga kensgai dung odō gin  
lthetigadulths gien, dung odō un tl gīlthilthdas  
gien, dung tl keng-kēāwashang,

44. Waigien dung isgien dung gitalung  
dung ā is dung-alth tligai ing-gu tl kēi-dlish-

gutses shantlanai isisang; waigien gum kwau kē-swonshung un dung ā gut ing-gu tl kē-lthindadang-ashang; dung un nung katlagundlu gum un dung unshidang-gun altha, hin il shouon.

45. Waigien templegai ai il kudsaian, waigien ā gin alth tl giadahwos kya ga il dangwau-ēdan,

46. Giagun nai singlthgang gushou nai ū isisang, hinū kālun-āgung; dalung tlou kwolthdālēalung gia dīnai un tloulthagun, waigien hin tla il shudaian.

47. Waigien shantlan wautliwon gut templegai ā gin tla il shkotadagang-an. Waigien liplēt un ga itlagadasgai isgien, tukālang-lēalung ishin, tl haada un ga itlagadasgai ishin, il tiie da gudang-an;

48. Waigien gum tliku la tl edalthingekang-gang-an; tl haada wautliwon il kil gudung-ai da gudung-euonan altha.

### Chapter 20.

**W**AIGIEN shantlan swonshung gut, hawun templegai ā tl haada gin il shkotadasgien, ishin gialthang las alth tla geu gu il gushugundān, liplēt un ga itlagadasgai isgien tukā-lang-lēalung ishin, ga kēasgai dung-alth la un istlagan;

2. Waigien tl gushouon, Adshi lth itil ga

shūdi ; gūsh dugwīgai alth ū adshi dung isdas gien, gīshd ishinan ū adshi dugwīgai dung ga isdaiang ? waigien hin la tl shudaian.

3. Ltha ishin gin da dalung alth kianung-ashang ; di ga lth shūdū ;

4. John gia baptism-gai gu shatligai sta ija ? tl haada sta gwau ? waigien hin hanglthang tla il shudaian.

5. Waigien edē tl kāūgaian, Shatligai sta, hin talung shusdlu, Gushintlou gum la dalung yetdang-ūjang ? hin il shu-ashang.

6. Waigien, Tl haada sta-a, hin talung shusdlu, tl haada wautliwon itil kunlthūashang ; John prophetgagan un tl ūnshits altha, hin gu tl shudaian.

7. Gum tliji sta isi un itil ūnshidang-gung, waigien hin hanglthang tl shouou.

8. Ltha ishin nung gia dugwīgai alth adshi isdas gum dalung ga lth shudang-ashang, waigien hin Jesus tl shudaian.

9. Waigien adshi kēgang-ai alth tl haada ga il kēgang-īdan ; Nung ilthing-a wine ānē lthkai kwulth-kotajai tloulthaian gien, tōkānlēalung il shildadaian, waigien tliga kulat ā il kaidan, gu il is-hungadai una.

10. Waigien ān nūtgēlandlu ga tōkanlē-gasgai ā nung gītsada il kil-kaidan, wine ānē kwulthkotajai sta ān la ga tl isdie una ; waigien ga tōkanlēgasgai il shkidang-an gien, ān ādan la tl kaidaian.

11. Waigien housen nung gītsada ā il kil-kai-dan; waigien la ishin tl shkidang-an gien, la tl tloulth-dāung-euonon, waigien ān ādan la tl kaidaian.

12. Waigien housen nung il kilkaidan; waigien la ishin tl tligaidaian gien, kya ga la tl dang-an.

13. Gushinu lth etishang? gitang kwoyasi ā lth kilkaidshang; la ga tlou tl gūtgutshahung-gung, waigien hin wine ānē kwulthkotajai un nung itlagadas shouon.

14. Waigien tlistleuon ga tōkanlēgasgai il kang-andlu, la edē gut ga tl kāūgaian, A ū la silth nalthing-ai ijung; la talung tīiadsun, adshi kwulthkotajai itil gia isēle una, waigien hin tl shouon.

15. Waigien wine ānē kwulthkotajai sta la tl dang-an gien, la tl tīi-aian. Gushinu waigien wine ānē kwulthkotajai un nung itlagadas tl et-dāashang?

16. Il katlas gien, a ga tōkanlēgas il hīlūdāashang, waigien wine ānē kwulthkotajai tl kulat ga il isdāashang, *hin Jesus shouon.* Waigien tlistleuon tl gudang-andlu, Akwon lth gum ging-an tl edang, hin tl shouon.

17. Waigien tla gwī il kēaian gien hin il shouon, Nuh tloulthalē-alung kwau dangwaian ū nai kwūngut un kudsēlgung, hin kālūng-āsi gushinū ēdung?

18. Wodshi kwau-e ing-gu nung dlu-isdlu,

lē dsulthuldashang ; nung ing-gwī hun kē-wisdlu tlou, kōi ging-an la ga kudsulthūsdāashang, hin il shouon.

19. Waigien tukālang-lēalung isgien, liplēt un ga itlagadasgai ishin, gai dlu il gitsgīlthdie da gudang-an ; waigien tl haada ga tl lthwau-gaian ; tla edē adshi kēgang-ai il shudaian un tl ūnshidan altha.

20. Waigien la ā tl lthotsaian gien, tl haada lā ging-an agung ga etdaian la ā lthotsie un tl kil-istiidan, gin il kilsbgūdasdlu lang-a tl guduns gien, nung governorgas gia dugwigai ā la tl isdie una.

21. Waigien hin la alth tl kianang-an, Nung itlagadas, yenkien gin dung shudas gien, ishin yenkien gin tla dung shkotadas gien, ishin gum tl lthū alth dung ai-ū-uns gien, tliku Shanung-itlagadas guduns ging-an gin tla dung shkotadagung-us un itil ūnshidung ;

22. Cæsar ga talung giashougung-us gu la ? waigien hin la alth tl kianang-an.

23. Waigien gin agunan tl shus un il ūnshidan gien,

24. Penny kēshgu lth di kendū. Gīshd da nījung-ai ū ā ijung ? gūsh k'ālung-e ishinan ū ā ijung ? hin tla il shudaian. Cæsar gia, waigien hin tl shouon.

25. Cæsar gia isisdlu lth Cæsar ga isdū, waigien Shanung-itlagadas gia isisdlu lth Shanung-itlagadas ga isdū, waigien hin tla il shudaian.

26. Waigien tl haada hang-gu gum tliku gin il ging-kilshgūdalthang-e kang-gang-an ; waigien hanglthang il shouon un tl kuldung-ā-gan gien, gum tl kilang-an.

27. Waigien Sadducee haade ilthi la un istlagan, gum kotal sta tl kalthougadung-ung-ashang ga gudang-an-gai-a ; waigien hin la alth tl kianang-an,

28. Nung itlagadas, Nung ilthing-a kwai kotulthsdlu, waigien il jā gum git-kaiwons gien, il dōn il jā isdie lagung, waigien kwai-ung un tl ākutīla il kaiwie una, hin Moses itil un kālang-an.

29. Waigien tl dsikwau gut alth istalgāgun ; waigien nung kwai-as jadanēlgun gien, git-kai ādan il kotulgun ;

30. Waigien la gūst nung kugas ishin il jā isdagun ;

31. Waigien la gūst lana ishin il isdagun ; waigien wai ging-an dsikwau-hun git-kai ādan kotulthgagun.

32. Waudla nung jadas ishin kotulgun.

33. Kotal sta tl kalthougadunsdlu, gīnas jā ū il isisaug? dsikwau-hun il inādalgun altha, hin la alth tl kianang-an.

34. Waigien hin Jesus tl shudaian, Adshi hēt-tligai haade jada-nēlths gien, ishin tl la-inēl-gung-gung ;

35. Althsgai tligai gu itsgai un isgien, kotal sta kālthūe un ga lasgai ishin, gum jada-

nêlthans gien, ishin gum lā-inēlgung-ung-gung;

36. Gum housen tl kotulthgalthung-ang-gung; angels ging-an tl ets altha; waigien Shanung-itlagadas gitalung tl isgien, kotal sta kalthūe gitalung ishin tl ijung.

37. Waigien Moses gin Lthkai edē kālang-andlu, kotal sta tl kalthougadung-gung-us tla il kendaian, tlistleuon Abraham Itlagīda, Isaac Itlagīda, Jacob Itlagīda, hin Shalana il kyādai-andlu-a.

38. Gum ga kotulthgiasgai un il Itlagadang-gung, ga hēnung-asgai un tlou il Itlagadag-gung; tl wautliwon la hang-gu hēnung-as altha, hin Jesus tl shudaian.

39. Nung Itlagadas, gwaulthang-an dung shugung, waigien hin tukālung-lēalung ilthi hanglthang shouon.

40. Waigien waudla gin da la alth kianung-ai ga tl lthwaugalan.

41. Waigien hin tla il shudaian, Gushintlou nung Christgas David git ising tl shugung?

42. Sōolgūst lth di kwulth kou-i, dung telg ga kensgai dung stai keusi un lth isdie keu-a,

43. Hin Shalana giagun Shalana-gai shudaian, hin David kodan Psalms kōgīnē a shouon altha.

44. David Shalana hin il kyādasdlu, gushintlou il git il ijung? waigien hin tla il shudaian.



45. Waigien tl wautliwon geu gu hin gyang disciplesgai il shudaian,

46. Tukālang-lēalung sta lth ga gūtgung-ū, kōdats jinda hetgu istalgung-ai da tl guduns altha, gya gu tl wahdas gu ishin tla hung-a tl kwah-gulthdas gien, synagogue-nagai ā ishin aulthgahung-ū ladsilthīs isgien, lagunang gu ishin aulthgahung-u ladsilthīs tl kwoyādagung-gung;

47. Ga dsūlthin-gas gia ginagai tl kwolthda-ōdsūs gien, tl lang tla un tl gudung-ai un ishin singlthgang gushue ung-a tl jindadagung-gung; ashgai ū tl kulat telg tlū-unshkotiāashang, hin tla il shudaian.

## Chapter 21.

**W**AIGIEN il kēilthaian gien, ga itlagadasgai dāla ōdē ai dālē ung-a isdas il kang-an.

2. Waigien nung dsūlthin-ga kong-ushgitaiga mite stung wē isdas il kang-an.

3. Waigien hin il shouon, yenkien dalung ga lth shugung, Tl wautliwon telg anung dsūlthin-ga kong-ushgitaigas wē isdagun;

4. Atlas wautliwon gin kwon tl daas tīch wē isdagun altha; la tlou kong-ushgitaigaskianan, gin alth il hēnung-as wautliwon wē il isdagun, hin il shouon.

5. Waigien kwau kwōyā alth isgien, gūdi

gin tl isdaian alth ishin templegai las edē tl  
ilthi gūshūgundān, hin il shouon,

6. Adlun gin dalung kens *hīlūashang*,  
waigien gum adlun kwau kē-swonshung-hun  
gūt ing-gu isang-ases shantlanai isisang, wau-  
tliwon gūdista dang-wiāashang, hin il shouon.

7. Nung Itlagadas, gīshindū adshi isisang?  
waigien adshi isangkasadlu, gūsh kang-ūdsada  
ū isisang? waigien hin la alth tl kianang-an.

8. Waigien hin il shouon, Duman lth agung  
keng-ū, waigien gum dalung tl al-istiidgūdang-  
ung-ai una; tl kwon di kyē ā istlas gien, Lā-ū  
di ijung, hin tl shūs gien, Time-gai āanāgung,  
hin ishin tl shū-ases altha; gum tla dlā tl  
istiidang-wong.

9. Waigien tlistleuon gu-isda isgien, gudan  
lthkwida alth gialthing-e ishin dalung gu-  
dunsdlu lth, gum lthwaugulthang-wong; adshi  
is-tlagang-ai las altha; hikwon gum hawun  
tlan gin elthang-ashang, hin il shouon.

10. Itan hin tla il shudaian, Gwaigang alth  
gwaigang gut hanltha elths gien, kingdom alth  
ishin kingdom gut hanltha elthishang;

11. Waigien tliga yildung-euons gien, tliga  
kwon aī ishin tou hīlūs gien, ishin itskāashang;  
waigien gin ga lthwaugigas gien, sha-tligai  
sta ishin gin kang-ūdsada euonda isisang.

12. Waigien a gin is wautliwon konast da-  
lung tl gitsgilthdas gien, gin shing-idsa dalung  
tl āndung-dāashang, waigien synagogue-nagai

ā isgien kēchitnai ā ishin dalung tl isdāashang, waigien ga king-gasgai isgien, ga governorgasgai hang-gu ishin di kyē agunan dalung tl isdāashang.

13. Gin unsta tl shuguns ging-an dalung un etishang.

14. Althji alth tliku hanglthang dalung shūases gum wau kōnast adō dalung kwūlthilthang-ai un lth gudung-ung elthgīdū ;

15. Gushou isgien, kutung-a ishin dalung ga lth isdāases altha, waigien dalung hanltha ga etsgai wautliwon gum tliku hanglthang shoulthing-e kang-gans gien, dalung kil-kāalthdie odō ishin tl eshgāashang.

16. Waigien dalung aung-alung isgien, dalung kwai-alung ishin, dalung tō-alung yikī ishin, waigien tl kulat dalung tō-aldas hun, dalung unsta shu-ashang ; waigien tl kil agunan dalung ilthi tl tldāashang.

17. Waigien di kyē agunan tl haada wautliwon dalung telg keng-ashang.

18. Waigien gum dalung kuts ou sa-swonshung-hun gū-ung-ashang.

19. Dalung gūtgulthdsū - wæsdlu, dalung althandai dalung gwī ging-kāalthishang.

20. Waigien tlistleuon soldier haade kwon Jerusalem odō ēlths dalung kensdlu, itan hawīdan ilnagai gūases un lth ūnshitwong.

21. Itan Jūdæa gu tl isis tldāwē ā kūstie lagung ; ilnagai kalthgut tl isis ishin kya ga

itsgai lāgung ; ilnagai kyagust ga nāansgai ishin gum ai isdsie lā-ung-gung.

22. Ashgai tlū-unshkotashantlanai isis altha, gin kālun-as wautliwon wai ging-an etgai una.

23. Ga dulthgiasgai isgien, ga tutlindasgai un ishin ashgai shantlanai gut gin ga lthwau-gī-gāashang ! Tliga gut gudan lthkwīda euon isgien, ashgai haadgai un ishin tl kalthiyildung-ases altha.

24. Waigien shich alth tla tl tldas gien, tliga kulat wautliwon ai tla tl haldang-adāashang ; waigien tliga kulat haada Jerusalem ai tunanung-ashang, tliga kulat haada gia timegai tlan elgai keu-a.

25. Waigien jūyē ā isgien, kōng-ai ā ishin, kailthdai ā ishin kang-ūdsada isisang ; waigien hēt-tligai gu gwaigang-ai gudung-ai lthkwīdāashang, tung-ai isgien ai-a-we ishin dumdagas alth tl gudung-ai hīlūashang ;

26. Waigien tl lthwaugas isgien, hēt-tligai gu gin isankkas keu tl khatsūs ishin tl gingkotulth-ga-kwūdāashang ; sha-tligai dugwīgai yildung-ases altha.

27. Waigien itan nung haada Git gin dugwīa alth isgien, gin un yāgudung-a alth ishin yan kālthi ā katlas tl keug-ashang.

28. Waigien tlistleuon a gin isis is-tlagangidsdlu lth, kēitlāū ang-a sha-ung-ou-wong ; dalung kogunai dōng-ēlthses altha, hin tla il shudaian.

29. Waigien kēgang alth tla ga il kēgang-an; Fig lthkai isgien, gin lthkai wautliwon ishin lth keng-ū;

30. Tlistleuon hyilē kōstusdlu, dalung keng-gung-gung, waigien sing kīna dōng-elths un dalung ūnshidung-gung.

31. Waigien dalung ishin, tlistleuon a gin isis dalung kensdlu, Shanung-itlagadas gia kingdomgai dong-ēlths un lth ūnshitwong,

32. Yenkien dalung ga lth shugung, Gin wautliwon elthgīgai keu, adshi gūdista kang-gai gum tlan elthang-ashang.

33. Sha-tligai isgien, hēt-tligai ishin tlan elthshang; di kil tlou gum tlan elthang-ashang.

34. Duman lth waigien agung keng-u, waigien lthdanū-euon isgien, lumga-euon ishin, adshi het-tligai gudan lthkwīdie alth ishin gum dalung gudung-ai stahū-uns gien, gum shkum ging-an gai shantlanai hawīdan dalung gwī isang-ai una;

35. Wai ging-an hēt-tligai ashkwau-hun gut ga nāansgai wautliwon ing-gu isises altha.

36. Waigien lth shanlthotsgī-u ang-a sing-lthgang gūshū, gin isangkakas wautliwon sta dalung koguns gien, nung haada Git hang-gu dalung tljūgiāang-ai una, hin il shouon.

37. Waigien shantlan wautliwon ai templegai ā gin tla il shkotadagang-an; waigien sing-yā wautliwon gut il kāgwūlths gien, tldou Olives hin kyāgan gu il aldagang-an.

38. Waigien tl haada wautliwon sing-ai un il kil gudung-ai un templegai ā la un istlagang-an.

### Chapter 22.

**W**AIGIEN shibli tlukulthdāwe gū hunt lagunung-ai, Passover hin kyāgang-an, dōng-ēlan.

2. Waigien liplet un ga itlagadasgai isgien, ga tukālung-lēgasgai ishin tliku la tl tiitljoulthing-as edē tl kāūgaian; tl haada ga tl lthwau-gaian altha.

3. Waigien ga tlāalth waugu stungai swon, Judas Iscariot hin kyāgan, ai Satan kudsaijan.

4. Waigien il kaidan gien, liplēt un ga itlagadasgai isgien, ga captain-gasgai ā ishin tliku tla ga la il isda-tljoulthing-as il kilū-lthaijan.

5. Waigien tl gudung-ai lāgan, waigien dāla la ga tl isdasang-an.

6. Waigien il gwūlāgan, waigien tl shkūlas hung ilā tla ga il isdie il isdagūdang-an.

7. Waigien shibli tlukulthdāwe gū shantlanai ijan, tlistleuon passover lumadōgai tl tiie lāgandlu-a.

8. Waigien Peter isgien John ishin il kilistiidan, Passover-gai lth itil un tla-elthgīāū, talung tugai una, waigien hin il shouon.

9. Gitlanu talung tla-elthgīgai da dung gudung-gung? waigien hin la il shudāwon.

10. Waigien hin la il shudāwon, Tlistleuon ilnagai ai dalung isdsasdlu, nung ilthing-a ga jījūs un dalung istlāashang; nuh ai il kudsas ai lth la dlā isdsawong.

11. Gitlānū lthdanou-roomgai ijung, a gyang disciplesgai alth passovergai lth tugai una? hin nung Itlagadas dung shudang, hin nung nuh-lēgas dalung shudie lāgung.

12. Waigien nuh-shasi ā room euon tla-elthgīgas dalung il kendāashang; gai ā lth tla-elthgīwong, waigien hin la il shudāwon.

13. Waigien il istīdāwon gien, tliku la il shudāwon ging-an etsi il keng-āwon; waigien passovergai il tla-elthgī-āwon.

14. Waigien tlistleuon waudlu ēlandlu, ga apostlegasgai dung-alth il kāwon.

15. Di waungung-ai kōnast, adshi passovergai dalung alth tugai da di gudung-euon-gun;

16. Shanung-itlagadas gia kingdomgai gu ga elthgīgai keu, gum housen dalung alth lth tā-ung-ashang dalung ga lth shūs altha, waigien hin la il shudāwon.

17. Waigien shkutlang-ū il isdaian, waigien sing il kil-lāgīgandlu hin il shouon, Adshi lth isdū, dalung wautliwon lth wausta hūkadalū;

18. Adshi sta Shanung-itlagadas gia kingdom-gai katlagai keu, gum housen vine ānē hou dalung alth lth hūtlang-ashang dalung ga lth shus altha, hin il shouon.

19. Waigien shibli il isdaian, waigien sing

il kil-lāgīgandlu ai il ginanang-an, waigien la ga il isdāwon, Adshi di lthū dalung un isdias ū ijung; di ā dalung gudanung-ai un lth hin waugung-wong, waigien hin il shouon.

20. Waigien il lthdanūgiāwondlu, shkutlang-wē ishin il isdaian gien hin il shouon, Adshi shkutlang-wē ū di ai dalung un kwah-yang-ungkasas shkotaga outla ijung.

21. Waigien gwokeng, di alth nung gia-dahung-kasas stlai adshi tablegai ing-gu di alth ijung.

22. Tliku wau kōnast elthgigun ging-an, yenki nung haada Git tligwi isang-kasas altha; nung haada di alth giadah-ung-kasas un tlou gin ga lthwaugigāashang! waigien hin il shouon.

23. Waigien tliku nung et adshi isda-ungkasas da gut alth il kianung-idāwon.

24. Waigien la shū nung itlagadāwos edē ishin il kāügāwondlu, gu kilth shoutga il gū-shūidāwon.

25. Waigien hin la il shudāwon, Tliga kulat haade un ga king-gas tla un itlagadāgung-gung; waigien tla un ga itlagadasgai tla da tlāēdlēalung hin kyāgung-gung.

26. Dalung tlou gum ging-an etgai lā-ung-gung; dalung shu sha nung ets tlou akwon dalung un il dōnēlē lāgung; dalung shu nung itlagadas ishin dalung un gitsadāgai lāgung.

27. Ginasu sha ēdung? nung lthdanū-wos gien, il gitsada ishin? gum gu nung lthdanūwos



sha edang-ūsh ? ltha tlou dalung shu tl gītsa-dāguns ging-an edung.

28. Dalung ū di edē tl kil-kenskialthk di alth ijuni ;

29. Waigien kingdom dalung un lth elthgī-dagun, di Aung kingdom di un elthgīdagun ging-an-a ;

30. Giagun kingdomgai gu di alth dalung lthdanē una ; waigien aulthgahung-ū las ing-gu dalung tlōdas gien, Israel gwaigang-ai tlāalth waugu stung dalung ging-kilisalung-ashang.

31. Simon, Simon, Satan dung isdie da kianung-gun, wheat tl whūstagung-us ging-an dung il isdie una ;

32. Waigien dung sing lth gushugun, dung yet-die gum tlan elthang-ai una ; waigien housen dung stilthsdlu lth, kwai-alung tl-dugwiēlthang, hin la il shudaian.

33. Shalana, kechitnai ā dung alth kogai isgien, dung alth kotulai un ishin di elthgīgā-gung, waigien hin la il shudaian.

34. Peter, di un dung ūnshits da dung kudā-lthōnulē keu, gum aiat shkou ilthing-as king-ung-ung-ashang dung ga lth shugung, waigien hin il shouon.

35. Dāla gwau-ale ādan isgien, tou gwau-ale ādan ishin, stashgaga ādan ishin dalung lth kilistiidundlu gu, gin da dalung kē-ai-a ? waigien hin la il shudāwon. Gāanū, waigien hin il shū-āwon.

36. Waigien hin la il shudāwon, Wet tlou dlāla gwau-ale nung isdasdlu, il isdie lāgung, waigien tou gwau-ale ishin; waigien gum shich nung dāansdlu, kodatsai alth ung-a il giahgai lāgung, waigien shich il dahgai una.

37. Gin dāung-a isdālē-alung alth il kwai-indiāgun, hin kālunġ-āsi ging-an lth etgai lang dalung ga lth shus altha; tliku di edē gin tl kālunġ-an ging-an etses altha, waigien hin la il shudāwon.

38. Shalana, a shich tl-stung ijung, waigien hin il shuāwon. Lāgung, waigien hin la il shudāwon.

39. Waigien il kāgwaulan gien, tliku il ijang-an ging-an Olives tldāwe ā il kaidan; waigien ga disciplegasgai ishin la dlā istalan.

40. Waigien tlistleuon gu il katlagandlu, Gum dalung edē tl kīl-keng-ung-ai un lth singlthgang gūshūū, hin la il shudāwon.

41. Waigien tlistleu kwau tl kātagung-us dlu tla sta il kāgan; waigien kwolong kutsung alth il kou-on gien, singlthgang il gushouon,

42. Aung-a, dung gwūlasdlu lth, adshi shkutlang-wē di sta isdi; waikian lth tliku lth guduns ging-an gum edang; tliku dung guduns ging-an lth et, waigien hin il shouon.

43. Waigien sha-tligai sta nung angel-ga agung il kendaian gien, la il tl-dugwiēlan.

44. Waigien il gudung-ai sti-euon-andlu,

wau telg kwunan singlthgang il gushouon; waigien il dung-althdaiandlu, ai kwah-tuldang-euon-gung-us ging-an tligai ing-gu lang-a kwah-tuldang-an.

45. Waigien tlistleuon singlthgang il gushouon sta il giāgandlu, gyang disciplesgai un il katlagan, waigien il gudung-ai sti-wos tist il kou-os lang-a il keng-āwon,

46. Gushintlou dalung kogong? kālthū ung-a lth singlthgang gūshūū, waigien gum dalung edē tl kil-keng-ung-ai una, waigien hin la il shudāwon.

47. Hawun il gushugundān, tl shkūl-euon istlagan, waigien ga tlāalth waugu stungai swon, Judas hin kyagan, tla un kutl-jāwon; waigien Jesus ā il kāgan la il shkwūntlie una.

48. Judas, shkwūntla dung-alth gu nung haada Git alth dung giadah-shāūsh? waigien Jesus hin il shudaian.

49. Waigien la odō ga ijan-gai tlistleuon tliku gin ēdangkasas tl kang-andlu, Shalana, shich alth gu tla talung shoshgadash? hin tl shouon.

50. Waigien tl swon liplēt un nung itlagadas gitsada shoshgadan gien, sōolgüstgai il geu wau sta lang-a il shkī-otlaian.

51. Kwai lth etdū, waigien hin Jesus hanglthang shouon. Waigien il geu lang-a il tli-tlaian gien, lang-a il tla-ngīstlaian.

52. Waigien liplēt un ga itlagadasgai isgien, templegai un ga captain-gasgai ishin, ga kē-asgai ishin, la hanltha etgai un la un istlagan Jesus hin shudaian, Nung kwōlthdalēga hanltha etgai un tl istlaguns ging-an gu, shich dung-alth isgien, shkong-ū dung-alth ishin di un dalung istlā-ūsh ?

53. Shantlan wautliwon templegai ā dalung alth lth ijundlu, gum di dalung gitsgilthdang-gīnī; waigien dalung gia timegai ā isis gien, algagai dugwīgai ishin ā ijung, hin tla il shudaian.

54. Waigien la tl gitsgilthdaian gien la tl al-kaidan, waigien liplēt un nung itlagadas gia nai ai la tl isdaian. Waigien Peter tla dlā āgwī kāgan.

55. Waigien tlistleuon nai kēū gu tl tsanouon gien tl wautliwon gudung-althan tlāwondlu, Peter ishin tla shu kou-aian.

56. Waigien hawun tsanu-e otgagai ā il kougundān, nung jada itan inā il kang-an, waigien la il khatsgilthdaian gien, Unis ishin la alth ijun, hin il shouon.

57. Waigien da il kudaian, Nung jadas, gum la un di ūnshidang-gung, waigien hin il shouon.

58. Waigien gum jīng-ang-gundān nung kulat ishin il kang-an, Dā ishin tl swon ijun, waigien hin il shouon. Nung ilthing-as, gum tl swon di isang-gung, waigien hin Peter shouon.

59. Waigien wau sta ashkoshgīt swonshang-andlu, nung kulat ishin kwūnan gushouon, Yenkien anung ilthing-as ishin la alth ijun, il Galilee haadas altha, waigien hin il shouon.

60. Nung ilthing-as, gum tliku dung shus un di ūnshidang-gung, waigien Peter hin shouon. Waigien hawun il gushugundan, hawidan shkou-e king-ang-an.

61. Waigien Shalana gwī kī-aian gien, Peter il khatsgilthdaian. Waigien tliku Shalana shouon ai Peter kēidan, Aiat, shkou ilthing-as king-ung-ai kōnast di da dung kuda-lthō-nulthshang, hin la il shudaian-a.

62. Waigien il kāgwaulan gien, il sailth-euon-an.

63. Waigien Jesus ga gitsgadan-gai la alth kilthnang-an gien, la tl shkidang-an.

64. Waigien il hung odō gin tl isdaian gien, Unsta lth shu; gīshdū dung shkwudang? hin la alth tl kianang-an.

65. Waigien gin āda kwon la hanltha tl shudaian gien, gushou dāung-a la ga tl isdaian.

66. Waigien itan shantlan-gundān, ga kē-asgai councilga un gudung-althan gudā ijan, waigien liplet un ga itlagadasgai isgien, ga tukālanglēgasgai ishin gu ijan; waigien councilgai ā ung-a la tl alkaidan;

67. Nung Christgas dung isdō lth, itil ga shudi, waigien hin tl shouon. Waigien hin

tla il shudaian, Dalung lth shudadōwan, gum dalung yetdang-ashang ;

68. Waigien dalung alth lth kianung-dōwan, gum hanglthang dalung shu-ung-ashang.

69. Waigien adshi sta-hun nung haada Git Shanung-itlagadas dugwigai sōolgüst kou-wau-ashang, waigien hin tla il shudaian.

70. Shanung-itlagadas Git gu dung isūsh? waigien hin tl wautliwon shouon. Dalung ū lth ising shugung, waigien hin tla il shudaian.

71. Gūsh-un-ū witness ga housen itil stalhang? Talung gudan helthang ai sta il shus gudung-gun altha, waigien hin tl shouon.

### Chapter 23.

**W**AIGIEN tl wautliwon-hun tljūgiaian gien, Pilate ā la tl isdaian.

2. Waigien la hanltha tl gushūdan, Anung ilthing-as itil gia haadgai shu gudan lthkwīda tloulthas gien, Cæsar ga tl giashougai sta tla il stidas gien, Christ nung king-ga il ising il shus talung kēigun, waigien hin tl shouon.

3. Dung gu Jews haade un king-ga-ūsh? waigien hin Pilate la alth kianang-an. Dung kil-lthyetdang, waigien hin hanglthang la il shudaian.

4. Anung ilthing-as gum gin tlishgūdang-ung lth gudung-gung, waigien hin Pilate

liplēt un ga itlagadasgai isgien, tl shkulas ishin, shudaian.

5. Waigien wau telg tl gushūidan, Tl haada gin dāung-a il kil-isdagung-gung, waigien Judæa tligai ashkwau-hun gut gin tla il shkota-dagung-gung, waigien Galilee tligai gu il is-tlagang-gun sta, adshi tligai un ishin il katlang, waigien hin tl shouon.

6. Waigien tlistleuon Pilate gudang-andlu, il Galilee haadāgai da tla alth il kianang-an.

7. Waigien tlistleuon Herod gia tligai sta il ijan un il ūnshidalandlu, Herod ā la il kil-kaidan, la ishin waudlu Jerusalem gu ijan altha.

8. Waigien tlistleuon Herod Jesus kang-andlu, il gudung-ai lā-euon-an ; il kang-gai da la il gudung-hungadan altha, la alth gialthing-e il gudung-gang-an altha ; waigien gin unkuldung-a il isdas lang-a kang-gai da il gudang-an.

9. Waigien gin kwon da la alth il kianang-an ; waigien gum hanglthang la il shudang-an.

10. Waigien liplēt un ga itlagadasgai isgien, ga tukālunġ-lēgasgai ishin tljūngiang-an, waigien la hanltha tl gushu-euon-an.

11. Waigien Herod gyang soldiers-gai dung-alth la alth nang-asilang-an gien, la alth il kilth-nang-an, waigien gin giandalthing-e lā ai la il kudsadaian gien, Pilate ā silthgang la il kaidaian.

12. Waigien gai sing-ai gut Herod isgien Pilate ishin gut un gudang-ai ligalan ; wau kōnast gu telg il keng-ūgang-an altha.

13. Waigien Pilate liplet un ga itlagadasgai isgien, ga itlagadasgai ishin, tl haada ishin un ai-ang-an gien, hin tla il shudaian,

14. Anung ilthing-as di ā dalung isdagun gien, tl haada gin dāung-a il kil-isdang dalung shugun ; waigien gwokeng, dalung hang-gu la lth ging-kilisalung-gun, waigien la hanltha gin dāung-a dalung shudas gum il isdang-an un di ūnshidulgun ;

15. Herod ishin ging-au shugung ; itil ā housen silthgang la il kilkaidan altha ; waigien gwokeng, gin agunan la tl tii-althing-e las gum il isdang-an.

16. Althji alth la lth shkiduns gien, la lth kaidāashang, waigien hin tla il shudaian.

18. Anung ilthing-as lth dang, waigien Barabbas tl lth itil un kāgwulthda, waigien gudung-althan hin kwunan tl shouon ;

19. Althunis ilnagai gu gudan lthkwida tloulthaiian gien, ishin tla il tldaian tāa kechit-nai ai tl isdaian.

20. Waigien housen Pilate tla ā gushou-on, Jesus kāgwulthdie da il gudang-an altha ;

21. La lth jidūdlishgut, la lth jidūdlishgut, waigien hin kwunan tl shouon.

22. Gushintlou, gūsh dāung-a ū anung ilthing-as isdā-ūchang ? Gin agunan la tl tiie las



gum lth kēi-ung-gun ; althji alth la lth shkidduns gien, la lth kāgwulth-dāashang, waigien hin tla il shuda-lthonalan.

23. Waigien wau telg kwunan tl kilthgūlai-an gien la tl tiie da tl kianang-an. Waigien tl kilth agunan tla gwī kāalan.

24. Waigien gin da tl kianang-an ging-an tl ūgai un Pilate tukung-gogang-an.

25. Waigien gudan lthkwida nung tloulthai-an gien, tl tldaian taa kechitnagai ai tl isdaian il kagwulthdaian, Jesus tl ginang-an la tl isdie un tla ga il isdaian.

26. Waigien tlistleuon la tl alkaidandlu, Simon, Cyrene haadas, ilnagai kyāgūst katlagan tl gitsgilthdaian gien, shkau-amagai la tl shkeulthgaidaian, Jesus dlā il shkeulth-gagundalai una.

27. Waigien tl shkūl-euon la dlā istalan, waigien tl jāada ishin saigaian gien, la silth tl shouon.

28. Waigien Jesus tla gwī kē-aian gien, hin il shouon, Jerusalem gūjang-alung isis, gum lth di kalthshint saigang-ū ; kalthshint-gang isgien, gitalung kalthshint ishin lth saigū.

29. Ga kekulasgai isgien, gum ga kaiwongai ishin, waigien gum kun-ung alth ga tutlindansgai ishin, lagung, hin tl shū-ases shantlanai isankasas altha.

30. Itil gwī lth tl-dulthdi, hin wau dlu

tl dāwe tl shūdiids gien, Itil lth sal, hin ishin kēi-āwons tl shudiidshang.

31. Khait hēnung-a hin tl isdasdlu, gushinu khait yhilgala tl isda-tljū-ashang? hin tla il shudaian.

32. Waigien gin dāung-a isdālē-alung stung la alth tl al-istalan, la tl tl-dāwe una.

33. Waigien tlistleuon Kuts Shkwuds hin tliga kyāgan un tl istlagandlu, la tl jitūdlisgadān, waigien gin dāung-a isdalēalung ishin tl jitūhashgadān, nung swon sōlgūst tl isdaian gien, nung swon ishin stlan-gūst tl isdaian.

34. Aung-a, tla kalthshint lth gudung; gum tliku tl wos un ung-a tl ūnshidans altha, waigien hin Jesus shouon. Waigien gin il gian daian gūdi tl tlādīgan gien, lots tl isdaian.

35. Waigien tl haada tljūgiang-an gien, la tl kbā-ū-lang-an. Waigien ga itlagadasgai ishin la alth kilthnang-an, Tl kulat il kogundagīni; akwon lth agung il kogundadi, Shantung-itlagadas gia Christgai il isis gien, nung il gwūlāgan ishin il isisdlu-a, waigien hin tl shouon.

36. Waigien ga soldiergasgai ishin la alth shou-nang-an, waigien la un tl istlagan gien, vinegar la ga tl king-āwon,

37. Jews haade un nung king-gas dung isisdlu lth, agung kogundi, waigien hin tl shouon.

38. UNIS JEWS HAADE UN NUNG

KING-GAS IJUNG, waigien hin la sha-īt gin kālunġ-āgan.

39. Waigien gin dāung-a isdalē-alung swon dliiwaian la alth kilthnang-an, Gum gu nung Christgas dung isang-ūsh ? agung lth kogundi, waigien itil ishin, waigien hin il shouon.

40. Nung swon tlou hanglthang shouon gien, la il stidaian, Gum gu Shanung-itlagadas ga hun dung lthwaugang-ūsh, la ging-an dung tlū-unshkotias altha ?

41. Itil ū tlū-un-shkotiāgai lāgung ; gin talung isdagini itil ga shougas altha ; unis tlou gum gin dāung-a isdang-gun, waigien hin il shouon.

42. Jesus, di ai lth kēidung, tlistleuon kingdomgai dung-alth ung-a dung katlasdlu-a, waigien hin il shouon.

43. Yenki dung ga lth shugung, Aiat, Paradise gu di alth dung isisang, waigien hin la il shudaian.

44. Waigien waudla ashkoshgīt tlū-unilthēlan, waigien ashkoshgīt tlāalth-swonshung-gū-elē keu tliga ashkwau-hun gut algāgan,

45. Jūyē otgagai gū-ēlan altha ; waigien templegai giang-u alth roomgagan gūdistā āgitajan.

46. Waigien tlistleuon Jesus kwūnan sailthaiandlu, Aung-a, dung stlai ai althandang lth isdang, hin il shouon ; waigien hin il shugi-gandlu, il althandai la sta ijan.

47. Waigien tlistleuon nung centurion-gas tliku gin edan kang-andlu, Shanung-itlagadas ā il kil-lāgan, Yenki unis nung ilthing-a lā ijan, waigien hin il shouon.

48. Waigien ga shkūlasgai adshi kang-gai un gūdā ijan wautliwon tliku gin ets kang-andlu, kun-ung tl shkwūdang-angien, tl stēlan.

49. Waigien la un ga ūnshidan-gai wautliwon isgien, Galilee sta tl jāadas la dlā istalan ishin, wochgwau tljūgiang-an gien, adshi tl keng-gang-an.

50. Waigien nung ilthing-a Joseph hin kyāgan council haadāgan, waigien nung ilthing-a lā il ijan gien, yenki gin et swonan ishin il isdagang-an.

51. (Althunis gin tl kilth-elthgigan isgien, gin tl isdaian ishin gūdāung-aian ; ) Jews haade gia ilnagai swon, Arimathæa hin kyāgan sta il ijan, waigien Shanung-itlagadas gia kingdom-gai keu il khatsūgang-an ;

52. Unis Pilate ā kāgan gien, Jesus kōt il ginang-an.

53. Waigien het ga la il isdaian gien, la odō giang-ū il isdaian, waigien shalthung-nai tīsh ai jit-helthiladsaian ai la il isdaian, waigien gum hawun ā nung kōt isang-an.

54. Waudlu gin tla-elthgī shantlanai ijan, waigien sabbath shantlanai dōng-ēlan.

55. Waigien tl jāada Galilee sta la alth ijan tla dlā istalan, waigien shalthung-nagai

isgien, tliku il kōt tl dla-āwon ishin il keng-āwon.

56. Waigien il stīlthāwon gien, gin shgūnūla isgien, hyil tō-a ishin, il tloulthāwon. Waigien sabbath shantlanai ai, tliku king-gogung-ai shus ging-an, agung il shandsūdāwon.

### Chapter 24.

**W**AIGIEN sabbath shantlanai sta shantlan tlagang-andlu, sing-ai un shalthung-nagai un il istla-āwon gien, gin shgūnūla il tloulthāwon il giālatla-āwon.

2. Waigien shalthung-nagai sta kwau-e shkōkēstliāgan il keng-āwon.

3. Waigien ai il isdsāwon gien, gum Shalana Jesus kōt il keng-ang-āwon.

4. Waigien hawun odō il kwūlthilthūgundān, tl ilthansida stung gin otga-euon gianda la kwulth tljūgi-ai-āwon ;

5. Waigien il lthwaugulth-āwon gien, tligai ing-gu il tigūstlū-āwondlu, hin la il shudāwon, Gushintlou ga kotulthgiasgai shu-wīt nung hēnung-as da dalung dī-ing-gung ?

6. Gum adlun il isang-gung, il kālthūgun altha ; Galilee gu hawun il ijandlu, tliku dalung ā il gushouon ā lth gūshgadū,

7. Nung haada Git tl haada dāung-a stlai ai tl isdas gien, ishin la tl jitūdlisguts gien, shantlan lthonulthilthsdlu housen il kālthūe

lāgung, hin il shouon, waigien hin la il shudāwon.

8. Waigien tliku il shouon ai il kēidāwon,

9. Waigien shalthung-nagai sta il stīlthāwon gien, ga tlāalth waugu swonshungai ga isgien, tl kulat wautliwon ga ishin, adshi wautliwon il shudāwon.

10. Waigien Mary Magdalene isgien, Joanna ishin, Mary James ou ijan ishin, tl jāada kulat la alth isāwon ishin, a gin isis ga apostlegasgai ga shudaian

11. Waigien adshi gushue ging-gang-an gushou ēduns ging-an la un edāwon ; waigien gum il yetdang-āwon.

12. Peter tlou giāgan gien, shalthung-nagai ā il odan ; waigien hēt il gūjalan gien ai il kēidsai-an, waigien giāng-we swonan wau isī il kang-an ; waigien gai sta nai ā ung-a il kaidan gien tliku gin edan un il kuldung-āgan.

13. Waigien tl stung ū gai sing-ai ai lana Emmaus hin kyāgan ā istiidan ; waigien althji ilnagai furlong thāale tlu-unilth Jerusalem sta jīng-āgan.

14. Waigien tliku gin edan wautliwon edē il kāūgāwon.

15. Waigien hawun edē il kāūgū-wos gien, ishin il whūdūgundan, Jesus la un katlā-āwon gien la alth il kā-āwon.

16. Waigien gum agung la il shkotang-āwon, gum la un il ūnshidang-awe una.

17. Gūshū dalung istals in ā gut ga dalung kāūgang? waigien hin la il shudāwon. Waigien il tljūgia-āwon gien, il gudung-ai stihung-gung-āwon.

18. Waigien nung swon, Cleopas hin kyāgan, hin hanglthang il shudaian, Jerusalem gu dung nas-kianan gu, tliku itan gu gin ēdun gum un dung ūnshidang-ūsh? hin il shouon.

19. Gūshū? waigien hin la il shudāwon. Jesus Nazareth haadas alth gialthing-e-a, Shanung-itlagadas hang-gu isgien, tl haada wautliwon hang-gu ishin, gin isdie un isgien, gin shudie un ishin, nung prophetga dugwīa il ijun;

20. Waigien liplēt un ga itlagadasgai isgien, itil un ga itlagadasgai ishin nung governorgas il kotulai lang shougai un la ā la tl isdagun waigien la tl jitūdlishgīdun.

21. Waigien Israel haade nung kogundung-kashagun il ising talung gudung-gun. Āng, waigien adshi wautliwon ilā, aiat adshi ijun sta shin lthonulgung.

22. Waigien itil tō-alung jāadas ilthi itil kil-kuldung-gun, sing-ai un shalthung-nagai gu il isāwon altha;

23. Waigien tlistleuon gum il kōt il kengung-āwondlu, il istlā-ūgun, waigien angels ishin il keng-āwon gien, il hēnung-ang la ga il shu-āwon il shū-ūgun.

24. Waigien itil alth ga ijun-gai ilthi shalth-

ung-nagai ā istūidan, waigien tliku tl jāadas shugun ging-an etsi il keng-āwon; la tlou gum il keng-ung-āwon, waigien hin la il shudāwon.

25. Tl ilthansida kōnung-a dalung isis gien, tliku ga prophetgas-gai gin shudaian wautliwon yetdie un dalung gūt-hōlang-gung!

26. Gum gu Christ a gin shing-idsas ānduns gien, gyang unyāgudung-gai ai il kudsie lā-ung-ūjā? waigien hin la il shudāwon.

27. Waigien Moses gia kōgīnē ā isgien, ga prophetgas wautliwon gia kōgīnē ā ishin, bible-gai ā kōgīn kulat wautliwon ā ishin, la edē gin kālung-as la ga il shudāwon.

28. Waigien lana ā il istalāwon un il dōng-elthāwon; waigien tl kā-swonung-ases ging-an il edan.

29. Waigien la os il gudung-āwon gien, Itil kwulth lth is, sing-idalths altha, waigien hawīdan algēlthshang, hin il shu-āwon. Waigien la kwulth il isawe un il kudsaian.

30. Waigien la alth il lthdanū-ūwe un il kou-ondlu, shibligai il isdaian gien, sing il kil-lāgan, waigien ai il ginanang-an gien, la ga il isdāwon.

31. Waigien il hung-i helthilthgāwon gien, la un il ūnshidāwon; waigien umlthīstan gum il kang-gang-an.

32. Hawun keu-e gut talung gundalgun gien, bible kālung-e itil un wausta il da-ostla-



gundlu, gum gu itil gūdung-ai kīn-euon-ung-ūja? waigien hin gu il shudāwon.

33. Waigien gai ashkoshgadai gut il tljūgi-āwon gien, Jerusalem gwī il stīlthāwon, waigien ga tlaalth waugu swonshunggai isgien, la alth ga isāwon-gai ishin gudung-althan gudā ijan il keng-āwon,

34. Yenkien Shalana kotal sta kalthāwon gien, Simon agung il kendaian, waigien hin il shu-āwon.

35. Waigien keu-e gut il istalāwondlu tliku gin edan alth isgien, tliku shibligai ai il ginang-an alth la un il ūnshidāwon alth ishin, tla ga il gialthindāwon.

36. Waigien hawun adshi il shūdūgundān, la yākosia la kodan gia-āwon, Akwon lth gudung-ung dlaidū, waigien hin la il shudāwon.

37. Waigien il gudung-ai lthkwidāwon gien, il lthwaugāwon, waigien hants il keng-wong il gudung-āwon.

38. Waigien hin la il shudāwon, Gushintlou dalung gudung-ai lthkwidang? gushintlou dalung kwulthilth-euon-gung?

39. Di stlai lth keng-ū, di stai ishin, lthā-ū ijung; di lth tlikūdung-ū ang-a di keng-ū; tliku di ets dalung kens ging-an, gum hants kyā-uns gien, ishin gum shkwūjāgung-uns altha, hin la il shudāwon.

40. Waigien tlistleuon hin il shouondlu, stlang isg'ien, stang ishin, la il kendāwon.

41. Waigien il gudung-ai lā-wos tista gum hawun il yetdang-wos gien, ishin il kuldung-ā-ūgundān, Gum gu gin talthing-e dalung dāung ? hin la il shudāwon.

42. Waigien shkolphung gītsā la ga il isdāwon.

43. Waigien il isdaian gien, la hang-gu il tā-āwon.

44. Waigien hin la il shudāwon, Hawun dalung kwulth lth ijundlu, tliku dalung ga lth shugun ū ā ijung; Moses gia king-gogung-ai ā isgien, ga prophetgasgai gia kōgīnē ā ishin, psalm kōgīnē ā ishin, tliku di edē gin kālung-as wautliwon wai ging-an etgai lagung, waigien hin la il shudāwon.

45. Itan il gudung-ai il helthilthgadāwon, tliku bible kālung-ai ets un il ūnshidawē una;

46. Waigien hin la il shudāwon, Nung Christgas wauguns gien, shin lthōnulth-ilthsdlu housen kotal sta il kālthue lagung;

47. Waigien il kyē agunan, gudung-ung stilthda isgien, gin dā-ung-a da kēshgade alth ishin, gwaigang-ai wautliwon geu gu tl gushue lagung, waigien Jerusalem gu tl shuda-tlagang-ai lagung, hin kālung-āgung.

48. Dalung ū adshi un ūnshitlēalung ijung.

49. Waigien di Aung gin shudagun dalung ā lth hundsūdāashang; waigien sha-tligai sta dugwīa is dalung giandīle keu lth ilnagai gu iswong, waigien hin la il shudāwon.

50. Waigien Bethany hanltha il istlāawe keu la il alistalāwon ; waigien shi ga stlang il isdaian gien, gushou lā la ā il shudāwon.

51. Waigien hawun gushou lā la ā il shūdūgundān, la sta il isāwon gien, shi ga il kulthaiian.

52. Waigien la ā singlthgang il gushu-āwon gien, gudan lā-euon dung-alth Jerusalem gwī il stilthāwon ;

53. Waigien temple-gai ā il isgiūgang-an gien, Shanung-itlagadas ā il kil-lā-ūgang-an.